

**NATIONAL ASSEMBLY OF
SEYCHELLES**

Monday 25th January, 2021

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou bann Manm Onorab e nou salye tou nou bann telespektater e lodyans a lekout. Sirman nou lodyans deor i a remarke ki nou dan obzervasyon konplet otan ki posibil COVID, e petet sa pou afekte en pti gin mannyer zot vwar Lasanble. E nou regre pou sa.

In vin dan mon latansyon ki ozordi Sesel pe selebre Lazournen Ledikasyon. Ki mon krwar i ganny marke toulezan le 24 Zanvyé. Alor avek lenportans sa group edikater e etidyan pou nou pei. Mon ti kontan salye zot ozordi e port zot konpliman Lasanble e bon kouraz dan zot travay e dan zot letid.

Lo sa ki konsern enteripsyon dan Lasanble dan letan mesaz Prezidan lo Leta Lanasyon mon pa pronons

mwan ozordi lo la. Mon'n ekrir *Leader* Lopoziyon lo la, lo sa size e mon a rezerv en deklarasyon pli tar pou sa. E alor avek sa mon ava apel Madanm Deputy, nou annan prezantasyon dokiman.

MADAM DEPUTY CLERK

Wi Mr Speaker, mersi. Bonzour tou Manm Onorab e tou dimoun a lekout. Prezantasyon Papye i *comme swivi* ;-

S.I 159 of 2020 Defence (Seychelles People's Defence Force Call Out of Reserve Forces) (COVID 19) (Amendment) Order, 2020,

S.I 160 of 2020 Fisheries (Aquaculture) Regulations, 2020,

S.I 161 of 2020 Proceeds of Crime (Civil Confiscation) (Amendment) Act 2020 (Commencement) Notice 2020,

S.I 162 of 2020 Digitization and Publication of Gazette Act (Commencement) Notice 2020,

S.I 163 of 2020 Excise Tax (Amendment of Schedule 1) (No.3) Regulations, 2020,

S.I 164 of 2020 Gazette Regulations, 2020,

S.I 165 of 2020 Customs Management (Prohibited and Restricted Goods) (Amendment) (No.3) Regulations, 2020,

S.I 166 of 2020 Customs Management (Tariff and

Classification of Goods) (Amendment) (No.5) Regulations, 2020,

S.I 1 of 2021 International Trade Zone (Declaration of Zone) (Revocation) Notice, 2021,
Mersi.

MR SPEAKER

Mersi Madanm Deputy Clerk. E nou a pas lo repons lo mesaz lo Leta Lanasyon. E mon ava envit *Leader* Lopozisyon pou konmans. Onorab Pillay.

HON SEBASTIEN PILLAY

Mersi Mr Speaker. Bonzour Mr Speaker, bonzour tou koleg Onorab e bonzour tou dimoun ki a lekout e ki pe swiv Lasanble ozordi bomaten.

Mr Speaker si zanmen ti annan en moman dan nou listwar nou pei kot Sesel e Seselwa ti pou bezwen tou son rezilyans, lentelizans, determinasyon e savwar viv pou fer fas avek difikilte ki nou pei pe pas ladan, se la ozordi.

Rezon pou sa i senp, aköz apre sa diskour kot Prezidan Larepublik pa'n nobou enform nou lo vre Leta nou Nasyon, bokou pou depan lo nou menm Seselwa pou sirmont difikilte ki nou pei pe pas ladan.

Malgre ki Prezidan in fer en lapel pou linite, sa in ganny anvlope dan en fason koze ki

demontre lakoler, kot nou'n vwar en mank tolerans pou diversite lopinyon, akonpanyen par menas sorti kot Gouvernman, apre ki li menm in trenn lipye pou fer sa ki ti nesese pou protez son pep. E pe aprezan pran lapros pou blanm tou keksoz lo lezot. I pa'n kler ki bann plan reel Gouvernman pe vin avek, avek bi pou adres sityasyon dan en fason konkret. E Prezidan Larepublik in pas plis ki enn erdtan dispit avek nou, avan ki i menm konmans koz lo Sesel e Seselwa.

Mr Speaker i regretab ler Dirizan nou pei i swazir ladres pli enportan ki i bezwen fer devan nou Nasyon, pou dekrir nou pei konman en 'kales kase', e ki li ek son Gouvernman zot la pou 89 zour, e i paret konmsi zot la pou 3an. *Welcome to the presidency* Msye Prezidan.

Sa ki enteresan i se ki dan 89 zour nou'n vwar lakantite ka COVID eksploze dan en fason enkyetan. E sa term kales kase i pa fason pou dekrir nou pei e i en mank respe pou tou Seselwa sirtou menm son *staff*, lezot travayer dan Gouvernman ;-enkli bann ki pe konbat kont COVID-19.

Prezidan i blanm Seselwa olye plito analiz inabilite son Gouvernman pou pran desizyon

e kontinyen zis fer bann *statement* ki swa lo koripsyon, swa lo drog oubyen lo travayer dan ladministrasyon piblik, konmsi ou ava dir se en lot parti ki dan Gouvernman e li Prezidan ek son parti ki dan Lopoziyon.

Fodre ki Prezidan i konpran ki ozordi se li ki a latet nou pei, e se li ki bezwen enspir nou pep e met an plas bann mezir pou montre nou pep ki nou kapab sirmont difikilte COVID. Gouvernman i dan son lanmen e napa *statement* ki i pou fer ki pou sanz sa. *The buck stops with him*. I bezwen senserman donn son langazman ki nou kapab ini ansanm, pou travay pou lavenir nou pei, e donn plan son Gouvernman pou ki nou kapab rebatir nou lekonomi.

Ler Prezidan pa kapab vwar sa labote ki egziste dan son pep, kot i pa koz lo sa rezilyans ki Seselwa in annan depi ler COVID in konmanse, e i pa met lanfaz lo sa determinasyon ki nou Seselwa nou annan, pou mwan Mr Speaker Prezidan a i mank loportinite pou vremen ralye Lepep Seselwa, deryer en sel vizyon pou travay ansanm dan sa moman difisil.

Mr Speaker ler mon vwar nou Prezidan pran lakoler dan

Lasanble Nasyonal, akoz nou lo sa kote latab pa'n aplodi e bat lanmen ler i demann nou sa i vremen regretab. E pli dezapwentan e mwan mon krwar Mr Speaker la ou t'n devret entervenir osi, nou bann Manm pa ti'n fer naryen mal ziska sa pwen. Ti napa okenn rezon pou sa kalite langaz devan Lasanble. "Fer onte" is *unparliamentary*.

(APPLAUSE)

HON SEBASTIEN PILLAY

Me ler en lenteripsyon in arive ou ou'n vwar li pertinan pou piblikman denons sa. Alor lo mon par, mon pou demann leskiz, me mon rezet sa *statement* ki nou lo sa kote latab nou fer onte. *It is again* Mr Speaker mon dir, *unparliamentary*.

An plis ki sa si akoz en *press conference* e detrwa *press release* Prezidan pou ofanse e atak nou lo sa kote latab, an dizan ki nou pa oule kree linite akoz nou pa tonm dakor avek lafason son ladministrasyon pe zer lenpak COVID-19. E refize pou les li ek son Gouvernman *dictate*, oubyen dir nou kan nou pou egzers nou laliberte lekspresyon Mr Speaker, mon enkyet pou nou demokrasi.

Mr Speaker, Prezidan pe konfiz *incitement* avek laliberte lekspresyon. Ou a rapel selman ki Gouvernman in bezwen reakte lo sak san bann keksoz ki nou'n dir, ki swa lo saler, lo vaksen oubyen lo mezir pou anpes transmisyon *COVID*. Se sa rol en Lopozisyon ki mon konnen Gouvernman i konn tre byen.

Nou ti kestyonnen lo bann aktivite lo Praslin sirtou Baie Ste Anne e Lepep in vwar ki in arive. Nou ti dir ki nou bezwen fasilite an plis nou'n vwar ki nou'n bezwen rebran Beau Vallon Bay e in rod ankor, in rod ankor. Nou ti dir Prezidan pa devret ekspoz son lekor, la nou'n vwar ki donasyon *cheque* pou nepli fer an personn *State House*.

Nou ti koz lo validite anmenn vaksen ki Gouvernman in anmennen, e Gouvernman in bezwen fer en *S.I* lo la. Nou'n koz lo *lockdown* la nou pres pou *lockdown*. Eski sa i apel *incitement*?

Mr Speaker, sa *attempt* lo nou demokrasi e nou Konstitisyon i enn ki serye. Mr Speaker nou demokrasi se nou Konstitisyon ki'n donn nou e se nou menm ki'n donn nou lekor sa Konstitisyon.

Demokrasi i vedir ki menm Gouvernman i kapab

ganny kritike pou son desizyon, e dimoun i annan drwa sante, koze e kritike. Personn pa oblize fer tou sa ki Gouvernman i dir li fer. E si i santi ki sa pe afekte son drwa, i kapab al devan Lakour e reklanm son drwa.

Personn napa *ownership* lo nou demokrasi, oubyen vin dir nou kan e ki mannyer nou pou egzers bann drwa ki nou Konstitisyon i donn nou.

Ler nou konmans koz lo *incitement*, sa i zis en lot fason pou kontrol sa ki dimoun pou dir, oubyen fer. Mon oule rapel Prezidan ki li menm i ti dir dan en *rally LDS* an 2016, ki Lepep i annan drwa koze. E si zot tous enn ant nou zot tous nou tou. Alors ler li i ti dir sa, pa ti *incitement*! Me ozordi si en dimoun i koze, oubyen kritike sa i *incitement*. I pou ganny arete, met dan kaso.

Mr Speaker nou demokrasi in evolue. Les dimoun koze. Les dimoun ekri. Les dimoun kritike. Les dimoun sante ou pa konnen se dan en kritik ki ou kapab vwar en solisyon.

Mr Speaker *US* pou reste en Lopozisyon fyer, angaze pou koze e defann lentera tou Seselwa. Nou lidantite pa personn ki pou defini. Wi i annan lenperfeksyon, me i

annan nou ki pare pou fer sa parti reklanm son plas konman sa parti progresiv ki'n fer en kantite pou sa pei, e sa pep, e ki i kapab fer plis ankor.

Mr Speaker ozordi mon lans en lapel avek Gouvernman, ki si demen bann *frontline professionals* ki pe protez nou kont *COVID* i vin devan, e demann mwan pou siport zot pou fer Gouvernman pran plis mezir pou protez nou kont sa sityasyon *COVID-19*, e mwan mon debout akote zot. Si bann pilot e travayer *Air Seychelles* i oule plis lesplikasyon lo desizyon Gouvernman, e mon pou debout akote zot, eski Prezidan son Gouvernman pou dir mwan a i apel *incitement*? Mon pa konnen.

Sa i pou vedir ki dan son Gouvernman zot pe lir nou Konstitisyon latet anba. *Incitement* pa devret vin sa nouvo mo ki Gouvernman pou servi pou kontrol nou. Akoz la si ou ganny pouse dan ou travay e ou demann kestyon, zot pou dir *incitement*. Dir Gouvernman fer *lockdown* pou ede sov lavi Seselwa, *incitement* menm. Demann Trezyenm Mwan Saler pou travayer, *incitement*. Kestyonnen si sa bann lakonpanyen ki pe donn donasyon ti lo *FA4JR*, si *incitement* menm.

Sa Mr Speaker i pa sa mesaz lespwar pou nou bann zanfan, ki Prezidan ek Gouvernman ti promet nou, i pou donn nou.

Mr Speaker, parkont mwan sa ki konsern mon fason vwar Leta nou Nasyon, mon pran lenspirasyon dan sa bann parol swivan ;-

Sesel ou menm nou sel patri, kot nou viv dan larmoni, lazwa lanmour ek lape nou remersye Bondye.

Set osi sa e Bondye ki'n gid mwan ler malgre tou sa ki Prezidan in dir devan nou Lasanble ou lezot landrwa, pou mwan gard mon langazman pou al *meeting Committee Platinum* e fer mon kontribisyon.

Se sa nou fason montre linite dan *US*, kot malgre tou latak, tou kritik, tou lensilt, mon pou toultan met Sesel e Seselwa premye. Me mon oule rapel Gouvernman ki si mon santi ki sa ki mon bezwen dir e fer dan mon rol konman Dirizan Lopozisyon dan nou Lasanble i ganny afekte, par mon prezans lo sa Komite Mr Speaker mon pou bezwen koze, mon pou fer sir Lepep Seselwa i konpran ki pe pase.

Mr Speaker vre Leta nou Nasyon i enn kot nou pep pe viv avek bokou lensertitid. Lakantite ka *COVID-19* i

kontinyen ogmante. Leta nou Nasyon i enn kot bann ki pli vilnerab i per ki sa nouvo Gouvernman pa annan zot aker.

Leta nou Nasyon i enn kot biznes ek sekter prive pe kestyonn plan Gouvernman. Leta nou Nasyon i enn kot bokou *public servants* pa asire ki zot pou gard zot lanplwa. Leta nou Nasyon i enn kot bann nouvo, pa nef Minis i fer bann *statement* ki apre ganny sanze. Se sa ki Prezidan i osi devret adrese.

Mr Speaker de zour an zour nou'n vwar lakantite ka *COVID-19* ogmante, e malgre plizyer lapel Gouvernman pa'n oule pran mezir pli restren pou ede konbat sa. Se la kot nou koz lo pran desizyon. Dan son ladres Prezidan in fer referans avek lefe ki mwan ek mon parti pa ti an faver vaksinasyon. Me sa i pa korek sa nou ti fer sa kler. *Lockdown* e vaksinen !

I malere ki se zis sa *weekend* ki Gouvernman in finalman konmans e ekoute. E sa ki nou e tou Seselwa ti pe dir pou pran aksyon e la fodre nou mazine, si nou'n ti fer sa pli boner ozordi probableman lakantite ka ki nou pe vwar ti pou'n diminyen.

Me sa ki pli trakasan kan dan sizyenm Lasanble, ti annan

plizyer *MNA* ki ti kestyonn mannyer Gouvernman pe *deal* avek *COVID-19* anba ladministrasyon Prezidan Faure. E sa letan ti napa *community transmission*. Ozordi sa bann menm Manm ki asiz lo lot kote latab nou pa tann zot ditou. Pa bliye ki sa Lasanble pa devret vin en ekstansyon Gouvernman, me i devret vin sa *oversight mechanism*. Mon oule lans en lapel ek mon bann koleg lo lot kote latab, ki ler ou blanm tou lo sa ki ti la pa vedir sa problemm pou ale, oubyen disparet.

Mr Speaker konman en sosyete, nou bezwen annan en leker pou sa ki pli vilnerab, e zanmen fodre nou servi kondisyon sosyal dimoun kont zot. Wi i annan Seselwa ki pe soufer e wi i annan fanmir Seselwa ki'n al dormi yer swar enkyet ki demen pou anmennen pou zot.

Olye koz lo koup *part rental* 1700 oubyen R2000 ki en dimoun i gannyen, Gouvernman i devret plito regard peyman *rental* pou lakaz plis ki R25,000 pou bann fonksyonner piblik, ki enkli dapre alegasyon menm Minis. Ou a pran 1700 me ou a donn R25,000!

I pa fer sans pou kontinyen blanm *mismanagement* kan nouvo Gouvernman pe fer bann pratik ki pa al dan sa lespri losterite ki nou pei pe demande. Ler Prezidan i dir ki in aret ganny let mon dir li akoz? Akoz ozordi tou let pe vin kot mwan. Se akoz sa ki mon konnen ki kot Minister lanplwa i ganny en limero pou *call* ki personn pa reponn.

Se la kot mon konnen ki nou pe demann dimoun ki napa en *laptop* pou anvoy lenformasyon lo en *email address*. Eski sa i bann dimoun ki pou annan fasilite *internet*?

Fodre fason *deal* ek sa bann ka e vin pli serye. Bokou in ganny dir lo lefe ki nou annan 4poursan lapovrete dan Sesel eski sa nepli le ka? La an se moman kot nou annan pres 70poursan depresyasyon dan Roupi, en dizef in riv R4.50 bokou fanmir pou fer pe ganny difikilte pou fer de bout zwenn. La pa letan pou zwe politik avek vant dimoun.

Mr Speaker mezir ekonomik Gouvernman i bezwen vin pli kler. Sa klima lensertitid kree par Gouvernman li menm pa ed personn. Fer bann *statement* vag pa enspir konfidans. Ti

annan 427milyon Dolar dan nou rezerv ler *LDS* ti vin o pouvwar. E le 22 Zanvye ti annan 397 milyon Dolar savedir kof pa vid! Fodre aret anbet sa pep. Fodre aret sey rod pwen politik par dir ki kof i vid. Sa pa ede nou pou nou sirmont difikilte.

Nou oule lenvestiser aste bann sekirite, me nou dir zot *return* pa garanti. Ler Prezidan i koz lo *FA4JR* pou arete an Avril, i bezwen dir ki alternativ pou ganny met an plas. Eski nou lekonomi pou'n rebran? Ki mannyer nou pou ed bann bizness, ki mannyer nou pou anmas zot travayer? Plizyer travayer dan sekter prive i enkyet. Parmi ki'n kontakte mwan in menm dir mwan atraver sa bann let, ki zot *management* pa pe fer ase pou manage sityasyon *COVID* kot zot landrwa travay. E mwan mon'n pas sa bann lenformasyon avek Minister Lasante.

Dan sa moman difisil mon swete ki plan Gouvernman i vin pli kler lo ki mannyer zot pou fer sir ki tou Seselwa i annan en lasyet manze. Nou konnen boner dan lannen ti'n annan koze lo saler travayer. Prezidan pa'n dir nou naryen an plis. Nou'n kree en panik ki saler pa

garanti. Sa dan mon lopinyon pa ti nesaser.

Mon mentenir ki tou mezir posib pou redwir depans i devret ganny pran menm kan sa i konsern serten Proze Kapital e met lanfaz ankor enn fwa mon dir lo garanti ki napa Seselwa ki dormi vant vid.

Civil service Mr Speaker se *backbone* nou Gouvernman, me i paret ki annan en lapros pou fer aret travay plizyer travayer sekter piblik, akoz zot ganny vwar ki zot pa siport Gouvernman e si zot kestyonn Gouvernman zot pou bezwen *resign*. "Ek nou pa ek nou,"pe ganny aplike. Legzanp i la.

kan Minis Finans i vin fer *statement* lo 88 loto e later *IEA* san konsilte bann zofisyé lo sa size, e sa bann zofisyé i sorti pou klarifye, aktivis parti *LDS* i vin devan e dir ki sa bann *PS* ouswa *CEO* pa devret koriz Minis. Zot devret plito *call* Minis e dir li sa an prive. Sanmenm sa en Gouvernman ki oule travay dan latransparans !

Konbyen fwa dan sizyenm Lasanble ki Lopozisyon *LDS* sa letan in koz lo *text* ki zofisyé Gouvernman in anvoy zot lo bann diferan size. Ozordi ler zot dan Gouvernman zofisyé Gouvernman pa devret koze. Byen la mon dir si Gouvernman

i reelman serye parey zot dir pou anmenn latransparans, akoz par egzanp zot pa *advertise* post *CEO Seychelles Pension Fund* e *Chairman* son *Board* e les Seselwa *apply* olye zis *handpicked* 2 dimoun.

Ler nou koz lo en *leaner Government* mon ti a kontan konnen, eski nou pe al ver en lot program *IMF*? Pa bliye ki nou annan en *Cabinet* pli gran ki dan ladministrasyon avan, ki byensir vedir plis depans, alors lekel bann landrwa ki nou pou koupe? Lekel ki pou perdi zot lanplwa? Ki mannyer nou pou anmas zot? Parey mon'n dir Mr Speaker, lensertitid. Solisyon i kapab la. Gouvernman i devret pridan e fer en program *restructuring* baze lo anmenn plis lefikasite. me non pa antre dan en program brit ki mon garanti nou pep pou soufer avek.

Public service pa mars lo *remote control* se dimoun ki fer li marse. Kot ou krwar en dimoun i an plis ou pou realize byen vit ki sa rol i nesaser. E an plis, *restructuring* pa devret ganny servi konman en leskiz pou pran lanplwa, enn nou ser oubyen nou frer Seselwa.

Si i annan en keksoz ki karakteriz sa Gouvernman ki pa ede pou anmenn linite, e senm konfizyon, se bann

statement ki ganny fer. Par egzanp bann Minis i pase e dir ki zot satisfè avèk devlopman ek travay ki zot pe vwar. E Prezidan li menn i dekrir son bann *staff* konman profesyonnel, me apre devan nou Lasanble i dir nou ki ladministrasyon oubyen pei i parey en kales kase. Ki napa fayl isi napa sa laba. Largiman se prezan ki ou ouver tirwar, e pou mwan sa i en pe difisil pou aksepte. 100 zour pe aprozè prezan ki napa fayl. I kler ki sa i zis en leskiz.

Lepep Seselwa ti a kontan konnen kot ou ete avèk sa bann keksoz ki ou'n dir ou pou fer dan ou premye 100 zour. Fodre nou pa bliye Lasanble ti amann *Terms of Reference Government Assurance Committee*, pou osi regard dan bann lasirans ki Prezidan i fer devan Lasanble.

Gouvernman i bezwen *être* fran. Zot pa'n pran sa sityasyon *COVID* o serye ler zot, zot ti pe *campaign*. E zot osi pa'n pran li serye ler zot in fek antre dan Gouvernman. Kan nou lo kote *US* ti pe koz koste e reziste tantasyon fer *meeting*, oubyen *motorcade* bann *leaders LDS* ti pe ankouraz *motorcade*. Rasanbleman dan plizyer kanton, e anmenn en kanpany fonde lo kwa? 'Pil lo li!'

Se sa bann keksoz koumsa Prezidan ki fer linite vin difisil. Bokou ti menm dir ki ansyen Prezidan Faure ti blanm tou lo *COVID*. Me la ozordi Prezidan li menm pe blanm tou lo *COVID*. Prezidan in koz bokou lo desizyon, e abilite son Gouvernman pou pran desizyon me i paret ki sa i zis dan serten ka.

Lo en kote Prezidan i kapab dir nou ki son Gouvernman in pran desizyon pou dizourd *Board* Komisyon Anti-Koripsyon. I menm al pli lwen e dir ki si napa en *case* an 2021, lannen ansuit sa pou napa en Komisyon. E mon soke ler mon vwar bann Manm lot kote aplodi sa.

Me lo lot kote Gouvernman in swadizan pa kapab pran en desizyon lo size *Air Seychelles*, e pe demann Lasanble pou debat lo sa, kan Lasanble napa lenformasyon ki Gouvernman i annan lo *Air Seychelles*. Pour mwan sa inakseptab.

Premyerman *ACCS* i sipoze endepandan. Se Lasanble ki'n pas son Lalwa akoz alor nou pa kapab debat sa enn, me lo *Air Seychelles* nou a fer deba? Mwan mon pa pou tonm dan sa pyez. Mon demann nou Lasanble pou reste vizilan. Nou bann lenstitisyon i devret

endepandan e non pa en ekstansyon Gouvernman. Mon repete, nou pa kapab dir si napa en *case* pou napa en Komisyon Anti-Koripsyon. Si Gouvernman in fini pran desizyon lo *Air Seychelles* vin fran e dir nou.

Si nou reelman oule eksplor rol ACCS, annou osi koz lo amann *schedule* dan nou Konstitisyon e ranforsi bann pouvwar *Ombudsman*. Mr Speaker aktyelman i pa zis ACCS ki kapab *investigate* koripsyon oubyen frod. Me lofis *Ombudsman* osi i kapab fer sa. Eski li i pe zwe son rol? Se sa deba ki ti devret annan avan pran desizyon dizourd *Board Anti-Corruption Commission*.

Nou pa kapab kontinyen annan zis alegasyon koripsyon e latak personnel, me okenn aksyon pa ganny pran. Lizye Lepep Seselwa i lo Gouvernman e tou zouti i dan son lanmen. Fodre nou regard dan sa bann size ki Lepep Seselwa pe rod leklersisman lo la. Sa 50 milyon Dolar ki toultan en zistwar. E la toultan sa i sanze.

Premye kou pa'n antre. Dezyenm kou in antre. En lot fwa nou'n ganny lenformasyon. En lot fwa nou pa ankor ganny lenformasyon. Nou pa kapab kontinyen kree lekspektasyon lo alegasyon koripsyon. E sa i

met sa bann lenstitisyon an dout. E ler zot vin an dout, nou koz lo ferm li.

La mon pa konnen ki nouvo zistwar nou pou tande lo 50milyon. Probableman taler nou pou tann ankor plizyer *statement* fer par bann Manm lo lot kote latab. Fotespere zot met bann nouvo lenformasyon devan nou, ki ava ed a lenvestigasyon an se ki konsern sa 50milyon Dolar. Si ti en *loan*, si i ti isi, si ti laba, mon pa konnen. Zot ki kapab dir nou akoz zot ki dan Gouvernman e zot ki pou annan lenformasyon.

Tou le de ACCS e *Air Seychelles* i devret ganny sans vin devan nou Lasanble pou eksplik nou ki pe arive. Ki swa an ki konsern son det lo size *Air Seychelles*, ki zistans negosyasyon ki Prezidan Larepiblik ti promet nou pep i pou al fer dan son kanpany, kot i ti dir, ou a rapel byen Mr Speaker, i pou al sov nou *Air Seychelles*.

I kler ki i annan en lentansyon pou zisteman retir *Air Seychelles*, ki mon vwar sa en pti pe sipe. Akoz fodre pa bliye ki an 2008 sa osi ti paret en lentansyon *IMF*. Nou ti kapab limit akse avek bann pli gro group aeryen lo bann larout ki *Air Seychelles* i devlope, e kontinyen re negosye sa det.

Me sa i ava reste en size ki nou Lasanble a kapab diskite avek *Air Seychelles*.

En lot keksoz ki mon'n en pe soke, se sa *statement* fer avek Sef Ziz pou mwan i enkyetan, Zidisyer pa devret ganny vwar konman en zouti Legzekitiv. E la mon demann CAA ki li ki annan sa rol pou li fer son travay e *investigate* sa ki Prezidan in dir, akoz apre tou se CAA ki sipoze annan sa manda pou regard dan alegasyon koripsyon kot Zidisyer. Annou pa bliye se CAA ki rekonmann apwentman bann Ziz.

Sa lapros pou enterfer dan bann lenstisyon Leta pa bon. Mon'n tann Prezidan dir ek zot bann Manm lo lot kote latab ki mannyer pou reponn son diskour. Mon zis demande si en Lasanble an mazorite *LDS* pou vin en lot lebra Legzekitiv, e zis size ki Gouvernman i anvi zot koz lo la ki zot pou nou pou fer li.

Prezan Mr Speaker permet mwan koz lo serten lezot mezir e desizyon ki Gouvernman in kapab pran. Premyerman, sel landrwa ki Seselwa i kapab ganny privez se dan son pei. Sa pei i pou nou. Mon Mosyon pou *annul S.I 148* i dan menm lespri. Fodre nou regard sa zafer *GOP*, akoz i tro pe ganny

servi avek en leskiz ki Seselwa i pares.

Me Mwan mon pa krwar dan sa size Polisi. Se pou sa rezon ki mon kestonnen akoz en Polisi? Sa i mank lafors. Mon propoze ki dan plas fer en Polisi annou met sa dan en Lalwa. Annou fer li kler dan en stati legal ki mannyer *GOP* pou ganny administre, e menm al pli lwen pou limit serten sekter.

En Lalwa i a montre ki Gouvernman i reelman serye pou adres sa sityasyon, e fer li pli transparan. Bann mezir i ava vin aplikab pou tou sekter zot ava kler e personn pa pou kapab sanze, akoz sa i vedir ki ou pou pe kas Lalwa ki pou en lofans.

Nou ava osi kapab tanporerman met dan Lalwa tou bann landrwa, kot nou pa pou donn *GOP* ki ava fer dan sa moman difisil Seselwa a relman vin premye swa pou ganny anploye dan serten landrwa

Ler mon koz lo *GOP* Mr Speaker, mon pa kapab pa koz lo sa size sitwayennte, ki pandan sizyenm Lasanble nou'n tann en kantite lo la. Mon soke ki Prezidan dan son premye *State of the Nation* pa'n koz lo propozisyon pou amann Lalwa lo sitwayennte. Mon ti espekte ki sa i vini, ou menm en lamannman Konstitisyon ki a

fer li pli kler lo ki mannyer nou pou donn sitwayennte.

Tousala sete bann size ki'n toultan preokip *LDS* e ki Seselwa in vot pou zot aköz zot pozisyon lo la. Mon vwar li drol alor ki Prezidan pa'n mansyonn sa ditou. Mon swete ki byento nou a konmans deba lo sa size sitwayennte e bann mezir ki nou bezwen fer pou sanz Lalwa.

Mr Speaker drog i en ankor en problem dan nou pei. Mon note ki bann trafiker drog in ganny en *final warning*. I byen. Mon bezwen dir si negosyasyon ant Gouvernman ek bann trafiker drog pa'n marse, Gouvernman i devret pan aksyon. Me pa zis koz lo la. Pran aksyon.

E la pou ede mon osi demande ki Gouvernman i redonn *FIU* en manda fer lenvestigasyon, ki ava konplemant sa ki *Financial Crime Intelligence Unit* kot Lapolis i annan, dan zot travay. Reform *ANB* dan en Lazans endepandan avek en stati legal anba Minister Zafer Entern. Ankouraz plis zenn pou zwenn Lapolis e ranforsi *Internal Affairs Bureau* dan Lapolis avek bi ede avek disiplin e *conduct*.

Met lanfaz lo *service without fear, favour or ill will*. E dekouraz bann *statement* par politisyen kle dan Gouvernman

ozordi, ki 70poursan gard i siport *LDS*. Sa i ava osi ede pou anmenn plis linite.

An sa ki konsern program *methadone* ki Prezidan ankor enn fwa ti kontan koz lo la me pa'n mansyonnen, Gouvernman i kapab ankouraz bann kliyan *methadone*, pou ede dan bann travay piblik kot nou santi nou nepli bezwen travayer etranze. Menm parey netwayaz, konstriksiyon i kapab annan bann landrwa ki nou kapab servi.

Fer zot vin prodiktiv parey tou Seselwa pe demande, e kontribye dan pei pandan sa moman difisil ki nou pei pe pas ladan. Sa ti ava en bon mezir pou regard lafason ki Let nou Nasyon pe evolye.

Mr Speaker dan son ladres serten sekter oubyen domenn kle pa'n ganny touse. Malgre zot tre enportan pou Let nou Nasyon. Premyerman Sekter Lapes ek Lagrikiltir kot nou pa'n tann Prezidan koz lo plan Gouvernman, pou asire ki sa 2 sekter i kontinyen fonksyonnen.

Ki bann plan Gouvernman lo asir sekirite alimanter oubyen *food security*.

Kote nou ete lo nivo lenportasyon manze. Lefe i reste ki nou bezwen met an plas

mezir pou fer sir ki par egzanz *IOT* i kapab kontinyen prodiksyon. Akoz nou konnen e nou'n ganny dir sityasyon *COVID* i tre grav laba. E ede ki bann aktivite lapes i kontinyen. Asire ki bann *stevedores* i osi ganny proteksyon nesese.

Nou osi demann Gouvernman a sa pwen, pou donn nou en kontrandi lo renegosyasyon lo Lakor Lapes avek Linyon Elopeen, e dir nou ki'n arive ziska la e ki zot anvizaze fer?

En lot domenn ki Prezidan pann tous ase se ledikasyon. Kot nou konnen ozordi tou nou zanfan i kot lakour. Nou bezwen konnen ki pou arive, ki manyer Gouvernman atraver Minister Ledikasyon pe planifye rekonmans lekol.

Mon konnen ki nou annan bann *teachers* e administrater serye e devoue dan sa Minister, e mon swet zot bonn sans dan sa latas difisil, zot kapab kont lo mon sipor kot zot annan konsern. Mon demann Minister pou ankouraz *teachers* servi *internet*, delivre leson e ogmant lakantite program lo televizyon si posib. Mon enplor bann etidyan pou adapte e pran zot letid o serye.

Prezidan pa'n koz lo nou bann Zil Pros kot nou zabitan pe osi sibir lenpak *COVID-19*.

Nou a rapel mon ti anmenn en *PNQ* devan nou Lasanble ki ti pe alert Gouvernman lo sa size. Bann Zil Pros i tonm anba responsabilite Prezidan parey nou Lasanble ti ganny dir letan Onorab Churchill Gill ti kestyonnen. Mon demann Gouvernman swiv tre pre lenpak *COVID-19* lo nou bann Zil Pros.

E sa i relye avek en size ki mon krwar Prezidan ti devret absoliman touse dan son ladres. E sa se pri lavi dan nou pei. Prezidan pa'n koz ditou lo pri lavi.

Prezidan pa'n tous ditou ki manyer son Gouvernman pe anvizaze fer desann pri lavi. Nou ti a kontan konnen ki zistans Gouvernman in arive lo ganny bann *middlemen* ki pli apropiye e ki ava ede pou fer desann pri marsandiz ki *STC* i enporte.

Eski bann lenformasyon ki sizyenm Lasanble ti annan lo bann *cartel*, parey ler Gouvernman ti dan Lopozisyon sa letan ti dir nou ki zot annan, pe ganny servi pou *tackle price fixing*.

Lo mon kote mon rekomande ki Minister Finans i konmans regard dan en Lalwa date an 1958, e ankor la ozordi. Sa i apel *Control of Services and Supplies Act*.

Mr Speaker sa Lalwa i fer provizyon pou ki dan en leta mazer parey nou pei pe pas ladan, dan en sityasyon difisil Prezidan i annan serten rekour legal ki kapab servi pou kontrol serten servis, e menm fer serten kontrol ki al ver kontrol pri. Sa Lalwa i ankor egziste e i kapab ganny amande pou *suit* nou *purpose*. I reste pou Prezidan pran aksyon kot i neseler.

Mr Speaker Leta nou Nasyon ozordi pa pou defini Leta nou Nasyon demen. Mon dir zot sa aköz mon konnen ki Seselwa nou pou *overcome* e nou pou sirmont *COVID-19*.

Me pou nou fer sa nou tou nou bezwen vin ansanm pou sirmont sa. I en sityasyon difisil. Linite pou enportan me fodre nou senser, ler nou koz lo linite. Prezidan par egzanzp i felisit Onorab Churchill Gill pou son bon travay. Sa i tre byen. Me i bezwen evite fer bann *statement* parey i ti fer Praslin, kot i ti mansyonnen ki lonorab Doyace Porice avek tou respe, in ganny mete pou rebran Baie Ste Anne ! Sa pa anmenn linite. Sa i plito senm konfizyon.

Ansanm avek linite set osi en neselite pou pran bann desizyon ki difisil me neseler. Nou bezwen al ver en *lockdown* pou ranforsi nou program vaksinasyon ! Sa i kler. E

Gouvernman pe tarde pou ekoute. Fodre ki pandan ki nou pe donn vaksen, nou pran mezir pou fer desann lakantite ka pozitiv *COVID* ki ganny anonse toulezour !

Sel fason pou nou protez nou pei. E mon'n osi alert Gouvernman lo tes pou bann travayer *frontline*. Fer ki sa bann tes e sa bann rezilta i vin pli vit pou sa bann travayer, ki i ava fer ki sa bann travayer pa ava al kot zot fanmir an *n'espérant* rezilta e riske enfekte zot fanmir e la kre plis problemm.

US pou toultan kontinyen donn son pwennvi lo sa size. La mon oule koz avek Lepep Seselwa, nou bezwen konbran reste se nou aret pran risk ek ou lavi ek pou lezot. Nou tou nou bezwen pran nou responsabilite o serye.

E la Mr Speaker mon konnen, ki an se moman finansyerman pei i dan difikilte. E Mr Speaker atraver ou mon rekomande ki Lasanble i osi ede dan rod fason fer bann koupir kot i neseler. Mon pou propoze ki nou sispann bann *allowance* pou bann travay Komite konman en fason ed Lasanble fer lekonomi.

Mr Speaker yer swar parey nou tou, mon'n esper bann *update* lo lakantite ka *COVID*

lo lakantite ka pozitiv pou sa lazournen. Nou tou nou lavi in sanze. Monn vwar manm fanmir e zanmi ganny enfekte e lenkyetid lo figir zot bann pros. Mon ti a kontan leve demen e vwar ki COVID-19 nepli la, e i zis en move memwar. Malerezman i pa pou leka. Set alor ki nou bezwen fer tou pou sirmont sa ki nou pe pas ladan.

Mwan osi senpatiz ek bann ki'n perdi zot pros dan sa moman difisil. Nou fraternite dan sa moman in ganny bokou afekte. Serten nou pa kapab dir en dernyen adye en zanmi oubyen en Manm fanmir akoz bann regilasyon ki nesaser. La mon pou annan en panse spesyal pou en koleg travay, en zanmi en dimoun ki'n ede gid mwan en Manm mon fidel mon parti e en serviter devoue pou son pep e en ansyen Manm Lasanble, Onorab Jeovana Charles. Mon senpatiz avek son fanmir e nou pou gard zot dan nou lapriyer.

Mon oule terminen par swet tou nou bann profesyonnel Lasante ki pe travay, e pe asiste lo *frontline* kouraz dan zot travay. Zot ki merit nou laplodisman e zot ki merit nou sipor.

United Seychelles pou kontinyen siport zot dan sa latas difisil. Mon konnen ki

konman en Nasyon nou rezilyan, nou determinen e pa COVID-19 ki pou defini Leta nou Nasyon, ki nou pou kit deryer pou nou zenerasyon fitir.

Konman en Lasanble annou zwenn ansanm pou asire ki okenn fanmir, okenn zanfan pa dormi vant vid dan sa moman difisil. Nou bezwen fer sir ki nou bann promes pou anmenn linite e bann promes serye w senser, ki ava relman anmenn linite e zwenn nou Nasyon ansanm pou nou *overcome* sa sityasyon difisil ki nou pe pas ladan.

Fodre pa ki nou retourn ver entrodwir bann mo, parey '*inctement*', pou nou limit sa ki dimoun i kapab dir, limit sa ki dimoun i kapab fer dan en letan difisil kot dimoun i bezwen zisteman kapab eksprim son fristrasyon ki i pe resanti, akoz petet son fanmir oubyen li menm li i pa an sekirite.

Annou fer sir ki ansanm reelman kapab met tou nou diferans dekote. E vreman travay ansanm pou sirmont sa moman difisil ki nou pei pe pas ladan. Nou kapab fer li i sifi selman ki nou serye.

Mon demann Lasanble pou regard sa sityasyon pa konman en sityasyon zot avek nou. me plito regard sa konman en sityasyon kot nou konman

Lasanble nou bezwen akonpanyan Gouvernman, e nou bezwen fer sir ki nou reste kritik. Nou gard bann kritik ki nou fer anver Gouvernman, obzektif, pou ki nou kapab zisteman ede *overcome* sityasyon ki nou pei pe pas ladan.

Fodre pa e mon dir byen fodre pa, ki nou tonm dan sa pyez pou al fer politik partizan akoz se nou parti ki dan Gouvernman.

Ozordi nou'n pran en langazman avek sa pep. En langazman ki nou ti dir ki konman en Lasanble nou pou kontinyen egzers nou *oversight* e nou *scrutiny* lo Gouvernman, pou asire zisteman dan en moman pli difisil ki nou pei pe pas ladan, nou kapab ed li sirmont sa moman.

Mon remerci ou Mr Speaker pou ou latansyon, mon remerci nou Lasanble e ki Bondye i kontinyen beni nou pei. Mersi Mr Speaker

(APPLAUSE)

MR SPEAKER

Mersi Onorab. Mon ava apel *Leader* Biznes Gouvernman Onorab Georges pou fer son repons.

HON BERNARD GEORGES

Mersi Mr Speaker. Bonzour Mr Speaker, bonzour tou bann koleg Onorab dan sa Lasanble. Bonzour tou bann dimoun ki pe swiv nou dan lakour. Mersi Onorab *Leader* Lopozisyon pou ou repons.

Mr Speaker, tanzantan dan listwar en pei e en pep i ariv en levennman ki mark en tournan dan direksyon sa pei, ki amenn en lot fason fer, ki apel tou sitwayen pou revwar zot mannyer viv e ki demann Lanasyon an antye pou rekonnèt ki en 'nouvo normal', sa fraz ki *COVID* in montre nou, en 'nouvo normal' in pran plas sa ki ti la.

Sa bann tel levennman i parfwa negativ e i parfwa pozitiv. I kapab en katastrof natirel; ouswa i kapab en lepidemi, ouswa en kriz ekonomik, ouswa en lager ou en revolisyon, me i osi kapab en larises ki pa ti'n prevwar, ouswa en sanzman Gouvernman. Sa bann fleo ouswa sa bann nouvo larises i toultan amenn en pep e en pei revwar lepase e repran lelan pou al dan sa direksyon ki sa levennman i amenn li pou pran.

Lannen pase lemonn in viv enn sa bann levennman negativ, e Sesel pa'n ganny eparnye. Nou lavi in sanze, e in sanz konpletman. Touris in aret

vini, lekonomi in kolaps, bizness in fermen, dimoun in perdi lanplwa, me pli grav ankor, nou lasante in ganny afekte. Nou bezwen mars, e ozordi koz dan mask. Nou bezwen pran prekasyon, plis ki 200 dimoun i dan karantenn, 3 in perdi zot lavi. A sa moman kot mon pe koze, nou *still* pa konnen ki demen pou anmennen pou nou.

Me tou nyaz i annan en bordir larzan, en *silver lining*. E sa gro nyaz nwanr pou disparet. Plizyer vaksen in ganny dekouver pou kontre sa lepidemi e *roll-out* in komanse. La Sesel parey nou konnen nou dan dezyenm plas dan lemonn. Dan lemonn Mr Speaker, lo vaksinasyon par latet ou plito par lebra popilasyon.

Isi Sesel, nou pei in selebre dan en fason trankil, san lafanfar 250an nou legzistans konman en pep apar, en pep solid e for ;- en pep rezilyan, kouraze, determinen. En pep miltirasyal avek en grander lespri, en pep larkansyel, san diskriminasyon lo okenn baz. En pep ki'n atenn en matirite politik.

En pep ki, apre selman 250an, i kapab ariv premye lo kontinan *L'Afrique* dan bokou domenn e parmi bann pei byen gouvernen, e dezyenm dan

lemonn lo nivo vaksinasyon kont *COVID*.

Lannen pase in osi amenn nou pei en lot sanzman pozitiv. Apre 43an 43an en sel rezim politik ki'n gouvern sa pei, Lepep Seselwa, dan son gran mazorite, in deside ki pei ti merit pran en lot direksyon. E nou'n fer sa dan lape, avek en lespri napa perdan e napa ganyan, me dan en lespri kot Sesel ki'n venker. Tranzisyon in pas dan en fason egzampler e nouvo ladministrasyon in konmans travay deswit. La, Vandredi pase, en premye gran direksyon in ganny trase par Prezidan pou sa lannen ki devan nou.

Plis kekfwa, ki Eleksyon an Oktob 2020, mesaz Prezidan i mark moman kot nou konman en pep nou vwar vre sanzman pe arive, pou direksyon ki nou pei pou pran e benefis ki sa pou anmennen.

Pandan sa 15an ki mon'n servi konman en Manm sa Lasanble, mon'n ganny sans ekout Wavel Ramkalawan konman *Leader* Lopoziyon rann repons a Mesaz Prezidan lo Leta Lanasyon 14 fwa. E Wavel Ramkalawan konman Prezidan Sesel donn en mesaz lo Leta nou Nasyon enn fwa, Vandredi pase. Me avan ki mon al pli lwen, permet mwan, Mr

Speaker, pou met kredi kot i devret mete pou sa keksoz ki nou apel mesaz Prezidan lo Leta Lanasyon, ouswa parey nou, nou kontan apel li SONA. Mon krwar ki i apropiye pou fer li la, koman Prezidan Wavel Ramkalawan in fer son diskour e nou, nou pe reponn.

Si ozordi Sesel i annan en SONA si Sesel in annan 27 SONA ziska sa enn, se gras a Parti Seselwa, dirize par en zenn pret Wavel Ramkalawan ki'n propoz sa dan manifesto sa parti pou Eleksyon pou Komisyon Konstitisyonnèl an 1992.

(APPLAUSE)

HON BERNARD GEORGES

Sa manifesto, ki ti apel Parti Seselwa *A Reasonable Approach*, ti propoz en *Message on the State of the Republic*, pou ganny fer toulezan. Sa ti ganny rebran par Komisyon Konstitisyonnèl e in antre dan nou Konstitiyon Nasyonal konman SONA. Alor, parmi sa seri lakonplisman Wavel Ramkalawan pou promouvwar la demokrasi dan Sesel, ozordi nou kapab azout en lot. E i apropiye ki sa dimoun ki'n annan sa lide, Vandredi pase in ganny sa loportinite, apre 27an, pou desarz sa responsabilite.

Rezon par deryer demann Sef D'Eta vin devan Lasanble Nasyonal enn fwa par an, pou koz lo Leta nou Nasyon, se pou sa Sef D'Eta, avek en lizye lo lepase, regard devan osi. SONA set, an menm tan, en lodit lo lepase e en map pou lavenir. Lo sa lenterpretasyon, Prezidan pa'n vwale. In akonplir son latas e desarz son responsabilite plennman.

Me, parey tou dimoun in konstata, sa enn mesaz ti diferan avek sa 26 lezot avan li. E sa i ti absoliman apropiye Mr Speaker. Ler en Sef D'Eta i mark en sanzman direksyon dan en pei, i bezwen fer li lo son laform e lo son fon, lo lafason ki i prezant sa mesaz, e lo konteni sa mesaz.

Prezidan Ramkalawan in deside pa swiv stil normal pou fer en diskour ki tous en pe tou domenn e ki eksplor sakenn zot dan konteks pei, parey tou bann diskour SONA ziska lannen pase. E parey tou son diskour larepons depi 1999. I ti swazi plito pou koz direkteman avek Lepep, dan en fason informel, me for, realis e fran, san okenn dimyel pou adousi son parol.

Akoz i ti swazi sa stil? Akoz son mesaz prensipal sete ki lavi in sanze pou Seselwa, ki nou bezwen rekonnèt sa, e viv

dan sa nouvo landrwa kot *COVID* in met nou.

Dan en serten fason, Prezidan ti bezwen trouv en fason pou sok nou! Pou sok nou tou e fer nou rekonnet ki nou tou nou bezwen viv nou lavi dan en lot fason. Ki akoz dan sa 89 zour ki son ladministrasyon ti o pouvwar, in konstat vre sityasyon ekonomik nou pei, son vre problem e son vre defi. I pa ti posib pou fer krwar ki keksoz i pa ti tro mal e les Seselwa viv dan en rev ki *COVID* pou ale, lavi pou retourn normal e i pou *business as usual*.

Parol i fasil pou koze, Mr Speaker. Nou tou isi nou viv lo nou kapasite servi parol pou rod vot, pou demann kekyon dan en fason met Minis dan en lakle, pou fer nou pwendvi pase par lao sa ki pou lezot. Me si nou anv i ki nou mesaz i ganny tande, i annan en sel fason pou fer sa, sa se sanz taktik dan en fason pou fer dimoun *wake-up and take notice* parey *Anglais* i dir. Ouswa *wake-up and smell the coffee* parey *Americain* i dir. E se sa lide ki'n amenn Prezidan swazi pou vin koz direkteman avek Lepep Seselwa atraver nou, zot reprezantan, isi dan Lasanble Vandredi swar.

When the going gets tough, Mr Speaker, the tough get going.

Ler en pilil i anmer, nou bezwen pran li pou ou remet ou lasante annord, napa fason pou ou kas kontour e fer sa gou anmer disparet. Ou bezwen anmar leker e avale. Lala kot nou pei i ete ozordi. Prezidan in dekrir pei le 25 Oktob konman en kales kase. Sa parol i fer mal pou tande mon dakor, e bokou dimoun pa'n kontan mon dakor. Me si en kales in kase, pa vo lapenn pou dekrir li konman en *Rolls-Royce* dan lekspektasyon ki i pou vin en *Rolls-Royce*.

(APPLAUSE)

HON BERNARD GEORGES

Lavi Mr Speaker pa mars koumsa. Si en kales in kase, fodre nou rekonnet ki i en kales kase. Sa se lanmwaye solisyon, rekonnet ou problem. Apre ou a konnen ki remed pou donner, ki fason ou pou repar sa kales e remet li lo semen. Napa lot fason fer. E se sa mesaz Prezidan Vandredi, koz kler, koz dan en fason realis, sok dimoun pou zot leve e pran konsyans nou difikilte, pran konsyans ki nou sityasyon in sanze, e nou fason fer, nou fason viv, pou bezwen sanz avek.

Me Mr Speaker, i tris pou rekonnèt ki pa tou dimoun ki'n konpran sa. E nou pou tande atraver sa 2 zour ki pa tou dimoun ki'n konpran sa.

Parti *LDS* ti al dan Eleksyon 2020 anba tenm Sesel Pou Tou Son Zanfàn. E parey nou'n promet, zanfàn Seselwa napa kouler politik. Si se Sesel ki'n venker dan eleksyon, alor se tou zanfàn Sesel ki'n *win*. E Prezidan in fer kler ki okenn dimoun pa pou perdi zot lanplwa lo baz politik.

Sa sete en lapel a tou travayer servis piblik pou travay pou sa nouvo ladministrasyon parey zot ti pou fer, oubyen parey zot ti fer pou sa enn oparavan. Mon pa vwar ki problemm ti pou annan avek sa personnelman. I telman lozik konman en konsepsyon ki ou ti a krwar ki dimoun ti pou aksepté sa san problemm.

Me, i malere pou konstata ki sa *mindset* ki 43an en sel parti ti enkilke dan lespri bokou in afekte zot dan en fason ki zot pa vwar keksoz parey zot devret vwar. I malere pou konstata ki apre 43an *old habits die hard*. E pourtan i pa ti merite koumsa. Dan sa menm sa Lasanble pandan ki Prezidan ti pe koze, nou'n konstata ki olye donn legzanp, in annan ki pa'n konpran sa mesaz in plifere fer

dezord. Lezot Manm a koz lo sabotaz, lo *foot-dragging*, lo dormi lo let, parey Prezidan in mansyonnen. Mwan mon pou senpleman dir ki mon felisit bann travayer servis piblik ki'n aksepté, menm anbras, sa sanzman, e pe enport zot lapartenans politik, pe travay pou byennet nou pep.

Me mon konsyan ki dan serten ka i annan serten, a tou nivo, ki pa anvi ouswa ki pa kapab sanz zot fason fer e met plis lenerzi dan trouv solisyon pou problemm ki nou sitwayen i annan, olye zis kay lo problemm.

Mon rebran parol Prezidan Mr Speaker e demann tou travayer servis piblik pou fer parey. Gouvernman *LDS* pa pe al okenn par li. I pou la pou sa 4an e 9 mwan ki pe vini o minimonm, e mon dir o minimonm.

(APPLAUSE)

HON BERNARD GEORGES

Alors sa detrwa travayer servis piblik fer zot desizyon byen e fer li byen vit. Sesel pa pe esper okenn dimoun ki pa pare pou li fer son kontribisyon. Ler bis i leve swa ou alor, swa ou reste lo *bus stop*. Bis pa pou pas ankor. Fodre tou dimoun i konpran sa tre, tre byen.

Tenm prensipal dan mesaz Prezidan sete ki sa sanzman ki Lepep Seselwa ti swazi pou fer an Oktob 2020, i enn kot nou pei pe sorti, aköz i bezwen pou rezon ekonomik sorti, me osi aköz pou rezon konstriksiyon en Nasyon for ti pou neserer sorti, sorti dan en sistenm *welfare* ki nou'n viv ladan pandan 40an kot tou responsabilite sete Gouvernman ki ti pran. E travay, pa travay, tou dimoun ti ganny siporte par Bidze Nasyonal, pou antre dan en sistenm kot sak sitwayen pe ganny apele pou pran son responsabilite endividyel, e ganny sa ki i bezwen, pa par ranpli en form *welfare*, me par leve e al travay.

Dan en fraz, se sa sanzman ki'n arive e se sa filozofi sa nouvo ladministrasyon. Natirelman, sa ki pa kapab pou bezwen ganny asiste. Me sa se pou en leksepsyon parey Prezidan in dir, e non pa en sibstitisyon pou travay. Pa nou ki'n envant sa, Mr Speaker. Sa se lafason ki tou pei ki anvi devlope e kree larises pou son zenerasyon fitir i bezwen fer.

Sesel dan sa ka pa en leksepsyon. I pa drol alor ki sa mo ki Prezidan in servi pli souvan Vandredi swar se

responsabilite. Aköz sa mo, e sa konsep deryer li, se lakle sa Letap ki Sesel pou adopte pou sa prosen 250an ki devan nou, konmansman par sa 5 lannen ki pep Seselwa ti ofer nou tou an Oktob 2020.

Pandan 40an nou'n viv anba en fo lenpresyon, ki aköz nou en zoli pei avek en bon klima, en pep akeyan e en lanmer ranpli avek pwason, tou sa ki nou devret fer se les 30 lakonpanyen pey *tax*, anmas sa *tax* pou pey tou nou depans e larestan nou, parey *motto* Fon Pansyon i dir, nou viv ere.

Me sa kalite lavi ti en sistenm ki ti'n konstri lo disab. Tan ki touris ti kontinyen vini e ton ti kontinyen ganny lapas, tou ti *ok*. Me, parey 2020 in montre nou, sa fondasyon konstri lo disab pa ti kapab reziste en sel probleman parey *COVID*. Pourtan, nou ti'n ganny en *warning* an 2008 avek kriz ekonomik. En pti pei avek en baz ekonomik etrwat Mr Speaker, baze selman lo enn-de pilye, i frazil e avek premye sekous i *crack*.

40an *welfare*, kreasyon travay ki pa prodiktif parey *home carer* ouswa *URS*, ponn *Board* pare en poul i ponn dizef, kree pos pou anmas politisyen konman *special adviser* dan servis piblik, in fer ki nou pep a

tou nivo in bliye kisisa ki fer en Nasyon for e rezilyan e en pep solid e ini. Sa se pa lot ki sa bann valer ki Prezidan in koz lo la o komansman son diskour, respe, bon latitud e travay dir.

Pandan 40an bann Gouvernman oparavan in fer en *experiment* apre en lot. NYS, SMB, laferm Leta, lekol Leta, Law Centre, dokter Leta, avek lentansyon form en nouvo Sesel avek en nouvo Seselwa kree dan limaz sistenm kontrol santralize. Enn apre lot sa bann *experiment in fail* e in frenmen, enn apre lot nou'n retourn lo sa ki ti'n ganny fer pandan 2 syek edmi oparavan.

Me, enn pa'n sanze, e sa se *welfare*, enkli program lozman sosyal. Se pou rezon pirman politik ki sa pa'n sanze. Sa ki kontrol lakaz Mr Speaker ek vant en pep i kontrol son desten. Me la, nou'n ganny notis ki sa pe al sanze.

Nou'n ganny notis ki pou ki nou pei i kapab sirviv sa moman difisil e sirmont sa bann lobstak ki *COVID* in anmennen, selman nou bezwen retourn lo sa ki nou konnen pou amenn rezilta dirab e en pep rezilyan. Setadir travay dir, pran responsabilite e annan respe pou lezot.

Si nou fer sa, nou pou annan en demen kot soley pou

leve, si nou pa fer sa, lannwit pou kontinyen anglouti nou e sa gro nyaz nwanr pou retournen.

Me Prezidan Mr Speaker pa kapab fer sa li tousel. LDS pa kapab fer sa li tousel. Pou nou arive reisi, nou bezwen en zefor kolektif. Se pou sa rezon ki Prezidan in fer en lapel a la fen son diskour pou linite kot nou ava vin en pep fyer ki viv dan larmoni e ki viv dan respe.

In osi fer en lapel avek nou tou pou linite e rekonsilyasyon serye. E la mon adres mon bann koleg lo lot kote latab e bann siporter US dan pei an antye. I dir pou perdi en eleksyon. I difisil dan Lopozisyon. Nou konn sa tre byen aköz nou nou'n pas en lavi antye lo ban Lopozisyon. Me se sa la demokrasi. Sa ki anler i kapab desann e sa ki anba i kapab monte.

(APPLAUSE)

HON BERNARD GEORGES

Mon konnen ki zot in ofanse par reaksyon Prezidan avek zot Lapres Konferans avek zot *Press Conference* lo *COVID* nou'n tann sa bomaten. Sa i normal, aköz Prezidan pa'n manz son parol. Me fodre pa ki zot tonm dan pyez ki, aköz en dirizan i kritik zot, i pe aras zot

en drwa Konstitisyonnèl a lekspresyon.

Prezidan in kler, tou dimoun i ganny drwa koze, e tou dimoun i ganny drwa kritik parol ki ganny dir. Zot, zot dan zot Letan ti fer en nespes distenksyon ant kritik ek kritik konstruktif. Sa se en senp demagozi parey nou tou nou konnen. Personn pa kontan ganny kritike, ki swa konstruktif ouswa destruktif. Nou tou nou imen e nou konn sa tre byen.

Me tou kritik i esansyel. Prezidan pa ti pe koz lo zot drwa pou kritik lafason ki son administrasyon pe antreprann sa sityasyon *COVID*. Sa ki in fer se demann ki nou Nasyon i demontre linite dan sa lalit, e non pa senm divizyon e atak striktir Leta. I annan en gran diferans ant sa, e anpes dimoun kritik Gouvernman. E zot konnen ki se sa ki Prezidan ti pe dir.

E la mwan fer sa Lasanble rappel ki – fas a sa kriz ekonomik ki pei ti pas ladan an 2008, Lopozisyon sa Letan ti solider avek Gouvernman e nou ti siport nou pei. Nou pa ti rod ni *strike*, ni kas anba, parey zot, zot in fer pandan sa detrwa deryer semenn.

(APPLAUSE)

HON BERNARD GEORGES

Ekoute, silvouple, e aprann. Avan al pli lwen lo sa size, mon bann zanmi mazine de keksoz. Premye, se ler nou, nou ti dan Lopozisyon dan sa Lasanble e nou ti anvi fer tande nou lavwa lo *COVID*, nou pa ti fer Konferans Lapres e kritik Gouvernman. Nou ti anmenn en Mosyon. Se mwan ki ti fer sa, pou demann en konversasyon Nasyonal lo sa size. Akoz? Akoz *Leader* Lopozisyon sa Letan tin ganny kit an-deor Komisyon onivo lo *COVID*.

La ki *Leader* Lopozisyon, Onorab Pillay, i lo Komite *Platinum*, parey i merite, fason travay kont en pandemi ki pe afekte tou dimoun, *US* konman *LDS*. Mon ti a krwar ki okenn kritik ouswa sizesyon ti pou'n ganny fer anndan, e non par deor lo en baz pirman politik.

(APPLAUSE)

HON BERNARD GEORGES

Dezyenn, se reaksyon Prezidan. Tou sa ki in fer se kritik fason fer parti *US*. In koz linite e demande ki politik pa ganny fer lo sa size e striktir Leta pa ganny afekte. Se tou. Mon rapel, mwan, ki ler nou, nou ti kritik li, Mr Rene li ti menas nou pou met nou kont

en miray e flit nou. Lala diferans, Mr Speaker.

(laughter)

HON BERNARD GEORGES

Lo sa size, Mr Speaker, mon bezwen siport lapel Prezidan pou ki nou pa les nou antre dan tantasyon fer politik bonmarse lo en size kot nou devret koste zepol e montre linite Nasyonal.

Sa ki Seselwa pe demann avek parti *US* pou fer – e ki zot pa ankor fer ziska prezan – se aksepte zot responsabilite pou labi le pase. Aksepte zot par dan kas sa kales. Aksepte ki zot in servi tou striktir Leta pou retenir pouwar e dan sa prosesis ede pou kas sa kales. Aksepte ki se abiz lo bidze *welfare*, don lapliferans zot siporter pou ganny lozman, fer gro kado dan rafal eleksyon, donn bal dan larzan ler larzan to koul a flo. Se sa – e bokou lezot keksoz ankor – ki’n met nou lekonomi lo son zenou e ki fer ki ozordi tou dimoun i bezwen ser sang e refer zot lavi.

Aksepte ki sa fraz ‘bonn gouvrenans, rann kont e latransparans’ to zis en fraz me ki larealite se ki napa fayl *State House* e napa *institutional memory*. Pran sa loportinite, la ki i annan ankor 9 zot pou koze,

pou annan limilite pou aksepte zot kontribisyon dan sa kales kase, epi nou a tourn paz e regard devan.

Mon pa kapab kit sa size fer politik, Mr Speaker, san lans en lapel avek mon bann koleg lonorab lo lot kote latab. Mon konsyan ki i pa mon plas pou dir zot ki zot devret fer, ni pou fer en lapres ek zot. Me parey Prezidan in fer nou rappel plizyer fwa atraver son mesaz, sa la demokrasi ki in lite pou anmennen e pou fer grandi pandan tou sa bann lannen, i bezwen ganny nour e ranforsi, e non pa detri.

Mon’n deza dir, e mon repete, ki sa Lasanble i ganny apele pou koz avek en sel lavwa. E la mon rezwenn parol *Leader* Lopozisyon konman en lenstitisyon for e solid. Lansenny deor sa batiman i lir “Lasanble Nasyonal Sesel” pa “Lasanble *LDS* Sesel” ouswa “Lasanble *US* Sesel”. Me ‘Lasanble Nasyonal Sesel.’

Si zot anvi relevan konman en Lopozisyon for, zwenn nou dan sa lager kont koripsyon, kont lesefer, kont politik dan servis piblik, e pour en pei ki viv dan responsabilite, dan linite atraver en rekonsilyasyon serye. Pa kay lo dezespwar akoz zot dan minorite. Pa tonm dan latrap

opoz tou mannev Gouvernman akoz zot dan Lopozisyon. Sa swa i devan zot. Se zot ki pou decide, akoz se zot ki lafnet lo zot parti atraver sa Lasanble, si zot pou kontinyen konman parti *US* ouswa si zot prefere al zwenn *URS*. Sa se zot swa.

(laughter)

HON BERNARD GEORGES

Prezidan in demann nou diskrit *Air Seychelles*, Mr Speaker. Mon pa pou al an-detay lo sa size akoz mon bezwen deklare ki mon annan en lentera. Mon biro avoka i enn bann *external counsel* ki *advise Board e management Air Seychelles*. Me sa ki mon kapab dir se ki *Air Seychelles* i en size emosyonnel. E mon zwenn lapel ki'n ganny fer pou nou pa met lemosyon dan sa desizyon enportan ki devan nou Gouvernman, e devan nou koman en Lasanble akoz Prezidan in demann n ou debat lo la.

Air Seychelles i nou laliny aeryen Nasyonal e i *fly the Creole Spirit*. I en lafyerte Nasyonal pou war nou avyon, avek pilot Seselwa e Seselwaz, e *cabin crew* Seselwa e Seselwaz amenn sa bann gro avyon dan bann destinasyon diferan. Nou tou nou annan en sans lafyerte

ler nou asiz dan en *departure lounge* dan en lot pei e nou war sa avyon avek son de zwazo lo en fon kouler Nasyonal lo son lake, pe arive pou vin sers nou.

Air Seychelles, apard en lafyerte Nasyonal, i annan osi en vokasyon enportan. I ti ganny kree pou asire ki Sesel i annan kolektivite a tou moman avek lemonn si – pou en rezon ou en lot – lezot laliny lavyasyon i aret deservi nou. Sa se ankor pli kritik etandonnen ki nou lendistri prensipal i reste tourizm.

Si *Emirates, British Airways* e *Kenya Airways* i aret vini, *Air Seychelles* a la pou asire ki nou pei perdi dan en losean i pa ganny dekonekte avek nou bann marse touris. Noun war li zwe sa rol pandan *lockdown* lannen pase ler lezot avyon pa ti apoz lo nou *Airport*.

Lo lot kote, *Air Seychelles* pa profitab konman en lakanpanny aeryen. I perdi larzan. Perdi bokou larzan, zis pou li kontinyen. A en moman kot pei napa larzan *Air Seychelles* in vin en *luxury* ki kekfwa nou nepli kapab *afford*. Si nou pa kapab peye pou kontinyen, nou pou bezwen pran sa desizyon difisil e koup lakord lonbri ki atas nou pei avek *Air Seychelles*.

Me malerezman desizyon pa zis enn senm ant garde pou rezon lafyerte e kolektivite, ouswa koupe pou aret perdi larzan. I annan ankore de faktor ki konplik sa desizyon ki Gouvernman i bezwen pran. E selon mwan se pou sa rezon ki Prezidan i anvi ekout sa ki nou – konman bann reprezantan Lepep Seselwa pou ekoute sa ki nou, nou annan pou dir.

Premye faktor i evidan: si *Air Seychelles* i fermen, bokou dimoun pou perdi lanplwa. Pa tou, me bokou. Sa i pa en desizyon ki okenn Dirizan okenn pei i anvi pran.

Dezyenm faktor i pli konplike. Sa se det *Air Seychelles* avek bann *bondholders* etranze. Prezidan in sizer en solisyon kot nou koup lo rezo enternasyonal (ki perdi larzan) e gard rezo *domestic* ki *breakeven* e *ground handling* ki li i fer larzan. Si sa i posib, *Air Seychelles* i a imedyatman aret perdi larzan e konmans fer larzan.

A en moman apropiye, *Air Seychelles* a kapab retourn lo lasenn enternasyonal e rekonmans son bann vol anver lezot pei. Sa ti pou en bon rezilta pou tou dimoun. Me pou ariv la, fodre ki *Air Seychelles* i kapab, swa pey son det avek bann *bondholders* apre ki in

negosye en *discount*, swa restriktir lakonpanyen apre en likidasyon.

An dot mo, *Air Seychelles* pa kapab zis koup rezo enternasyonal e rann son 2 avyon san osi deal avek sa bann *bondholders* e pey zot en serten larzan. Epi, menm si sa i posib – e nou swete ki i posib – si *Air Seychelles* i sorti enternasyonal i pou perdi son bann *Agreement* avek bann lezot laliny lavyasyon e i pou bezwen re negocye sa bann Lakor si i le rekonmans vol enternasyonal en zour. Sa proses i pran kantite letan e i pa otomatik.

Alor *Air Seychelles* i en dosye konplike. Si i ti fasil *obviously* i ti pou'n ganny rezourd depi lontan. Pou rezon ki mon'n fer sorti, mwan mon pa pou propoz en solisyon. Me nou a les sa pou lezot Manm diskite e pran pozisyon lo sa bann swa ki devan nou. Prezidan, parey mon'n dir, i demann nou Lasanble debat lo sa size.

Mwan mon ti ava kontan ki nou al pli lwen e pa selman debat sa size, me fer li lo en nivo bipartizan. Parey avek *COVID*, *Air Seychelles* i en size ki pa devret diviz nou dan sa Lasanble.

Mon lapel se ki sa Lasanble i koz avek en sel lavwa

e anvoy en sel pozisyon kot Gouvernman pou ed li dan son desizyon difisil lo sa size.

Mon swe, Mr Speaker, se ki nou pa tay avek sa size la dan sa 3 zour. Me ki Lasanble i ganny sans ekout diferan pozisyon bann *stakeholders* e fer en deba aprofondi lo sa size a en moman apropiye, menm si nou bezwen fer sa avan Bidze. E la ankor enn fwa mon zwenn *Leader* Lopozisyon dan sa lapel.

Permet mwan prezan, Mr Speaker, pou koz lo mon distrik, Les Mamelles. Me avan mon fer sa, mon pou profite pou dir detrwa mo lo lapar en Manm nou *Caucus* ki pa pou kapab avek nou pandan sa 3 zour. Onorab Desheila Bastienne i dan karantenn apre en vwayaz ki in bezwen fer an deor pei pou rezon lasante.

E parey nou kapab ekspekte, Onorab Bastienne i vremen dezapwente ki i pa kapab la pou fer son *maiden speech* dan sa 3 zour ki nou pou koz lo mesaz Prezidan. Alor avek ou permisyon, Mr Speaker, mon a dir detrwa mo lo son par.

Onorab Bastienne, parey nou kapab mazin, in fini ekri son diskour e in anvoy mwan sa diskour konplet, me kontrent letan pa permet mwan pou fer plis ki lir detrwa paragraf ki

mon'n swazir ladan. Onorab Bastienne i dire mon site :

“Ozordi mon fyer koman Premye *MNA* Elekte pou distrik Ile Perseverance, pou pas zot sa mesaz. Mon pare pou travay pou zot tou, pou ekout zot tou, pran kont zot sityasyon, zot bann konsern ek konplent and rod tou mwayen pou anmenn en solisyon, ki pou soulaz zot sityasyon o pli vit posibil”.

Onorab Bastienne i kontinyen, “parey Prezidan i dir, pou napa letan rode si ou ti siport mwan ou non. Fodre nou aret asize e kritike ouswa zis pas remark, me annou plito met lanmen ansanm, partaz lide, anmenn tou zenn, ek tou diferan laz ki pare pou leve e vin devan pou lanmour nou distrik e nou pei”.

Mr Speaker, Onorab Bastienne i kontinyen, “Letan nou get sityasyon Lakaz dan Perseverance, i kler ki lakaz ti pe ganny donneren baze lo afilyasyon politik.

Ler nou fer en letour dan Perseverance, nou dekouver ki bokou dimoun ki'n ganny lakaz, ozordi zot pa pe reste dan sa bann lakaz swa en lot fanmir ki ladan, ouswa zot pe senpleman lwe sa lakaz, kan lezot dimoun ki ti vremen bezwen en lakaz li i ankor lo

lalis espere, akòz son afilyasyon politik”.

(APPLAUSE)

HON BERNARD GEORGES

“Ozordi nou Gouvernman pe vin avek en nouvo stil” Onorab Bastienne i dir ; “Sesel pou tou son zanfan, kot ou afilyasyon politik pou napa plas, e i pa pou vin en baryer kot ou aplikasyon i konsernen”.

Onorab Bastienne i dir, “Mon pe sipliy avek Gouvernman pou aprouv ankor enn de *unit social Housing* dan Perseverance, e nou avar *allocate* sa bann lakaz avek dimoun ki la dan Perseverance an premye, soulaz sa ban *overcrowded houses*, avan nou al rod dimoun sorti dan bann lezot distrik.

Later dan Perseverance in tonm dan menm kategori, kot apre tou, lakaz ek later, i tonm anba sistenm pwen e sa in plito fer plis lenzistis e plis ditor.”

Onorab Bastienne i dir Mr Speaker, “Akoz ozordi i pe vwar dan Perseverance kot serten dimoun pa’n zanmen kontribye, me i dan en lakaz, e sa ki pe kontribye pou plis ki 10 an 15 an, i ankor lo lalis espere.

Ozordi si en dimoun in vin avek son larzan *cash* dan son

lanmen pou li aste en morso later pou li konstri en lakaz pou li ek son fanmir, zot dir li fodre i al lo lalis sistenm pwen.

Sa dimoun i annan son larzan, i le aste son later, les li,” (Onorab Bastienne i dir) “I a konstri son lakaz e en lot fanmir a ganny sa lakaz ki li i ti ladan en pe pli tar.

E sa i fer ki presyon i a ganny tire lo Gouvernman dan en lot fason. Letan (Onorab Bastienne i dir), “Mon pe koz lo later ek lakaz i fer mwan ariv lo sa pwen devlopman dan Perseverance.

Perseverance pa ankor fini devlop, lenfrastruktir napa. En bon *multi-purpose court* napa. En bazar napa. En Stasyon Lapolis konvenab napa. En Stasyon *Fire Brigade* napa. Pourtan tou sa bann keksoz ki mon’n mansyonnen, ti annan zot plas kot sakenn ti pou ganny fer plis ki 10an pase. E lalis i long Mr Speaker.

Ozordi (Onorab Bastienne i dir), “14 lakaz pe ganny servi pou bann biro nesaser, e plis ki 14 fanmir pe esper lakaz. Ki nou vwar, serten etranze, enkli serten Seselwa, in ganny pli zoli kare later dan Perseverance kot ti a kapab mont en bann *building* a sa moman.”

Atraver ou Mr Speaker, Onorab Bastienne i demande ki

Gouvernman in pran kontrol sa bann kare later, e les investiser serye ki annan zot finans e pare pou vin devan, e devlop sa bann kare later dan lentere zabitan Perseverance.

Onorab Bastienne i dir pa pou kapab terminen san tous nou bann zenn dan Perseverance.

« Mr Speaker, dan Perseverance i annan bokou zenn tre talante. Sa bann zenn i anvi vin devan e aport zot kontribisyon. Malerezman zot napa en lannwa pou rasanble. Sa bann ki pli avanse i pare pou ede anmas bann ki en pe pli feb e donn zot sa lankourazman pou kontinyen avanse.

Ozordi nou pe war bokou nou zenn pe al zwenn lezot group an deor Perseverance.

Mon krwar in ler pou nou ganny en sant ase gran ki ava ganny servi koman en lannwa rekreasyonnel pou tou kous nou popilasyon Perseverance ; - tel ki *Senior Citizen*, Lazenés, Kiltir, Spor, Lasosyasyon bann Dimoun ki pe viv avek en Dezabilite, akoz zot osi zot annan talan. »

Avan mon terminen Mr. Speaker, Onorab Bastienne i dir, “Lo non tou zabitan Ile Perseverance, mon ti a kontan dir en gran mersi a tou nou bann Minis pou sa travay nob ki

zot tou zot pe fer, sirtou dan sa klima tre difisil ki zot in tonm ladan.

Nou konnen ki avek tou zot determinasyon ek lanmour zot pou travay pou zot pei e zot pei pou sirmont tou difikilte e nou tou nou pou venker dan zot latas.

En pli gro mersi pou nou Prezidan, ki Bondye i donn li bokou lafors ek kouraz pou sa latas ki devan li.”

Onorab Bastienne i fini an dirzan, “Ansanm nou pou fer li. Mersi.”

(APPLAUSE)

HON BERNARD GEORGES

Mon retourn alor lo mon distrik, Les Mamelles, Mr Speaker. Mon oule o-depar remersye zabitan sa pli zoli distrik isi Sesel, e mon dir sa akoz i vre ...

(APPLAUSE)

HON BERNARD GEORGES

Mon oule remersye zabitan pou sa konfyans ki zot in met dan mwan, malgre tou sa ki serten ti dir lo mwan e menm ekri lo en bord obor semen pou tou dimoun vwar, e pou fer mwan sa gran loner pou anvoy mwan en katriyenm fwa vin reprezant zot isi dan sa Lasanble.

E loner i pli gran ankor Mr Speaker, akoz bann Manm *LDS* dan Lasanble in swazi zot *MNA* pou pran sarz sa *Caucus* e Zafer Gouvernman dan Lasanble.

Les mon profite pou remersye mon bann koleg pou sa loner ki zot in fer mwan, mersi bokou.

(APPLAUSE)

HON BERNARD GEORGES

ler an 2001 nou ti adopte nou *motto* ‘*Les Mamelles Forever*’ Mr Speaker nou ti konnen ki nou ti pe fer. Dan for mon leker, mon remersye zot ankor e mon la a zot servis, bann ki’n vot pou mwan e bann ki’n egzers zot drwa pou vot pou en lot kandida, parey mon’n fer pou sa dernyen 20an.

Mon mesaz a mon distrik i *mix*. Lo bon kote, mon annan lazwa en gran lazwa pou dir ki mon promes pou delivre lakaz ek *daycare* pou realize. *COVID* pou met nou en pe retar, me mon’n kapab zwenn avek Minis ansarz lakaz e Minis ansarz Devlopman Kominoter, e tou le de in promet donn nou distrik priyorite. Pa akoz mon *Leader* Gouvernman dan Lasanble, me akoz i nou tour e nou’n pasyante pandan ki lezot distrik in gannyen. Sa alor set en

rezon pou nou soulaze e pou annan lespwar.

Lo lot kote, mon bezwen zwenn Prezidan e koz lo sa sityasyon drog dan nou distrik. Zot in fatige vwar mwan pas dan bann gento e koz ek zot, sipliy ek zot pou pa kontinyen avek sa mannyer viv. Lo ron, dan laplenn e dan tol Plaisance, dan peron flat ek deryer *bus stop*, sa manni fodre arete.

Mon Clerk Paquina ek mwan, nou pou met an plas en program netwayaz nou distrik pou donn sa bann ki plifere pas zot letan fimen e pike, en lot fason pli meyer pou zot pas zot lazournen. Me zot osi zot bezwen fer zot par.

Mon konnen ki Gouvernman pe travay lo en program travay kominoter pou sa bann zenn. Alor si zot pa fer li volonter, zot pou mal pase. Prezidan in koz lo trafiker. Mwan mon prefere koz lo marmay. Sa se zot dernyen sans, silvouple ekout mwan. Parey mon ti dir zour lanterman Titin, e zot konnen ki mon pe dir, pa rode lekel ki’n anvoy gard kot zot ler zot ganny atrape. Se mwan ki pou’n anvoye !

Silvouple, ekout mon parol e pran zot responsabilite. *APDAR* in met en program *methadone* an plas e sa i byen.

E mon felisit bann ansyen adikt ki'n anbras sa program e ki pe fer en zefor pou zot refer zot lavi. Nou pou siport zot tou tou dilon zot semen.

Me bann ki refize, e ki ankor pe zwe dan bwat karton en bout vit e morso *foil*, gara zot! Zot letan pe fini. Silvouple, pa les nou distrik tonbe. Mon kont lo zot tou, akoz menm zot ki'n vot pou mwan, mon kont lo zot tou, silvouple fer en bon swa.

An konklizyon, Mr Speaker, mon retourn lo mon pwen depar. Mesaz Prezidan Vandredi pase sete enn avek bi fer nou pep konpran ki, akoz pandemi *COVID* ek defayans ekonomik ki sa in amenn dan nou pei, akoz sityasyon ki Gouvernman *LDS* i trouv nou pei ladan, nou pou bezwen adopte en nouvo fason viv e travay dezormen, kot laksan pou ganny mete lo travay dir lo lapar tou Seselwa, annan en sans responsabilite dan sa ki nou fer, koup gaspiyaz e koripsyon, met Lanasyon an premye e viv dan linite Nasyonal.

Sa se *roadmap* Gouvernman *LDS* pou sa letap ki devan nou. Se en sanzman ki sorti dan en landrwa kot Gouvernman i pran responsabilite pou tou dimoun

pou al dan enn kot sakenn pe ganny apele pou pran son responsabilite endividyèl.

Gouvernman li ava reste la selman pou sa ki pa kapab fer li. Prezidan pe demann en *retour aux sources*, parey *Français* i dir, kot nou pep a viv dan en sistenm travay dir, viv dan en bon vwazinaz e respekte tou dimoun, parey nou granmoun ti abitye fer.

Pei i annan li 4 defi prensipal a ler aktyel. Tou le 4 nou kapab dir se bann pandemi lo nou pei, e tou le 4 pou bezwen ganny atake ansanm.

Sa se *COVID*, drog, koripsyon e mank performans dan serten travayer servis piblik. Tou le 4 i annan en lefe negativ lo nou lekonomi. Se nek ler nou ava kapab met o defi sa 4 fleo, geri sa 4 pandemi, ki nou pei pou kapab atenn sa destinasyon ki Prezidan in met devan nou.

Pou ki sa i kapab arive, plizyer mezir difisil pou bezwen ganny pran, restriktirasyon, eliminasyon sa ki pa esansyel, redwir labi, koup sa ki nou pa kapab ou ki nou nepli kapab *afford*, parey program *FA4JR* e kekwfa *Air Seychelles*, ganny en serten sans.

Les ale sa ki pa anvi travay pou sa ladministrasyon, ouswa ki pe *undermine* Gouvernman.

Tir politik dan servis piblik, atak drog e koripsyon, me osi pou demann en sanzman mantalite dan sakenn parmi nou, kot nou retourn viv dan nou mwayen, onnetman e anba Lalwa.

Dan enn son *interview* resaman, Prezidan Ramkalawan ti reponn zournalis ki'n demann li si i pa regrete ki in vin o pouvwar a en moman difisil. E i ti dir ki i krwar ki sa ti son desten e in ariv ekspre.

Konman en dimoun ki'n pas sa dernyen 30an parey ou Mr Speaker akote Msye Ramkalawan, mon'n partaz son dezapwentman sak fwa ki in perdi eleksyon.

Nou ti konnen ki plizyer sa bann defet pa ti merite, me ki i ti'n perdi akoz mannev politik par parti o pouvwar. Me nou ti osi konnen ki kan ler ti pou apropriye, laviktwar ti pou arive. Parey in ekri dan levanzil, pandil Bondye i pa parey sa ki pou nou. Bondye i fer keksoz ariv dan son letan. *"In the fullness of time"*, parey St Paul i dir dan son let avek bann Galatyen. I fer sa dan son letan e non dan nou letan.

Ler nou regarde ozordi, i kler ki se sa moman Wavel Ramkalawan. In ganny prepare pandan 30an, non pa pou ariv

o pouvwar konman en rekonpans pou son lalit. Non!

Wavel Ramkalawan in ganny prepare pou pran pouvwar dan moman pli difisil ki Sesel pe eksperyanse. Akoz, avek tou respe pou bann lezot dirizan nou pei, se pa lot ki li ki, a sa moman, ki annan lafors karakter e leksperyans, pou pran bann desizyon difisil pou nou pei. Pou motiv nou pep pou sirmont sa bann difikilte, e amenn nou dan en landrwa kot nou pou pli for, pli rezilyan konman en pep. E pli byen kapab pou navig dan sa gro lanmer, ki lemonn an antye pou bezwen fer fas avek dan sa bann lannen ki pe vini.

Se alor Mr Speaker avek en gran lafyerte ki mon termin sa premye diskour konman *Leader of Government Business*, en lafyerte ki mon kapab dir ki Sesel i dan bon lanmen. Ki avek en konsey Minis dinamik, e en Gouvernman pare pou pran desizyon difisil, me neserer, avek sipor tou dimoun dan servis piblik e Seselwa an antye, Sesel anba *leadership* Wavel Ramkalawan i pou fer nou pas atraver larivyer e ariv lo lot kote konman en pep renouvle par nou prop zefor. E pare e kapab pou fer fas a tou bann defi.

Mon demann avek tou Manm Lasanble e tou Seselwa

pou koste, rekonsilye e donn tou nou sipor a nou Gouvernman dan linite en sel lespri e en sel aksyon! Mersi Mr Speaker.

(APPLAUSE)

MR SPEAKER

Mersi Onorab. A se moman nou a pran en poz, e nou a rebran travay e ller. Mersi.

(BREAK)

MR SPEAKER

Welcome back. Mon ava apel Onorab Clive Roucou. Onorab Clive Roucou pa dan lasal? *Ok*, mersi mon rekonnèt ou Onorab mon a pas ou laparol.

HON CLIVE ROUCOU

Mersi Mr Speaker. Bonzour Mr Speaker. Bonzour to Manm Onorab e bonzour tou dimoun ki a lekout dan lakour.

Mr Speaker avan mon komanse, mon anvì felisit Onorab Pillay pou sa zoli ladres ki in fer. Mon anvì demann Onorab si i ti pe ekout menm ladres ek nou Vandredi, aköz mon krwar i ti pe ekout en lot keksoz.

Mon osi atraver ou Mr Speaker demann Onorab Pillay si Parti *US* fek formen Vandredi? Mon'n tann li koz lo

enterfer dan Lenstitisyon Leta pa bon me i paret mwan i pa ti dan Parti *US*, Onorab les mwan *remind* ou Parti *US* sanmenm sa parti ki'n pli enterfer dan tou travay bann lenstitisyon!

(APPLAUSE)

HON CLIVE ROUCOU

In dir nou *advertise post CEO*, Onorab Pillay dan sa dernyen 43an depi Mr Rene ziska Mr Faure dir mwan kan zot ti *advertise* en kou? In vin avek bann gran, gran filozofi. Onorab Pillay pa anbet sa pep! Sa pep pa krwar dan zot.

Akoz le 25 Oktob ou'n war i annan en mazorite *LDS* dan Lasanble e Prezidan Ramkalawan i *State House*.

(APPLAUSE)

HON CLIVE ROUCOU

Mr Speaker alor pou mwan komanse mon anvì rapel sa Lasanble ki 2020 dan mon ladres pou *SONA* mon ti dir en keksoz, ki sa ladres 2020 pou dernyen ladres ki parti *US* pou fer dan sa Lasanble pou *SONA*. E nou *next* ladres *SONA* pou enn par Prezidan Ramkalawan li koman nou Prezidan e *LDS* ki pou dan Gouvernman.

Mr Speaker ki fer mwan pli fyer ankor se apre ki sa 2 *Leaders* in fer zot entervansyon, mwan mon premye Manm pou aport mon kontribisyon pou ladres par *Father* Ramkalawan nou Prezidan! Mon bezwen dir ankor, nou Prezidan! I enportan pou mon anvoy sa lapel menm pou nou bann Manm lo nou kote latab la.

Ki fer *US* konpran ki *Father* Wavel Ramkalawan ki Prezidan Sesel. Mon krwar Parti *US* pa ankor konpran. Mon krwar i annan Manm lo sa kote latab pa ankor konpran. Parti *US* mon pa konnen si la zot fek sanz zot non, pou apel Parti Kominike.

Akoz tou le semenn i annan en kominike. Lo tou keksoz i annan en kominike e parey Dokter i dir, si zot napa naryen pou fer, pa bezwen fer naryen! Si napa naryen pou dir, pa bezwen dir naryen! Atraver ou Mr Speaker Onorab Pillay si ou napa naryen pou ekrire, pa ekrire naryen! Pa bezwen gat letan *SBC* ki koman ou asiz devan ou televizyon ou war *US* kominike. Silvouple annou aret gat letan sa pei.

Mr Speaker ki mon'n konstate apre ki mon'n ekout *Father*, se ki zanmen dan sa Lasanble nou'n tann en vre ladres *SONA*. Sa in ganny fer

ziska Vandredi. Pandan tou sa lannen zanmen! Mon kapab dir ankor zanmen nou'n tann okenn Prezidan fer en bon ladres. En ladres ki'n ganny delivre avek pasyon, e konpasyon.

En ladres realistik, en ladres onnet e senser, en ladres ki nou dir laverite ki annan lonnekte ladan. En ladres ki donn en direksyon kler lo lavenir nou pei e byennet nou Nasyon. E problem ki nou pei pe pas ladan. Dan en dot mon en ladres ki kler.

Son ladres pa'n parey bann ladres oparavan, ki'n zis vin avek bann vye retorik politik parey pou Onorab Pillay, ki'n napa okenn direksyon. Zot bann ladres avan ti zis bann *piecemeal approach* lo ki mannyer zot pou sey fikse bann dega, bann dega ki zot in fer lo nou pei e nou Nasyon.

Mr Speaker pli gran konklizyon ki mon'n tire ler mon'n get *Father* Ramkalawan pe debout la devan, mon dir wi, nou'n ganny nou prop Martin Luther King. Nou prop Malcom X! Nou prop Nelson Mandela, nou prop Al Sharpton! Nou prop Levek Desmond Tutu, nou prop John Lewis. *Father* ou *good trouble* in pey fre!

Alor avek en rezilta dernyen eleksyon parey mon'n

dir avan ki'n anvoy nou dan Lasanble in montre ki sa gro nyaz lafreyer parey *Father* ti dir in ale. Kot Tonton Makout pa pou mars deryer personn ankor. Telefonn pa pou ganny *bug* ankor. Viktimizasyon politik pou en keksoz lepase.

Be ki'n arive Mr Speaker, lot kote latab zot lapo ki'n vin mens. Zis koman zot kontra pa ganny renouvle akoz zot move performans, move performans mon dir, zot kriy viktimizasyon politik. Les nou lo sa kote latab kriy viktimizasyon politik! Les mwan koz viktimizasyon politik. Zot pa konnen ki savedir sa.

Lo menm pwen Prezidan in kontinyen pou dir ki la demokrasi pou kontinyen ganny ranforsi dan nou pei, e ki lazwa de viv in retourn dan kominote kot vwazen antre vwazen i a viv byen. Tousala i ava ganny akonplir par bann bon valer.

Mon dir bann bon valer ki nou konman bann endividi nou prosede parey respe e savwar viv. Me Mr Speaker i regretab ki ler ki ou annan Manm Lasanble ki ganny konsidere koman bann *Leaders* dan nou pei pe konport zot, e fer bann malelve. Mank respe pou Prezidan, pe gognarde, pe fer tapaz, i fer mon realize akoz en

kantite zot in per direksyon kot zot krwar mal in vin byen.

Zot krwar met dife i *ok*. Zot krwar met kanmarad dan bwat i *ok*. Zot krwar met kanmarad dan goni i *ok*, trennen ziska *Airport*. Parler mon krwar lapriyer Marek pe pran plas.

Mr Speaker Prezidan Ramkalawan dan son ladres in fer bann pwen tre for lo size pandemik *COVID-19*. Me avan mon kontinyen Mr Speaker mon bezwen pran sa lokazyon pou felisit Minis Vidot ek tou mon bann koleg ners, dokter lab teknisyen, asistan ners e lezot dan sa travay difisil e sansib ki zot pe fer.

Me selman en remersiman spesyal pou bann travayer lab teknisyen ki travay ziska tar dan lannwit anmenn, fer bann tes ziska granmaten pou kontinyen donn nou bann *update* lo bann tes.

Alors mon pe fer en demann kler, fran pou Minis Vidot pou get dan zot *welfare* la avek nou bann lab teknisyen espesyalman ler zot fini travay tar dan lannwit e granmaten zot war zot pe retourn ankor 8er bomaten pou travay. Minis sey get dan zot *welfare* zot a kapab ganny en *resting day at least*. Zot vreman fatige.

Mon a osi remersi tou bann dimoun e lorganizasyon ki'n kontribye dan sa kont, kont COVID, ki Prezidan in pran li sa linisyativ pou kree. Zot donasyon in ganny byen apresye.

Mon bezwen osi dir en gran mersi pou tou bann pei ki'n ed nou avek nou vaksen koumsa ki Lepep Seselwa i ava ganny son vaksen enn fwa pour tou. E ki nou a kontinyen menm vin premye dan lemonn pou nou pep ganny vaksen.

Dan son ladres in demann Lepep Seselwa, Prezidan in demann Lepep Seselwa pou pa abes zot gard, pou pa krwar ki tou keksoz i *ok*, pou mazin zot prosen, zot kominote e zot pei. Wi, mon bann frer e ser Seselwa sel fason pou nou elimin sa viris se ki nou tou nou bezwen zwe nou par.

Lav nou lanmen, *sanitize* nou lanmen, met *mask*, pa groupe. Savedir ekout tou bann gidans ki Minister Lasante in met devan. Nou tou nou bezwen met nou lanmen ansanm pou defet sa viris.

Mr Speaker nou Prezidan avek Minis Radegonde pe kontinyen negosye pou nou ganny nou bann vaksen. Minis Vidot ek son tim pe planifye e enplimant mezir pou kontinyen defet sa viris.

Me ki nou war? Nou war 3 mousketer ki vin lo televizyon, ni en seval, ni en sab zot napa! Pe vin donn bann lenformasyon konfizan, bann lenformasyon ki pa fonde, mon pa konnen ki manner sa i apele. Nou pa per kritik, me nou bezwen ganny desizyon e alternativ si zot annan zanmen.

Alors Mr Speaker ankor enn fwa mon pa konnen ki manner i apele dan bann letan difisil koumsa, ler nou ganny bann lenformasyon konfizan. En boug ki pa ni konnen kan nou servi montosyel.

En boug ki'n *fail* nou program *methadone*! En boug ki pa kapab met lord dan son tim. Ler i pa lo *Committed Platinum* i kriye, ler i met li lo la dan son *interview* i dir i dan en pozisyon difisil pou li pran en desizyon. Me silvouple pran ou en desizyon! Enn ki'n bezwen kontinyen rann later apre ki in fer trik. Lepep Seselwa pe ekout zot e Lepep Seselwa pa krwar dan zot.

Mon bann frer ek ser Seselwa koman en ners, koman en dimoun medikal, Prezidan ek son bann Minis zot konnen ki zot pe fer. E mwan mon *advice* zot pou pran zot vaksen sa i pou zot benefis e benefis nou pei.

Si nou tou nou pran nou responsabilite, napa okenn *lockdown* ki nou pou bezwen al ladan. Nou bezwen pran nou responsabilite. Minis in dir, Dokter Gedeon in dir, Prezidan in dir, la mon osi mon dir silvouple, pran zot responsabilite!

Sa zafer zis *lockdown*, *lockdown* pa krwar ladan, aköz si nou pa pran nou responsabilite dan en fason ou en lot nou pou ganny afekte. Mon bann frer ek ser, pran zot responsabilite.

An kontinyasyon Prezidan in di ki dan sa plis ki 35milyon, pou osi ganny servi pou konstrir en sant izolasyon. Mon kontan ler Prezidan in dir sa aköz sa ti enn mon kestyon ki mon ti demande dan Sizyenm Lasanble, pou nou ganny en sant izolasyon, be ki nou ti tann dir, zis bann manrmoun.

La wi en Gouvernman ki serye e ki aksyonn lo bezwen nou pei. Sa pa parey sa Gouvernman *Mickey Mouse* ki apel *US*. Li menm li ki'n *fail* nou ou pei a tou pri. Mr Speaker be ki nou n trouve ler nou Prezidan i antre *State House? Shelf file* i vid! Kof larzan i vid! Garaz loto i vid! Mr Speaker gran mersi zot pa'n tir baro *State House* aköz ti pou napa.

Alor mon bann frer ek ser, mon bann frer ek ser la bann rezon aköz bann dimoun pa kapab met *trust* dan zot. Zot letan lespri pandan 43an in ganny anmorti, e zot pa pou sorti ladan.

Mr Speaker Prezidan in met en lanfaz for, pou asire ki Seselwa i vin premye pou antre dan okenn lanplwa, e ki laplikasyon pou *GOP* pou fodre ki i annan en diskisyon for avek Minister Lanplwa. E i ti azoute ki i annan tro bokou etranze dan nou pei ki pe epwiz tou nou pti Dolar ki reste.

Koman en nasyon nou konnen ki dan en fason, ou en lot nou bezwen serten group dimoun, serten spesyalizasyon, dan serten domenn par egzanz dan lasante, ledikasyon nou bezwen sa bann mendev.

Me dan lot kote i annan ase travay pou tou Seselwa. Mon redir ankor i annan ase travay pou tou Seselwa. Premyerman mon pe enplor nou bann zenn pou pran zot letid o serye, ki nou ava kapab ranplas sa bann travayer etranze dan serten sa bann pozisyon.

Dezyenmman mon pe demann tou Seselwa ki pa travay zis aköz la pares in pran plas, silvouple mon bann frer ek ser leve, leve al travay. Asize

obor semen pa met manze lo latab! Parey mon manman ti toultan dir mwan, dir nou dan lakour fodre nou mize pou nou manze. Silvouple al travay.

Prezidan osi in dir kot i annan to bokou manboulouk ki'n ganny zwe avek sa zafer *GOP*. Etranze in ganny anploye *left, right and center*. E dan kantite fwa nou'n war etranze kot pe dray labous Seselwa. Mr Speaker mon dir sa akoz mon konnen.

En landrwa ki mon'n koz plis dan Sizyenm Lasanble se kot *bio medical engineer* kot Minister Lasante. Laba nou annan en *management Sri Lankan* kot i dray lapo labous Seselwa. Petisyon in ganny fer, konplent in ganny fer, pa'n ganny abouti dan naryen.

Seselwa in ganny trete enferyerman. Zot travay pa ganny valorize. La kot bann elektrisyen i baze i fer lapenn, ni en *toilet* napa. Alors zis mazine ler lanatir i kriye ki mannyer ki zot fer.

Alors mon pe enplor Minis Lasante, pou war sa sityasyon li menm, li menm akoz menm i annan konplent ki'n ganny fer naryen pa'n ganny fer. Ankor enn fwa mon pou zwenn *Father* pou demann nou frer ek ser Seselwa pou sanz zot latitud. E ki fodre zot travay e travay dir

pou zot byennet e byennet nou pei.

Prenon kont problemn ekonomik ki nou pei i ladan. Mon fatige tande ki Seselwa i pares. Mwan osi mon senserman krwar ki nou pep i en pep travayan. E nou kapab fer li. Mon osi konnen ki si nou pep in ariv dan sa sityasyon, se akoz Gouvernman lepase ki'n fer zot krwar ki i kapab okip zot *from cradle to grave*.

Ladministrasyon avan in fer zot krwar ki sel landrwa travay se lasanm limero 10 *Ocean Gate House*. Mon bann frer ek ser, lanmizik in tennyen, bal in terminen! Frer ek ser annou sorti dan sa rev, nou bezwen travay, travay for ziska ki transpirasyon i tas nou figir, koumsa nou ava fyer pou rekolte sa ki nou'n senmen.

Mr Speaker Prezidan in koz lo en Gouvernman efikas, Mr Speaker Prezidan in met en laksan tre for ankor pour ki i annan efikasite dan servis piblik e kot napa gaspiyaz. E i ti donn detrwa legzanp parey transpor, *air condition* ki reste on, telefonn ki ganny donn bal lo la eksetera. Lo sa pwen in met en lanfaz pour ki pa devret annan okenn politik dan servis piblik.

Me Mr Speaker sa i en keksoz ki reel, tro bokou fwa

nou war transpor Gouvernman pe zis roule kan zot pa devret, e menm bann kours prive pe ganny fer. Alor in annan en labi total lo transpor Gouvernman ki mon senserman krwar ki fodre met en *stop* avek o pli vit posib. Akoz tousala i larzan *tax* i larzan sa pep.

Telefonn i ganny abize pou plizyer Milyon, R1000 kot *lame duck excuses* i ganny donner, mon'n asiz lo la, depi kan? Tousala pa kapab ganny tolere ankor anba Ladministrasyon Gouvernman *LDS* pou napa plas pou sa bann kalite labi, lo pwen politik dan travay e lefikasite dan servis piblik i 2 pwen tre enportan. Lo sa pwen mon vremen annan plis kestyon ki larepons.

Me avan ki, mon kontinyen mon pa oule personn ganny mon mal akoz pou mwan sa i la realite. Akoz pwen politik e lefikasite dan travay i de keksoz ki mars tre byen ansanm e zot mars ansanm.

Pou mwan tou sa ki pa'n marse anba Gouvernman *US* ek bann menm group dimoun ek menm latitud, pa pou marse! En Gouvernman *LDS* i kapab fer tou son mye donn sans apre sans, pa pou marse. Sa bann kalite mantalite i dan zot *DNA*.

Alors ler mon dir sa Mr Speaker mon mazin en parol ki

mon'n dir bokou dan sa Lasanble. En parol ki mon granpapa ti dir e la mon pou dir sa pou mon Gouvernman, "En bon serpan se en serpan mor!" Annou pa krwar dan sa bann dimoun. Nou zis pa kapab annan dimoun avek bann move lentansyon ki asire ki Gouvernman pou *fail* e nou krwar ki en zour sa bann dimoun pou fer byen.

Mon bann frer ek ser non zot pa pou fer byen. Sa bann menm dimoun pe ede met sa Gouvernman lo son zenou. Mr Speaker ler *Father* Ramkalawan i anvoy son lanmen pou donn zot en ponnyendmen, zot sey koup son ponnyen. Alors ki mannyer pou kapab krwar sa bann dimoun pou fer byen?

Mr Speaker Prezidan in koz lo size drog, pou mwan sa i en keksoz ki vremen pros ek mon leker. Mon fatigue war mon bann frer ek ser dan en bann leta ki enpitwayab. Mon fatigue war mon bann koleg kekfwa ki mon'n lekol avek, ozordi mon war zot obor semen pe mandyan.

Prezidan in ler enn fwa pou tou, pou nou pa pran pitye pou sa bann dimoun ki kontinyen anpwazonn nou bann frer ek ser. I fer lapenn pou nou war bann *zombie* obor semen partou kote. Mon asire ki

avek ou grander lespri ou pou kapab fer li. Enn fwa pour tou, tou sa bann gran eskobar i zanmen nou'n kapab met zot ater, enn fwa pour tou Prezidan nou bezwen met zot ater!

Mr Speaker pour konklir. Sesel i nou pei, nou ki bezwen pe okip li, si nou, nou pe okip li, lekel ki pou fer? Nou menm koman frer ek ser Seselwa, nou tou nou bezwen rekonnèt sa travay enkrwayab ki Prezidan Ramkalawan in fer dan sa apepre 90zour. Mon demann mon lekor zis en kestyon. Si *Father* ti'n pran sa pei dan en lot letan kot ti pli stab ki zistans nou ti pou'n ete dan sa 90zour?

Mon bann frer ek ser nou tou nou la pou war ki probableman sa ki Prezidan Ramkalawan in fer pandan a 90 zour pandan sa 43an mon demande si nou ti met sa lo en etap minit nou ti ava war ki kantite i ti pou'n akonpli.

E pou Lepep Seselwa frer ek ser nou bezwen travay pou ed nou lekor, nou bezwen travay pou ed nou pei an zeneral. E nou tou lo sa later Sesel annou met lanmen ansanm pou nou kapab defet sa pandemik COVID-19.

E alor Prezidan Ramkalawan ou garanti mon sipor senser, touzour. E mwan mon pa pou zanmen les tonbe!

Pou fini mon demann Bondye pou beni nou pei. Mersi.

(APPLAUSE)

MR SPEAKER

Mersi Onorab. Mon apel Onorab Chantal Ghislain.

HON CHANTAL GHISLAIN

Mersi Mr Speaker. Bonzour tou dimoun. Mr Speaker mon en pti pe dezapwente bomaten la, akoz letan nou pe pres lape, e an menm tan nou pe koz en bon serpan i en serpan mor. *And* i zis montre ou ki sa pep kontinyelman pa pou zanmen ini. Mr Speaker koman en patriyot mon ankor annan konfyans ...

MR SPEAKER

Onorab eskiz mwan Onorab. Eski ou annan ou mas? Mersi.

HON CHANTAL GHISLAIN

Mr Speaker mon pa pe kapab koz dan mas akoz letan mon koze mon met mon linet i anvoy ler dan mon sa ... mon pa pe kapab. Apre mon touse bokou. Les mwan koze apre mon ava re mete. Permet mwan silvouple?

MR SPEAKER

Ok, mersi. Ale.

HON CHANTAL GHISLAIN

Mr Speaker koman en patriyot mon ankor annan konfyans dan mon zoli pei Sesel. Mon ankor krwar ki mon pe viv dan enn bann pli zoli pei o monn. Pe enport kantite difikilte ki nou fer avek, Sesel i touzour reste zoli, e i touzour reste en pei beni. E son pli gran benediksyon se tou son bann zanfan.

Sak fanm e zonm ki leve bomaten pou al travay, pou kontribye dan larises sa pei i en benediksyon. Menm si nou granparan ki'n konstri *State House, Domus*, ki'n swa fermye, labourer, sarpantye, menwizye ou menm ferblantye.

Menm si zot ti bezwen leve 4er bomaten, menm avan 4er bomaten avan ki soley i pet montanny, eski en tel trimouse ziska tar dan lannwit zot ti bann benediksyon pou Sesel. Alors koman en patriyot, koman en Seselwaz mon refize aksepte ki ozordi ki sa menm Sesel ki'n bers nou e met nou kot sakenn de nou i ete ozordi, mon refize aksepte ki sa Sesel i ozordi en kales kase.

(APPLAUSE)

HON CHANTAL GHISLAIN

Mr Speaker mon refize aksepte sa senpleman akoz en kales i roul lo zis 2 ouswa 4 larou, e i

ganny trennen par seval. Dekrir mon pei koman en kales, e pli move enn ki'n kase zot pe senpleman dir nou ki tou zanfan Sesel ki'n travay e ki ankor pe travay, zot ti senpleman bann seval ki ti pe trenn en kales.

E ki tou sa profesyonnel ouswa bann lezot travayer dan Gouvernman e ki ankor la pe travay dan Gouvernman, ti senpleman bann seval e ki zot kouraz pa'n vo okenn penn. Si malgre tou leta nou pei Sesel pe senpleman ganny dekrir koman en kales kase. Bokou dimoun in annan rezon ankoler.

Sote, pile, me larealite fas devan nou, se ki o kour sa 43 an lavi sa Nasyon Seselwa in eleve sorti lapovrete ekstrenm pou ariv a sa standar ki i ete ozordi. Seselwa ti nepli bezwen al mandyan okenn latet zonnyon, morso delwil, oubyen en priis disel kot son vwazen. Me sa pa'n zanmen anpes son vwazen la koman maler i frape.

Mr Speaker kontan pa kontan, me lefe i reste se ki sa kantite zefors e resours ki ansanm nou'n mete dan nou pei e dan nou dimoun in fer ki Sesel in ariv e oter devlopman, ki'n touzour depas lekspektasyon bann pli gran pei o monn.

Nou bezwen alors kontinyen *remind* nou Seselwa ki se selman perseverans, pasyans ek determinasyon, ki pou ed nou bouz devan, menm dan moman pli difisil.

Seselwa i bezwen kontinyelman ganny enspire ki nou kapab fer pli byen. E non pa ganny dekouraze par menas. Ki i kapab perdi son travay, ouswa ki son kontra pa pou kapab ganny renouvle.

Mr Speaker in annan en kantite lezot keksoz ki nou kapab retire avek sa pandemi. En bann moman ki bann paran in pase kot lakour in trouv sa tre byen.

In en moman kot bokou in retrouv sa bout dan nou koman bann Kreol, e sa se nou lanmour pou lakwizin, lanmour pou patisri e lanmour pou zardinaz. Ki mannyer nou kontinyen enspir dimoun pour ki malgre zot dan lanplwa, sa ki zot deza pe fer san lakour i devret kontinyen. Petet i kapab menm vin koman en reveni adisyonnèl pour lakour.

Se sa kot lankourazman ki nou bann Seselwa i devret pe ganny ankouraze ozordi. Ouswa menm servi sa koman en mwayen pou esanze. Si mon vwazen in plant bannann e mwan mon a plant zavoka, e en

lot i ava plant piman, e lot i a plant leti.

Se la ki vre lesanz i a komanse. E non, pa zis mwan ki plante e lezot zis i vin anpar lanmen pou vin demann keksoz. Nou en pep e kominote ranpli avek inovasyon, e mon konnen nou kapab fer bokou pli byen ki sa.

I soka pou realice, ki nou a bann aki ki koman en pep nou'n depans sitan zefors personnel ouswa kolektiv pou akimil larises pou nou pei, e menm nou lekor pou zis dan en klendey i komans diminyen ler *COVID-19* ti debark Sesel.

Me i osi fer nou realize ki i pli fasil pou detri ki konstrir. E ki fas a okenn kriz Nasyonal ouswa enternasyonal ki afekte pou laspe lavi imen, Gouvernman i bezwen sipor e korperasyon tou dimoun si i anvi reisi pou konbat sa kriz.

Me nou pa devret komans triye lekel ki la, lekel ki pa pou la. E se la kot linite i rantre. Bann zwe blanmen, menas pa pou anmenn nou okenn par. E nou pa pou zanmen bouze ouswa menm rekonsilye koman en pei, e pli move ini sa pep. Nou ti'n pourtan ganny *warn* a plizyer repriz lannen pase lo sa difikilte ki nou pei pe fer fas avek.

Prezidan Faure ti ganny bokou kritike lo koz *COVID*, *COVID* e *COVID*. Sa lapel sete ki nou tou nou koste ansanm e nou trouv solisyon pou sa sityasyon lasante piblik e ansanm *tackle* nou problem ek difikilte ekonomik i ansanm konstrir nou pei, reorganiz nou sektè piblik, pou fer li vin pli efikas e amelyor *service delivery* dan bann biro e Lazans Gouvernman.

Lapel pou travay ansanm pou sirmont bann divizyon ki'n kalsinen antre nou, e finalman rekonsilye sa pep. Me i malere ki ziska ozordi e pli enportan dan premye mesaz lo Leta Lanasyon ler in fer lapel pou linite, me avek menm vilger dir keksoz ki demoraliz sa pep e fer li vin difisil pou inifye.

Gran lantrener e zwer *American football* Paul Bryant i dir ki, ” *In order to have a winner the team must have a feeling of unity. Every player must put the team first ahead of personal glory.* ” En vre *Leader* li ankouraz e promote e kiltiv linite, pa kapab kontinyelman swazir pou met lanfaz lo lefet ki son ladministrasyon, in erit problem. E swazir pou inyor bann bon keksoz ki'n arive dan sa pei. E bann bon keksoz ki administrasyon presedan in

reisi fer. Sa i pou kontinyen diviz pei.

Mr Speaker mon annan konfyans ki nou tou ansanm nou pou sezi sa loportinite pou sirmont tou sa bann defi lasante, si selman nou bann dirizan i aprann ekoute aprann sirtou ekout lopinyon ki diferan avek sa ki pou zot. Nou kapab koman en imen e en pep annan tou nou defo. Me nou annan nou bann bon kote osi.

Nou annan bann bon valer ki nou paran in enkilke dan nou depi byen lontan. Dir bonzour nou prosen nou solider avek nou dimoun dan nou kominote kan i annan maler. Sa i ankor egziste dan nou pei. E nou osi annan nou lidantite e lafyerte Kreol aköz apre tou se sa ki'n fer nou Seselwa.

Me fodre ki Gouvernman i osi aksepte, ki i bezwen sakenn de nou pou fer li reisir. Fodre i aksepte ki dan sa moman kriz i annan e pou annan bokou plis dimoun ki pou bezwen led, ki pou bezwen konpasyon. E ki pou bezwen pa zis en latet zonnyon ouswa en morso delwil ek en pense disel kot son vwazen. Me vre led pour li kapab kontinyen sirviv e plas en repa lo latab pou li e pour son zanfan, omwen de fwa par zour tou le zour ziska ki sityasyon ekonomik pei i sanze.

Aret donn li lasistans sosyal ouswa aret donn li lasistans pou li pey son lakaz la dan sa moman, pa pou ed li ditou. O kontrè i pou agrav son sityasyon. La i moman pou nou pli solider avek sa ki pli feb, ouswa les mon a dir sa ki trouv li dan difikilte. E non pa regard zis sa ki annan plis mwayen pou sirviv sa kriz.

Plis ki zanmen sa ki ti zanmen trouv li oparavan pe vin rod lasistans, akòz i ti kapab viv san lasistans adisyonnèl, ozordi se bokou sa bann menm dimoun ki pou kapab nou pe vwar zot pe bezwen lasistans, pou kontinyen fer sa de bout zwenn.

COVID i devret fer Gouvernman realize osi, ki si vreman senser e annan konsiderasyon e konpasyon pa zis pou sa ki annan, me sirtou sa ki pli bezwen. Nou refize donn li en lasistans R1500 pou ed li pey son lakaz, me selman n ou pe kontinyen asiste Minis, Ziz e lezot avek R25000 ou plis pou zot lwe lakaz. Oli egalite ladan?

Nou listwar in montre nou ki nou sorti dan en sistenm inegalite, kot sa ki ti annan ti touzour annan e sa ki napa ti touzour napa. Kot ou kouler lapo ti desid ou lavenir, me apre lendepandans ouswa apre 1977

nou'n kree en sistenm pi zis avek plis egalite loportinite pou Seselwa.

Nou tou nou ti kapab al dan menm lekòl, al dan menm lopital e asiz lo nenport ban dan legliz. Annan larzan ouswa napa larzan, ou kouler lapo ouswa seve, e ni menm ki kalite fanmir ki ou ti sorti ladan pa ti pou decide si ou ti pou ganny lekòl ouswa non, si ou pou ganny labours ouswa non.

Ouswa dan ki klas dan maternite ou ti pou al ganny baba. Enn fwa pour tou Seselwa ti ganny son dignite koman en Seselwa, konn son idantite koman en Kreol par kritik avek lakoler ek lannen endirekteman ou pe gard sa Nasyon e son pep divize.

Par menas son gannypen ensi ki zot bouse manze, ou pe divize. Akòz sak zonn ek fanm ki travay, i annan en fanmir e mazinèn ki disan i pli epe ki delo.

En fanmir ki kapab divize lo son lopinyon politik, be ler i ariv menas pou enn son pros, zot bliye ki parti politik zot sorti ladan. E finalman en sitwayen sa pei i kapab pe santi li entimide e menase, si i pa kapab annan li en lopinyon ki diferan.

Mr Speaker gran filozof Grek *Socrates* i dir ou, "*The*

secret of change is to focus on all your energy, not on fighting the old but on building the new.” Mon'n osi enkli sa sitasyon dan mon repons senpleman, akòz sa ki'n arive e ki pe kontinyelman arive dan nou pei sa dernyen 3 mwan.

Seselwa ti koze an Oktob 2020. Ozordi nou vwar n ou fas avek menm Sesel. E parey mon'n deza dir oparavan e mon repete ozordi, se ki malgre tou lobstak, nou pou ede pou fer nou pei avanse. Nou tou nou anvi trouv solisyon, solisyon pou ou pei, solisyon pou nou pep, solisyon pou nou zanfan.

E ki nou tou nou posed bann bon lentansyon, me nou bezwen kontinyen touzour annan bann kouraz, lafors e disiplin pou kontinyen san annan okenn dout ouswa lafreyer. Kontinyen fer sa ki byen pou lezot e kontinyen travay pou byennet tou dimoun.

I pou ankouraz, i pou an disiplin e i pou en lafors moral eksepsyonnèl pou en zonn, azir koman en vre zonn letan i pas avek adversite. Alor si Seselwa in koze, kan alors eski nou pou deside met ou diferans dekote pou kontinyen ansanm travay pou sa Sesel?

Nou pa kapab esey inifye en pep me an menm tan reziste

ouswa lager ek sa ki nou pa kontan? E ki parey delo ki sorti dan montanny e ki esey trouv son semen dan bann ros, rasin dibwa e okenn debri, nou devret nou osi san konfrontasyon esey rod en meyer semen ver sa nouvo Sesel.

Nou devret fer sa par onor sa semen ek tou son bann lobstak koman en parti tre enportan sa voyaz. Me sa ki nou vwar ozordi, se ki regar e latansyon in ganny fikse lo zis sa bann debri e lobstak dan semen, san pran kont bann bon keksoz ouswa sakrifis lezot.

In ariv ler pou met de kote politik partizan e lenterè personnel pou nou fer sa ki byen e bon pour tou Seselwa. E les mon a dir ki lafors en Nasyon i touzour reste dan lanmen sakenn de nou ver en menm bi.

Mr Speaker fas a sa pandemi, mon oule profite pou salye kouraz nou bann dimoun dan lasante. Mon santi mwan afekte akòz mon osi mon annan Manm fanmir pros, ki pe travay koman bann *frontliners*. Mon gratitud fonon i al pour zot tou. Zot in montre konpasyon e fer bokou sakrifis. Zot in donn nou kouraz dan bann moman kot nou ti'n dezapwente, parey nou osi nou pe donn zot kouraz. E mon konnen ozordi plis ki

zanmen zot war zot dan bann sityasyon byen difisil.

Akoz ozordi zot menm koman bann *carers* ki ti sipoze pe *care* pou nou, zot osi zot pe ganny afekte. Zot in en gro sakrifis zot profesyonnel lasante e lavi pou ede sov lezot. Se zot bann vre ero, Sesel ozordi. E pour sa mon dir zot en gro mersi.

Mr Speaker manda i priyorite Minister Lasante se lasante e lavi sakenn nou frer e ser Seselwa e non pa lekonomi. Foutkwa en pei avek en *booming* lekonomi, si lavi son pep i an danze e sa pep pa pe kapab rezouir sa larises, si i malad ouswa i mor.

Aprè tou nou manze pou viv e nou pa viv pou nou manze. Lavi i enn menm, e lavi ki perdi i perdi pour touzour. E mon senserman krwar ki si sa bann mezir ti'n ganny pran depi lanons premye ka transmisyon kominoter, ozordi Sesel pa ti pou'n zanmen rikord sa kantite dimoun enfekte dan kominote.

Zot kapab difere avek mwan, me sa i reste mon lopinyon personnel. E ki *by now* tou sa ki ti'n devret ganny ranmase, ti ava'n fini ganny ranmase, e lavi ti ava'n preski retourn normal.

Lavi e lasante i devret touzour reste priyorite par lao

tou lezot konsiderasyon. Parfwa semen ki kourt e rezilta i kapab katastrofik. Aret zwe ek lavi ek lasante pep Seselwa.

Mr Speaker mon oule osi profite sa moman, pou remersye tou bann pei zanmi ki'n touzour pare pou kontinyen siport Sesel dan zot bann moman difisil. Sa lanmitye korperasyon ki'n la pandan sa dernyen 43an, ti fonde lo sa bann bon relasyon ki Gouvernman avek, avan in kontinyelman kiltive.

E mon swete ki nou pei i kontinyen gard son lendependans. E malgre mon patriyotizm, demann Gouvernman Sinwan 60mil *PCR test kits* pou nou kapab teste popilasyon antye ti pou fer plis sans dan sa moman ki nou ladan olye 60mil paviyon ki li i ti kapab vin pli tar.

Mr Speaker leta nou nasyon dan sa moman ranpli avek lensertitid e defi i permet mwan adres sa size proteksyon konsonmater. Ozordi plis ki zanmen nou bezwen protez nou bann konsonmater. Nou bezwen a tou pri asire ki konsonmater i ganny proteze e ganny byen edike lo zot drwa.

Pandan ki lendistri *ecommerce* ouswa komers atraver *internet* pe gradyelman devlope, e pour bann ki pa tro

vreman doue ouswa menm abil dan fer sa bann kalite tranzaksyon, zot ganny ekspeze avek en kantite risk asosye avek sekirite zot bann lenformasyon prive.

E lefet ki marsandiz pou gradyelman vin nouvo normal dan domenn komers ant magazen ek konsonmater, kot fer vini marsandiz sorti deor pou rantre Sesel pa pou zis leka, me lokalman dimoun i kapab pe gradyelman pe koup sa nesosite al fer bann gran laliny kot magazen, pou aste zot bann nesosite debaz, tel ki manze e keksoz komodite le mwan.

Kot dan sekirite ou lakour ou kapab pe *order*, e pey sa bann marsandiz atraver *internet* i pou nesoser pou tre byento pas bann Lalwa ki protez sa bann kalite konsonmater, ki deside swazir sa bann fason pou aste zot bann komodite le mwan.

Gradyelman bann gran laliny devan labank, plizyer magazen e *supermarket*, i devret redwir si pa vin en zafer lepase. An sa ki konsern ledikasyon Mr Speaker, depi lannen pase o kour premye *lockdown* nou'n vwar bokou defi an se ki konsern laprantisaz modern ouswa lansennyman

atraver *internet*. E ziska ozordi i ankor parey si pa pli move.

Bokou zanfan in ganny kit deryer, senpleman akoz pa tou ki'n kapab ganny sifizaman akse avek laprantisaz vertyel. Pou bokou paran, zis pour ganny akse e kapab pey *data* pou zot zanfan in en problem. E la avek plis paran ki pe trouv zot san en lanplwa zot pou trouv zot dan plis difikilte ankor.

Mon ti ava'n voudre antann en prononsman lo sa size kreasyon sa bon *platform* pou laprantisaz e lansennyman vertyel, e ki fason tou zanfan Sesel zot kapab ganny akse avek fasilman. Nou bann zanfan ozordi zot in ne dan en letan kot preski tou keksoz i nimerik ouswa *digital*.

Parey nou tou nou pli familye avek. Depi pti zanfan i kapab fasilman e zot vreman doue dan manipil preski tou sa bann *gadget* nimerik koman zot 10 ledwa. Menm *password* lo ou telefonn ouswa *WiFi* zanfan i konn *hack* konmela. Moman in arive pour servi talan sa bann zanfan dan domenn nimerik pou devlop kapasite nou lafors travayer.

Mr Speaker mon pa pou kapab termin mon lentervansyon lo Leta Lanasyon Seselwa si mon pa koz lo sa

zafer *incitement*. Mon pa pe konpran akòz lev sa pandan moman pli presize pou en Prezidan adres son pep e lafason ki i pe ganny adrese ou a krwar i pe menas dimoun pou aret koze, pou aret kritike, pou aret ekrir e aret sante.

E fodre fer remarke ozordi ki plis ki zanmen, dimoun avek divers lopinyon politik i koze e ekrir nenport kwa konmela. Mon ti ava'n prefere i koz lo lensilt ki nou prop ser ek frer Seselwa i anvoy lo sakenn de nou. Pli move en fanm maltret en lot fanm ensilte li pli ba ki later san mazin lefe ki sa i annan lo son zanfan.

Tou resaman bokou nou ti pe partaz sa moman ki ti'n frisonn bokou nouvo Vis-Prezidan lanmerik Kamala Harris e ansyen *First Lady* Michel Obama ler zot ti lesanz en *fist bump* an dizan mon siport ou '*you win, we all win.*'

I telman fasil partaz bann keksoz koumsa lo bann gran personnaz enternasyonal, kan nou antre nou menm prop fanm e ser Seselwa, nou pa kapab siporte. Nou kapab difere lo sa ki en fanm i dir, atak e fer komanter lo sa ki sa ganny i dir me nou pa kapab atak li personnel ler nou nepli annan largiman.

Sa i mal e mon santi Prezidan ti merit fer li son priyorite pou adres sa size latak personnel, olye esey anpes dimoun eksprim son lopinyon. Nou'n vwar legzanp avek '*DANNY OUT!*' En sef zis ki parey Mathilda Twomey. I fer onte. Sa in fer ki sa madanm in bezwen menm dezart son Lakour zis akòz zot bann menas ensinifyan.

Sa ki apel *incitement*. Ensilte li. E kot en dimoun ti menm al ziska kras avek sa madanm anvil. Sa ki *incitement*.

"Sa ki mon pou fer ek ou!"

"Zot pou konnen zot menm!" Sa i osi *incitement*. Non pa en kritik ki en dimoun i fer lo en size ki pe afekte li e son fanmir.

Frer e ser Seselwa, ozordi plis ki zanmen sakenn de nou, nou bezwen fer en legzanmen konsyans. E realize ki nou tou nou Seselwa en pep, en nasyon ki pe viv e pou kontinyelman viv obor kanmarad pou plizyer lannen ankor.

E ki nou pou otomatikman bezwen annan lanmour pou kanmarad, e viv dan lape olye kiltiv laenn, revanz e rankin kont kanmarad. *United Seychelles* in en parti responsab ki senser ek linite ek stabilite nou pei. Sa pei ki nou tou nou kontan e sa pei ki pou

kontinyen bers nou ziska nou kit sa later.

E a sa pwen les mwan, les mon *remind* Onorab Georges ki apard anmenn Mosyon pou eksprim zot lannen pase, *LDS* osi ti fer en Konferans Lapres zot osi pou adres plizyer size ouswa reponn e anmenn zot kontribisyon lo bann keksoz ki zot pa'n kontan.

Si *United Seychelles* in fer, nou pe senpleman egzers nou drwa anba Lalwa Siprenm nou pei nou Konstitisyon. Sa i apel demokrasi e non pa *incitement*.

Mr Speaker bokou nou in sakrifye bokou okour sa dernyen 11mwan ki *COVID* in atak nou pei me nou napa swa nou kontinyen travay ansanm e fer plis ankor.

En kantite dimoun i enkyet non selman pou son lasante, me osi enkyet pou zot lavi toulezour rediksyon sibstansyel dan zot *savings* ouswa sa de pti kas ki zot in met dekote, an rezilta logmantasyon dan pri lavi, perd dan zot reveni le mwan, an rezilta perdi zot travay.

Se sa ki nou pa'n tann adrese, ki manner Gouvernman pou ed son pep sirmont sa bann problemm avek defi fas a nouvo normal. Mon lapel senser avek sakenn de

nou se annou pran swen avek kanmarad. Mersi Mr Speaker.

(APPLAUSE)

MR SPEAKER

Mersi Onorab. Mon apel Onorab Phillip Arissol.

HON PHILLIP ARISSOL

Mersi Mr Speaker. Mr Speaker mon pou demann ou permisyon pou mon retir mon mas silvouple.

MR SPEAKER

Wi mon konpran sa problemm Onorab.

HON PHILLIP ARISSOL

Bonzour Mr Speaker. Bonzour tou koleg Onorab e bann dimoun ki pe ekout nou spesyalman bann zabitan Anse Boileau.

Mr Speaker ler mon pe koz lo Leta Lanasyon la an 2021, pou mwan i en lemosyon melanze. En kote mon zwaye ki anfen apre 43an Sesel e Seselwa in ganny son premye Prezidan elekte par Lepep Seselwa e sa se Prezidan Wavel Ramkalawan.

Sa in anmenn en zwa de viv e kot ou pase ou war lo figir zabitan kot i nepli annan presyon, i nepli annan lafreyer. Seselwa i lib pou koze, i lib pou

asosye e sa lavi, e sa i vreman enteresan. Pou enn fwa i annan en sans solidarite e patriyotik parmi tou pep Seselwa.

Lo en lot kote Mr Speaker mon tris, pou war ki Prezidan Ramkalawan in erit en pei avek en ta problem tel, ki drog ki pe afekte nou zenn zonn e zenn fanm. 40poursan nou popilasyon pe viv dan lapovrete. Koripsyon i preski partou. An plis ki sa *COVID* i pe met plis fardo ankor.

Lo en lot kote mon osi vreman ankoler e dezapwente, ler mon realize la fason ki Sesel e son pep in ganny anbete e vole. \$50milyon in disparet dan kof, person pa konnen oli.

Me i annan ki ler ti vini ti annan tre pe de sou, me ler zot in ale sa kont Roupie ki zot in akimile i soka. In osi annan ki'n vin touni, ler zot in ale zot pos in plen. Zot bann dalon osi tou parey pos i plen.

Me pou lamazorite Seselwa, nou ki ti ganny demande pou ser sang aköz pei ti dan problem, pandan tou sa letan nou'n sere menm sang, e la kan pei i vreman dan problem, nou pa war en sou, ni en kas.

Tou larzan in ganny partaze ek bann dalon e partaze pandan kanpanye eleksyon. E la tou blanm pe ganny mete lo

COVID. Sa bann dimoun ki zot pos i plen ni enn ou pa war.

Le 5 Zen 1977 Parti *SPUP/ SPPF/ Lepep*, ozordi *US* ti pran pei par lafors. An dizan ki sa ti neserer. Dapre zot Seselwa ti pe viv dan lamizer, e zot ti dir ki zot pe anmenn byennet sosyal ek prosperite pou tou Seselwa.

43an pli tar Seselwa i ankor pli dan mizer, e sa en siny move zesyon, move planifikasyon ouswa vorasite par sa Gouvernman ki'n sorti. Ler nouvo Gouvernman dirize par Prezidan Ramkalawan, ti'n fek vin o pouwar 92 zour pase, in fer en lodit e zot dekouver ki Sesel napa larzan. Ni en kas, ni en sou, e ki Sesel pe naz dan en losean det.

Mr Speaker Sesel pe fer fas avek pli gro defi ki i pa'n zanmen rankontre e sa se *COVID-19*. E sa pe met bokou presyon lo nou lekonomi, sirtou lo premye pilye nou lekonomi ki tourizm. Ansanm nou annan en kantite travay pou nou fer pou ki nou pei i sorti dan sa problem.

Me pou mwan mon war ki bann ki pli vilnerab ki pou anmas tou lour. Nou'n toultan tande nou'n toultan ganny dir ki nou lo menm bato, e ki ler bato pou koule, nou pou koul ansanm. Me Mr Speaker, mwan mon pa'n zanmen krwar sa.

Nou lo menm lanmer, me nou pa'n zanmen dan menm bato, akoz la bann ki pli vilnerab ki pe koul premye.

Nou en pei ki depan lo touris e sa, e bann dimoun pe komans perdi travay. Alors i enportan ki nou vin inovativ, war loportinite dan lezot domenn tel ki lagrikiltir, lapes, pou nou kapab diversifye nou lekonomi. Alor nou pa ava bezwen vin depan zis lo touris. Alor annou vin ansanm, donn nide pour ki nou kapab redres sityasyon.

Mr Speaker nou'n komans war ki nou bann fer pe komans Seselwa ki pe perdi lavi avek *COVID-19*. Alor i nou devwar pou pran nou responsabilite. Mon pe demann avek tou Seselwa pou ekout konsiny Minister Lasante.

Se nou ki pe propaz sa maladi ler nou zwe sourd. Seselwa pa zwe avek nou lavi, e lavi nou prosen. Mon ti ava kontan pandan sa lensten la, felisit bann zabitan Anse Boileau ki pe ekout tou konsiny ki Minister Lasante pe donner. E pou bann ki pa pe tande, silvouple ekoute. Pa anmenn sa maladi se ou pa anmenn sa maladi dan la kominote.

Wi mon konnen i difisil pou sanz nou labitid, me tou keksoz in sanze, nou pa pou

zanmen retourn ankor parey. Nou pou bezwen aprann viv avek *COVID*, parey nenport ki lezot maladi.

Mon ti a kontan remersye e felisit Dokter Gedeon e son lekip, tou bann travayer lasante ki pe fer tou pou ki nou kapab kontrol e finalman ganny sa batay kont *COVID-19*. E ki Sesel a rebran lavi, menm ki i pa pou parey nou ti konnen.

Mr Speaker pandan sa dernyen detrwa lannen Sesel in war li pe fer fas avek bann lezot defi, tel ki defi sosyal, defi relasyon, e defi dan lakour. E sa pe afekte striktir lafanmir e striktir lakominote, ki an retour i afekte nou pei.

Nou'n les perdi tou bann valer moral pandan sa 43 lannen, ki ti ranforsi fabrik nou nasyon e la fason ki nou ti viv koman bann vre Seselwa.

Prezidan Ramkalawan alor i annan li en gro latas ki okenn Prezidan Sesel pa'n zanmen annan. E sa se pou inifye sa Nasyon, retir tou bann move mers tel ki ek nou pa ek nou, ki'n dan nou sosyete pandan sa dernyen 43an.

I annan en lalit, i annan pou anmenn en lalit kont bann trafiker drog ki pe detri nou bann zenn zonn e fanm, ki nou pei i vremen bezwen la an plis, plis ki zanmen. Sa latas i pa zis

latas Prezidan. I osi nou latas, koman bann Seselwa i enportan ki nou kapab e nou delivre nou bann zanfan, sov nou pei.

I annan dimoun ki pe demande si nou pou kapab elimin drog dan Sesel. Mr Speaker mwan mon dir wi, i pa devwar zis Prezidan pou anmenn sa lalit, i devwar nou tou. Fodre ki Lapolis i annan plis konfidansyalite, pa pou devwal lenformasyon ki bann sivilyen i donn zot.

Bann paran ki annan zanfan ki'n tonm da sa fleo, form bann group e montre ki zot nepli kapab siporte. Tou sitwayen konsernen ede, partisipe, pa ankouraz pou soutir bann dimoun ki zot konnen i dan sa biznes.

Fodre annan en revizyon dan lalwa kont drog e sa a fer ki pinisyon pou bann ki enporte e trafik drog i vin pli sever. Mr Speaker, mazorite nou bann zenn zonn e zenn fanm pa dan lanplwa, bokou sa i relye sirtou avek problemn drog.

Wi i annan program *methadone*, pou sa bann ki'n fini tonbe, e i tre enportan ki sa bann zenn ki'n tonbe i ganny nou soutyen. Se nou ki bezwen donn zot lanmen e remet zot lo bon semen.

Pou sa bann zenn ki pe swiv sa program, ki dan

reabilitasyon, i pou enportan osi ki i annan en striktir ki ganny met an plas, pou ki ler zot sorti lo program e retourn kot zot dan lakominote, zot pa rezwenn sa menm lanvironnman ki zot ti kite.

La ki bann *sport* ou lekip pa pe kapab fer konpetisyon Mr Speaker, i enportan pou Minister *Sport* pou fer en lodit war bann veni *sports* dan bann distrik si i lo nivo ki merite. Prepar e form, oubyen enform bann lantrener e bann Zofisye ki ler sport i rebran zot a kapab debourye.

I osi moman pou vwar si napa lezot sport ki zenn Seselwa i kapab fer, e ki a kapab anmenn nou partisip dan bann konpetisyon enternasyonal. Tel parey ki "*Rowing, Archery*" se petet sa i ava atrakte bann nouvo zenn pratik spor.

Bann zenn ki dan *sports*, pa asize pou esper spor rebran, gard zot lekor anform, e lemoman ki spor i rebran zot osi zot in pare. Mon pe osi fer en lapel pou tou bann zenn Anse Boileau, annou koste ansanm refer nou bann lekip sportif ki ti enn fwa lafyerte nou distrik.

E an menm tan bann paran e tou bann zabitan, aport nou sipor pou tou bann zenn. Pa zis espere e koze letan zenn i

mal fer. Pou sa dernyen lannen ki mon'n dan Lasanble, sa de dernyen lannen ki mon'n dan Lasanble, mon'n pouse pour ki bann ferme i ganny valorize e ganny plis lasistans.

E la nou war rezon akoz, si nou vreman anvi asir sekirite alimanter nou Nasyon, e osi diversifye nou lekonomi, se sa bann dimoun ki Gouvernman i merit pe donn plis sipor. Mr Speaker i annan bokou zenn dan mon distrik ki anvi lans dan lagrikiltir. Tel ki Peter, Eric, Willy e lezot.

Me in toultan annan tro bokou birokrasi dan lafason ki later lagrikiltir i ganny distribye. Parfwa kot i annan later, lenfrastruktir tel ki delo, elektrik, semen pa ankor arive.

I ankor annan bokou laferm ki pa pe prodwir. Alor mon pe demann avek Gouvernman pou vwar si sa bann dimoun ki lo sa bann later i ankor enterese pou prodwi. Si non, rebran sa bann later e redistribye li avek bann nouvo dimoun ki enterese pou prodwi. Sa a ede pou garanti nou sekirite alimanter.

Pou bann ferme dan mon distrik, mon ankor pe demann en bazar pou zot. Gouvernman US pandan sa dernyen 43an pa'n reisi konstri enn. Laprev i la, tou nou bann ferme Anse

Boileau pe vann zot bann legitim obor semen, ki par fwa koz danze pou larout piblik. Alor mon pe demann mon Gouvernman silvouple get dan nou *welfare*. Donn nou en bazar.

Parey bann ferme, bann peser Anse Boileau osi tou napa en landrwa apropiye pou vann zot pwason, ouswa *store* zot pwason enn fwa ki zot in antre. Savedir zot bezwen en *store*, en *cold store* ki zot kapab *store* zot pwason. Mon pe osi ensite ki en bwe mouyaz i ganny enstale dan nou lapas, pou nou bann peser i kapab antre Anse Boileau, olye ki desann anvil apre rebran *pickup* pou mont Anse Boileau.

E mon swete ki sa i ava ganny fer pandan sa lannen. Pandan bokou lannen Anse Boileau in ganny kit deryer. Non pa pandan sa dernyen 2 an parey enn nou Istoryen in oule fer nou krwar. Anse Boileau pa pou ni *US*, ni *LDS*. Anse Boileau i pou tou zabitan Anse Boileau e bann dimoun ki anvi vin vizit nou.

Alor mon pe dir avek bann dimoun Anse Boileau, si nou anvi nou distrik i devlope i nou devwar pou n ou met lanmen.

Nou'n reisi ganny donasyon. Nou premye *bus shelter* Montagne Posee apre

plizyer lannen ki bis *SPTC* pe fer sa larout. E mon krwar plis ki 25an, e pou sa mon ti a kontan lo lapar zabitan Anse Boileau, mon ti a kontan remersye Lanbasad Sinwan pou sa don.

Mon pe osi fer lapel avek kominote biznes dan nou distrik, pou vin ansanm e aport tou sipor la pandan sa moman difisil ki pei pe fer fas avek. E nou ava kapab fer ankor plis proze pou nou kapab, pou kapab benefisye nou zabitan.

Mr Speaker, nou demann Anse Boileau i bokou, me sa pa depan zis lo Gouvernman, me osi depan lo bann zabitan nou distrik. I annan bokou dimoun ki bezwen semen, e bann propriyeter ki kapab silvouple, donn *wayleave*, e fer li posib pou ki lavi nou fer ek nou ser a pli fasilman.

I annan propriyeter ki'n fini fer le neser pou ki bann zabitan i ganny semen. Zot in donn *wayleave*, montre kote semen pou pase, me in annan tro bokou retar e tro bokou birokrasi. Alor mon pe sipliy avek bann ki responsab, pou bouze e fer ki travay lo sa bann semen a komanse. Afen ki bann dimoun ki annan zot lakaz pour konstrir a kapab komanse.

I ankor annan bokou dimoun mon distrik ki pe esper en lakaz, me avek leta Sesel la

an se moman, nou bezwen esper ankor en pe letan. Mon konnen i pa fasil pou sa bann dimoun ki pe viv dan sa bann move kondisyon, me mon bezwen dir zot mon bann frer e ser annan ankor en pe pasyans.

Mr Speaker, proze pou enstal *crash barrier* lo lakot Anse La Mouche ti'n byen komanse. Me apre in arete, mon pa konnen akoz. Alor mon pe demande ki sa Minister konsernen i revwar kontinyasyon sa proze. Semenn pase in annan en transpor ki'n fek tonm anba, mersi Senyer in napa fatalite. Annou pa esper lanmor pou kontinyen sa proze.

Zabitan Anse Boileau pe demann en *ATM* dan nou distrik. Alor mon fer en lapel ek sa bann dimoun ki konsernen pou fer tou sa ki neser pou ki zot a kapab fer enstalasyon, enn dan en landrwa apropriye. E an menm tan mon osi demann ek zabitan ler sa i arive silvouple servi li byen.

Avek *COVID* ki pe kontinyen persiste, pou bann etidyan tou i nouvo. Zot bezwen aprann kot lakour. Silvouple zanfan pa gaspiy letan. Tou minit, tou segonn i enportan, sezi tou loportinite ki a zot dispozisyon pou etidye. Paran i

zot devwar pou ed zot zanfan, asiste pou vwar ki zot pe fer.

Mr Speaker preparasyon nou bann zenn pou lemonn travay, i merit ganny swiv tre pros, zot merit ganny gide byen pou fer bon swa. Akoz bokou i al *post* segonder me letan zot fini zot napa lentere pou fer sa metye ki zon in aprann.

Prezidan pe dir Seselwa, ki Seselwa i merit ganny met premye ver loportinite pou travay. Mwan mon demann avek bann paran bann *parent ministry* sa bann *post* segonder, pou gard e sirveyans pres pou vwar si sa ki bann etidyan pe aprann lo nivo ki lendistri i bezwen e ki ler zot konplet zot letid zot kapab antre direkteman dan lanplwa, e non, pa ganny dir ki zot napa leksperyans.

Mr Speaker parti *US* pa ti zanmen ekspekte, ki i pou dan lopozisyon, ouswa i pa'n zanmen prepar li pou dan en tel sityasyon. Zot pa ankor adapte, alors pa war li drol si zot se servi metod kree lafreyer, konfizyon ouswa ensit dezord.

Bokou dimoun deor la an se moman pe konpran poudir i annan en group ki pe kontinyelman kree lafreyer parmi bann dimoun aze, ouswa dan lakominote, avek bann

rimer e bann mansonz sirtou lo rezo sosyal.

Mesaz ki mon annan pou sa bann dimoun ki pe kree sa bann lafreyer ouswa panik, ou dezord, zot annan 5an pou zot fer sa travay, alors kontinyen fer li. Me apre sa 5an zot pou ganny kit ater par Seselwa. Enn fwa ki Seselwa i dekouver ki tousala ti zis bann mansonz e fason pou konfiz zot, konfiz Lepep e pou met retar dan travay nou nouvo Gouvernman.

Mr Speaker dan sa moman kot *COVID-19* pe persiste, mon pe demann tou Seselwa sirtou tou zabitan Anse Boileau pou pa per. Annou sivre tou konsiny ki Minister Lasante i donner. Siport nou vwazen ki dan bezwen. Annou viv sa vre linite ki Prezidan Ramkalawan pe demande.

Se dan sa fason ki Sesel pou sorti viktorye kont *COVID*, e nou ava rebran nou lavi dan sa nouvo normal tre byento. Mersi.

MR SPEAKER

Mersi Onorab. Nou pou pran *pause* la e nou pou rebran ou travay 2er.

(BREAK)

MR SPEAKER

Bonn apre midi tou dimoun. Nou ava kontinyen avek larepons Onorab Georges Romain.

HON GEORGES ROMAIN

Mr Speaker.

MR SPEAKER

Eskiz mwan, mon'n sot sa. Wi, Onorab John Hoareau.

HON JOHN HOAREAU

Mersi Mr Speaker. Bonn apre midi Mr Speaker. Bonn apre midi tou dimoun ki a lekout. Mr Speaker, i fer mon gran plezir pou pran sa loportinite pou donn mon reaksyon lo diskour ki Prezidan Larepublik in fer lo Leta nou Nasyon.

Mon oule osi profit sa loportinite, pou felisit Prezidan Ramkalawan pou en diskour ki tre fran e kler lo Leta nou Nasyon. En diskour ki'n tous plizyer pwen pertinan lo linite, lo servis piblik, lo lefe pandemik COVID, lo nou lekonomi e lezot ankor. San dout, mon osi mon pou pran menm trazektwar kot mon reaksyon pou enn ki tre fran.

Premyerman si i annan en fraz ki'n fer sonnen dan sa diskour, se demann pou nou

pep ini e solider avek kanmarad.

Mr Speaker, en gran aktivis pou Drwa Sivil Lanmerik, *Martin Luther King Junior* ti dir, "*We must learn to live together as brothers or perish together as fools*".

E mon sey tradwir sa an Kreol, "Nou bezwen aprann viv ansanm koman frer, sinon nou pou petri e disparet ansanm parey bann bonnaryen".

Sa i montre nou ki plis ki zanmen dan nou listwar, a en moman kot nou pei pe fer fas avek en pandemik COVID, nou bezwen, nou napa gran swa pou annan linite e solidarite antre nou.

Prezidan pe demann nou pou annan konpasyon pou lezot e ede kot nou kapab, pa zis asize e fye lo lasistans Gouvernman me gete ki nou kapab fer pou nou kapab ed nou lekor e pei i ava kontinyen bouz a lavan.

Sa i en mesaz for. I enn ki demann nou pep pou vin pli rezilyan, apre sa koudvan mon sir ki nou pou viv dan en meyer Sesel. I malere ki serten Manm Lopozisyon pe profit sa moman pou fer politik sal.

Nou'n vwar lo medya sosyal ki endirekteman serten Manm Lopozisyon, pe ensit dimoun pou desann lo semen,

olye angaz zot dan en konversasyon.

Sanmenm sa group ki'n toultan siport en rezim vyolans dan lepase. Sirtou kont bann ki ti pe demann plis laliberte e la demokrasi anba sa nyaz nwar ki ti'n kouver nou.

Zot kont vaksen COVID, e nou ti vwar kler ki ler zot ti *boycott* lansman vaksen e fann fo propagann lo sa size. Zot pe demann en *lockdown* total, zisteman ki pei i ava napa okenn aktivite ekonomik e sa pei ki zot in fer faid, par *mismanagement* e koripsyon, i ava tonm pli ba posib lo son zenou e dimoun i ava revolte kont Prezidan Ramkalawan.

(APPLAUSE)

HON JOHN HOAREAU

Se sa, lespri destriktif e visye ki serten zot i posede. Malerezman sa pa pou marse akoz nou'n vwar direksyon iresponsab ki zot pe pran. Erezman nou pep, i enn ki entelizan e i deryer nou Prezidan.

Mon le ankouraz zot pou fer sir ki zot pran zot vaksen, met zot mask byen, e servi bann konsey, e swivre byen bann konsey lasante.

Ler Lotorite Lasante i satisfè ki i annan liminite kont

sa viris dan la mazorite nou pep, pei i ava ouver konpletman nou lekonomi i ava rebran.

Mr Speaker Prezidan in osi anonse ki napa okenn *file or institutional memory State House* ler in antre. Mon pe profit sa lokazyon pou propoze ki en lenvestigasyon i ganny fer lo sa kote e pou vwar kote sa bann *file* enportan e tou sa bann dokiman in ale.

Mr Speaker birokrasi i en size linefikasite dan nou servis piblik. I reste en gro defi pou sa nouvo ladministrasyon. I malere nou'n erit en servis piblik kot promosyon pa ti baze lo meritokrasi, me ti baze lo sa ki ou frekante oubyen ou afilyasyon politik.

Souvandfwa bokou dyob ti ganny ofer zis avan en eleksyon, oubyen zis apre en eleksyon. *Népotisme* e mank formasyon in toultan en karakteristik dan Gouvernman avan, ki'n fer anfle bokou sa sekte servis piblik.

Finalman bokou sa travay ki ti fodre ganny fer par zis en dimoun, i bezwen pas dan diferan lanmen e parmi ti bezwen annan en *spy* pou donn nouvel Prezidan.

Zis dan Minister Ledikasyon par egzanp. I annan 3 *regulatory bodies* IECD, TEC e SQA. Sakenn anba

son *Act* i rekomann en *Board* e sa i deza fer 3 *Board*.

Si tou le trwa *bodies* ti ganny *amalgamate* anba en sel *comprehensive Education Act* nou ti pou bezwen zis en *Board*, oubyen nou ti pou bezwen en *Council* ki ti pou fer sir ki sa bann lorganizasyon i mars dapre zot manda, depi Lakres ziska Liniversite.

Mr Speaker en *tenant compte* lefe ki bokou lorganizasyon napa en striktir *organigram*, i fer ki plizanpli servis piblik in bezwen kree dyob.

Sa i mars avek plis depans lo saler e kou operasyonnel san neserman anmenn plis lefikasite. Plis i annan gaspiyaz, plis i annan perdi letan e perdi letan i egal lenflasyon.

In annan en mankman remarkab pour en striktir sistematik e lozik ki rekonpans bann performans. Bokou fwa nou'n vwar bann *Scheme of Service* ki tro lour, oubyen konplike, oubyen senpleman i en *copy paste* en materyo kekpar, ki pa zwenn realite sa lorganizasyon. E sa in en reset, sa kalite servis piblik ki nou'n erite kot birokrasi e linefikasite in vin norm.

Dan en lot mo sa kales kase ki Prezidan in koz lo la. Solisyon i pourtan senp.

Gouvernman i bezwen entrodwi en bon *management system* dan tou seksyon servis piblik.

Se la kot *DPA* i bezwen zot son rol administratif. Bann mezir performans par lobzektif e target, sa ki an Angle nou apel *management by objectives*, pour sirman ede mezir kantite prodiktivite ki en travayer i ete, e rekonpans li dapre son zefor. Se egzaktman sa ki nou bann gran paran ti fer dan lepase ler zot ti fer latas.

Mr Speaker responsabilite e travay dir i devret ranplas lesefer e lapares. Se sa lapros ki nou Prezidan in demann nou an plizyer repriz pandan dan son linogirasyon. Pou fer ou travay parey ou ti pou fer si sa i ti pou ou prop biznes.

Mr Speaker, mon kontan ki Prezidan in koz lo en demann pou en *discount* lo lokasyon dan bann biro, pou bann biro ki ganny servi par bann Departman Gouvernman, osi sekirite e lakaz ki ganny servi par bann travayer *expatriate*. An vi ki sa i en gro depans dan nou Bidze. In menm donn nou en sif ki par lao R500milyon an total par lannen.

Mr Speaker mon pe fer en pledwari avek nou Prezidan, ki i osi get dan posibilite pou fer desann lokasyon ki bann pti lantrepriz i peye avek bann

State Own Enterprise. La mon pe mazin Stephanette en koudriyez ki lwe en plas avek *Industrial Estate Authority* kot Batiman Leve Debouye e i pe vwar li difisil, pou pey lokasyon, akoz in perdi bokou biznes pandan sityasyon *COVID*.

Mon krwar si en lanons i ganny fer lo sa size lokasyon, ki ava efektif pou tou landrwa lwe i ava anmenn plis linite e solidarite pandan sa letan dir.

San dout Mr Speaker, avek sa letan *COVID* pa zis Gouvernman ki son pos in vid, me bokou Seselwa osi son pos in vid net. Pandan sa mwan Zanye mon'n travay pres avek Lakrwa Rouz ziska pres 9er diswar, pou delivre manze kot avek en bann fanmir ki ti napa nanryen dan mon distrik.

Nou'n rod led, materyo avek *CCCL*, pou ede sanz tol koule kot Gouvernman pa'n asiste malgre bann ka ti irzan.

Mon oule profite pou tir *chapeau* avek Marie-May ek son tim kot Lakrwa Rouz pou zot lasistans e zot korperasyon e osi kontrakter *DRM Builders*, Beau Vallon.

Mon okouran ki i annan serten labi lo size *part rental*. I annan dimoun ki ganny *part rental*, me li menm li i annan en lakaz ki i a pe lwe e kolekte reveni.

I annan ki apre ki'n ganny *part rental* i pe rantre dan lakour avek plis ki R10,000. Me i annan ki vremen bezwen sa lasistans, me i pa pe gannyen.

Alor dan sa ka mon pe fer en pledwari avek Prezidan ki *part rental* pa disparet konpletman me i ganny reorganize anba bann kriter strik e ed selman sa ki dan bezwen.

Mr Speaker i malere pou osi vwar ki serten marsan pe egzazere e profite pou destabiliz pei, an fezan plis profi lo led malere, pandan sa letan ki nou Gouvernman pe demann solidarite avek linite.

Mon konnen ki annan bokou faktor ki pa dan zot kontrol, tel ki pri Dolar e lefe ki napa touris e zot marse in tonbe.

Me marsan i bezwen rezonnab lo lakantite profi ki i pe fer lo marsandiz. Marsandiz ser, i anmenn plis lapovrete, lapovrete i destabiliz koerans sosyal e i anmenn plis kriminalite.

Zot bezwen realis e konpran ki zot osi zot en mayon ki mentenir stabilite pei e akse avek komodite a en pri abordab, i en faktor enportan dan sa rol.

E la, Mr Speaker mon pe priye ki avek nouvo resours ki Anti-Koripsyon in gannyen, zot

ava kapab rod sa bann larzan vole e sa i ava kapab servi pou soutenir bann dimoun ki vilnerab dan nou sosyete.

Mr Speaker mon'n apresye lanons Prezidan pou annan plis kontrol sever lo demann *GOP* pou bann gro biznes, sirtou bann ki ti pe ganny *FA4GR* e an menm tan pe kontinyelman demann ankor plis *GOP*.

Dezormen plas vid dan sa bann biznes pou ganny ofer avek *Seselwa* an avan. *Seychelles first*. Mon pe lans en lapel pou ki tou ki napa en lanplwa e i annan en skil neser, pou pran sa loportinite o serye.

Mazinen ki ou bezwen ed ou lekor avan ekspekte led ek Gouvernman. Se sa, sa lanir sa lanmson e sa premye labwet ki Gouvernman pou donn ou si ou napa en lanplwa.

Parey sanson Joe Samy i dir, "Ler en fanm e en zom i travay dile pou son zanf an i en sours nourisan". Kiltir travay dir i bezwen retournen dan pei, e sa i neser pou fer pei avans pli devan.

Sa nouvo sistenm governans i egzize ki si ou pa malad, ou devret dan en lanplwa formel. E sa pou ed ogmant larises pei. An menm tan Mr Speaker, Gouvernman i bezwen akseler son zefor pou

sanz bann striktir Servis Sosyal ki pa'n marse oubyen ki'n fini servi son letan.

Nou bezwen vitman re-konseptyaliz nou Servis Sosyal koman enn ki promot *well-being* olye zis benefis *welfare*. Konsep *well-being* dan sa domenn pou promot *reskilling*, *multi-tasking* e *lifelong learning*. Sa i permet nou bann sitwayen ki pa malad, ou napa en dezabilite pou kapab, benefis pou pran en benefis, me an menm tan kontribye pozitivman, dan nou pei, dan nou sosyete.

Eski pa'n ler pou annan en deba Nasyonal lo sa size, an vi ki lakantite labi ki annan dan sa sekter. Eski listwar i pa'n montre nou ki proteksyon sosyal depi nesans ziska lanmor i kree depandans lo Gouvernman.

Mr Speaker an repons avek demann Prezidan ki'n fer lo kote *Air Seychelles*, mon ti ava kontan fer serten remark. Sa size i enn ki ase kompleks. Mon'n ganny sans dan sizyenm Lasanble pou asiste en rankont avek travayer e *chairperson* sa lorganizasyon antan ki mon ti en Manm Komite *IAC*.

Mon'n aprann ki pli gran konponan depans sa lorganizasyon sete karbiran e saler. Lensertitid e pri karbiran

lo marse enternasyonal, in fer ki i pa ti posib pou sa lorganizasyon kontinyen fer *long haul flights*. Kot laplipar nou bann marse touristik i ete a en pri konpetitif.

Dezyenmman *Air Seychelles* ti pe fer fas avek bann problem *economies of scale*, kot menm si i ti annan de avyon, me son kou operasyonnel ti parey en gro lakonpanyen anvi ki i bezwen serten lenfrastruktir, resours e servis ki pa neserman relye avek groser sa lakonpanyen.

Trwazyenmman, avek konpetisyon ek bann laliny enternasyonal, ki annan pli bon resours e pli bon servis in fer ki avyon ti pe anvol vid.

Ler ou met ansanm sa bann rezon ki mon'n koz lo la, avek lezot move desizyon biznes, ki'n ganny pran kot bann Kontra pa ti pe benefisy sa lakonpanyen. Enkli bann gro lapey pou serten dan *management* in fer ki sa lakonpanyen in anfans dan det e ki a sa moman i plis ki \$142milyon.

Alor i kler ki sa model biznes i pa soutenab e i parey en lakord dan likou nou Gouvernman. Parey granmoun i dir ou dwa latet koson. Repeyman det i difisil an vi ki

pei napa en lekonomi fonksyonnel an se moman.

Koman en Manm Lasanble ki konn soufrans sa pep, e frazilite nou lekonomi mon pou siport okenn desizyon ki Egzekitiv i pran lo size *Air Seychelles*.

Tout an rekonesan ki *Air Seychelles* pe zer servis domestik e *ground handling* dan en fason ki agreab. Sertenman *reskilling* e redeplwayman bann staf, dan lezot sekter nou lekonomi i devret ganny fer. Si en desizyon i ganny pran pou ferm *Air Seychelles*.

I pou regretab ki nou pou bezwen anval nou lafyerte Nasyonal, me nou annan en responsabilite pou anpes sa lemorazi kontinyen si nou pran okenn desizyon lo sa size.

Nou pou bezwen solider avek nou bann frer ek ser, ki pou santi zot dan difikilte, me pei i bezwen reste pli gran ki okenn son sitwayen.

Mr Speaker mon pa pou kapab mank sa loportinite pou koz lo sa size drog ki pe afekte nou popilasyon e ki pe fer nou lazenes vin *zombies*. I pe kas linite e solidarite dan nou fanmir e nou sosyete, sa biznes pe rapidman vin en lekonomi paralel dan nou sistenm.

Atraver en pti kalkil fasil, si nou annan 6000 adikt e sak

adikt pe depans R300 par zour lo drog, dan 365 zour i fer R675milyon. Alor mon pe estimen sa lekonomi paralel, pe kontrol plis ki R675milyon par an. I annan son prop labank ilegal ki menm donn *loan* avek lentere, i responsab pou *black market* deviz, i annan son prop *hitman*, i kapab zet lavi.

I responsab pou trafik imen e blansisaz larzan. Gro biznes lakaz e biznes, e lezot biznes ki pe kontinyen agrandi par bann eskobar. Festen dan *weekend* pe kontinyen dan serten *guest house*, menm avek restriksyon *COVID* dan mon distrik.

Menm dan serten ka nou vwar ki kominote dan serten distrik pe montre ouvertman sipor pou sa bann bandi, e sa pe ganny pibliye lo medya sosyal. Sa i en sityasyon danzere, i anmenn en refleksyon lo bann kartel drog enternasyonal parey *Sinaloa Mexico* e *Medellin La Kolonbie*. Kot dan serten lavil tou dimoun i en azan sa bann eskobar.

Dan Lasanble, nou'n nonm plizyer zouti nou sistenm legal. Tou resaman nou'n pas Lalwa *POCA*. Avan sa nou'n amann *MODA*, alor boul i dan kort nou Lapolis, nou *Attorney General* e nou sistenm Zidisyer.

Letan koze in devret fini, alor nou pe demann lo sa bann lazans pou pran aksyon nesaser. Nou zenn i bezwen ganny eparnye kont sa bann danze. Nou toultan pe koz lo lazenes koman larelev, me si nou pa fer atansyon nou pou napa larelev.

In plis ki ler pou nou vwar serten byen malaki, i ganny sezi e sa larzan i ganny donnen pou rehabilitasyon e aste *methadone*, pou sonny sa bann adikt, ki pe kout *taxpayers* plis ki 75milyon par an.

Mr Speaker ledikasyon i en size tre pres avek mon leker. Menm si Prezidan pa'n abord sa size, mon krwar ki i en size ki ase enportan pou Leta nou pei. An vi ki la i fer plis ki 1an depi ler premye ka *COVID* ti ganny raporte, e restriksyon in fer ki bann zanfani in reste dan lakour, plis ki labitid. Mon konnen bann ansenyan in travay pli dir pou fer sir ki bann zanfani pa pe tro perdi dan sa letan.

Alor Mr Speaker mon pe pran sa loportinite pou felisit zot e osi swet zot bon kouraz. Mon krwar ki bokou de zot in dekouver oubyen pran plis konsyans pou vwar medya, enternet e odyo vizyel dan fason pou fasilite laprantisaz.

Mon pase ki zot in fer bokou zefor pou soutenir motivasyon bann etidyan, e prepar zot pou legzanmen.

Mon le osi felisit tou bann etidyan ki'n prodwi bon rezilta sa lannen, dan legzanmen *IGCSE, AS e A Level*. Menm si zot in bezwen etidye bokou letan dan lakour.

Mr Speaker, mon pa pou kapab terminen san koz lo leta mon distrik. Premyerman mon'n fer en demann pou en servis bis, depi byen lontan 2017 pou mwan sou-distrik Dan Gala. Kot environ 35 fanmir i reste, parmi i annan bann vye dimoun.

Menm Prezidan Faure sa lepok in vin vizit sa landrwa, bann zabitan in donn plizyer morso zot later pou konstrir semen avek bi pou ganny en akse transpor piblik.

Malerezman Mr Speaker mon pe vwar ki mon pe fer fas avek en lobstak enorm. Mon let e *email* pe toultan al kot sa menm dimoun ki ti pe ede pou fer kanpanny pou Parti *US* pandan de dernyen eleksyon dan mon distrik.

Menm si mon'n met sa problem devan nouvo Minis pou transpor atraver let ek *email* an Novanm lannen pase, sa sityasyon pa ankor amelyore. Alor mon pe enplor Minis pou

transpor pou vizit sa landrwa e ed mwan pou amelyor lavi sa bann dimoun, ki'n met zot konfyans dan mwan.

Mr Speaker Beau Vallon i en distrik touristik avek bokou letablisman loospitalite e par lanatir i kontribye signifikaman dan lekonomi pei.

Alor i enportan ki bann lenfrastruktir nesese pou siport tel devlopman i a en nivo agreab.

Mr Speaker, mon oule fer referans avek bann pti proze de baz ki manke parey *bus shelters*, semen ki merit resirfas, ron kwen depi kot *Boat House*, ziska kot magazen Mike. En fasilite pou vann legim e pwason, en *slipway* pou bann peser ki annan bann pti bato mini Mahé, Mare Anglaise ki zot in ganny promet avek *SFA* pou plizyer lannen. E pli enportan redevlopman sit Bazar Labrin.

Mr Speaker, fodre ki nou pran swen avek sa poul ki donn nou dizef lor. Nou bezwen envestir pou amelyor servis dan nou distrik.

Mr Speaker, plizyer distrik napa landrwa pou konstrir lakaz, me Beau Vallon nou kapab akonplir bokou atraver proze redevlopman Pascal Vilaz.

Mon pe demann Minis pou Lakaz ki i fer en vizit avek mwan, pou vwar bann

potansyel konstrir lakaz pou bann zabitan Beau Vallon ou menm koman proze rezyonal.

Mon ekspekte ki Minis konsernen pe pran not mon demann. Mon konnen ki Gouvernman pa pe al fer nouvo proze, me i enportan ki tou *starting block* i ganny met an plas, pour letan larzan i rantre tou keksoz i ava demare.

Mr Speaker avek sa mon ti ava kontan remersi bann zabitan Beau Vallon ki'n met zot konfyans dan mwan, pou anmenn zot lavwa pli o posibil.

I vre ki lavi i dir e tou pa fasil, me avek zot korperasyon e travay dir, e ansanm nou distrik pou avans pli devan. Ki Bondye i beni zot tou dan Beau Vallon. Mersi.

(APPLAUSE)

MR SPEAKER

Mersi Onorab. Onorab Conrad Gabriel.

HON CONRAD GABRIEL

Mersi Mr Speaker. Mon dir, dabor mon ti ava kontan remersye tou zabitan mon zoli distrik Pointe Larue. Mersi pou zot rezilyans, determinasyon e disiplin dan sa moman difisil ki nou pei pe pas atraver.

Mersi tou Seselwa pe enport kot zot ete, bann ki'n

touzour pe travay dir pou fer de bout zwenn.

Nou konnen ki nou pe pas dan bokou difikilte e sa detrwa mwan ki'n pase pa'n fasil ditou pou bokou fanmir Seselwa. Nou bezwen sezi sa moman pou nou fer bokou refleksyon lo lavi an zeneral, e in ler pou nou met tou nou diferans de kote, e travay pou sa zoli pei Sesel ki apel nou pei, nou patri.

Sa sel Sesel ki'n bers nou depi nesans e ki'n donn sakenn de nou en sans pou progresse dan lavi.

Mr Speaker malgre mon nouvo lo lasenn politik, me mon pa nouvo dan kontribisyon pou mwan zoli pti pei Sesel. Mon'n ganny sans travay dan diferan sektor nou lekonomi, rankontre bokou dimoun e fer en kantite zanmi. Dabor mon sezi sa lokazyon pou dir zot tou en gro mersi, pou mwan ariv kot mon ete ozordi.

Premyerman koman en zabitan Pointe Larue, mon santi mwan tre konsernen avek deklarasyon nou Prezidan lo *size Air Seychelles*.

Mr Speaker sa i en size tre delika ki mon santi Prezidan i devret fer ankor bokou plis refleksyon lo la, avan enplimant bann mezir ki'n ganny anonse. Lefe i reste ki bokou lenvestisman in ganny fer pou

devlop nou bann zenn profesyonnel espesyalman bann pilot, enzenyer, *cabin crew* e lezot travayer ki form parti sa lakonpanyen.

En kantite zefors e larzan in ganny investir dan devlopman sa bann staf. *Flying the Creole Spirit* vreman en lafyerte pou tou Seselwa. Si Prezidan i santi ki in fini fer desizyon lo *Air Seychelles* sa i son desizyon.

Frer ek ser Seselwa nou tou san leksepsyon, nou bezwen met nou pare avek sa lavi ki pe vini devan nou, ki pou vreman dir. Bokou plis dimoun pou riske perdi zot travay e an perdan ou travay bann lot sityasyon, lot problem, ki pou devlope. Mendev kalifye pou war li pe fer nenport ki loubraz pou ganny son dipen. Sa pour vreman tris.

La mon oule adres direkteman bann zabitan mon distrik Pointe Larue, sirtou bann ki pli vilnerab e bann ki pe deza trouv zot dan bann moman difisil pou fer sa de bout zwenn.

Bokou plis dimoun pou vwar zot napa swa, me al tap laport Sosyal pou lasistans, olye al kot vwazen. Alors la pa moman pou koup lasistans ki Gouvernman i kapab ofer son pep.

Me i moman pou ogmante ziska ki sityasyon ekonomik pei i amelyore. Koup lasistans sosyal pou anmenn bokou soufrans pou serten kous popilasyon, e bokou mon zabitan pou ganny afekte severman.

Mr Speaker, byensir mannyer keksoz pe ale, plis mezir strik pe al ganny met an plas. Nou popilasyon pou vreman soufer en kantite. Sa ki pli pov pou vin pli pov e sa ki pli ris pou kontinyelman profite. Nou rekonnèt ki i annan labi e serten keksoz i bezwen revwar konsernan *welfare*.

Tou pei o monn i annan en program *welfare* pou ed son popilasyon e Sesel pa en leksepsyon. Nou bezwen reste konekte avek bann dimoun preski toulezour, aköz ki mannyer keksoz pe ale plis dimoun i riske pe al dormi vant vid.

Koman en pep, nou bezwen kontinyen reste solider avek nou kanmarad. E koman en Gouvernman responsab ki annan konpasyon pou lezot e konpasyon pou sa ki'n met zot la, zot bezwen a tou moman asire ki napa en Seselwa ki al dormi vant vid.

Annou pa les en katastrof devlope dan nou pei, zis aköz en dimoun i lafen. Bokou fanmir

pe trimouse pou konbat pri lavi ki pe kontinyelman monte.

Mr Speaker, lo size drog dan nou pei. Resaman 34kilo drog ti ganny sezi dan en *warehouse* Pointe Larue, in dan medya. Nou tou nou'n vwar. Lepep ankor pe demande sirtou zabitan Pointe Larue ki'n arive ek sa dekouvert.

Eski in ganny toufe? In ganny kouver lanmenm? Oubyen ankor pe *investigate*. Silvouple, nou bezwen vreman konsernen, pou konnen si Gouvernman i vreman senser dan sa lalit kont labi sibstans, ki pe kontinyelman detrir lavenir nou bann zenn.

E nou tou nou konnen ki Pointe Larue i enn bann distrik ki en gran porsyon to bann zenn i viktim sa fleo. E zot fanmir pe fer fas avek en kantite problemm sosyal asosye avek sa fleo.

En *final warning* i zis zoli parol, avek lentonasyon dominer. Mr Prezidan nou pa le tann *warning* nou, nou anvi war aksyon direk.

(APPLAUSE)

HON DOYACE PORICE

Nou anvi war aksyon direk, ki ou personnelman ou'n fer, senpleman aköz sete ou ki ti dekrir bann *dealers* koman

bann viktim. E ki se ou personnelman ki pou al negosye avek sa bann *dealers*. Mwan personnelman mon ti pe esper ou prononsman lo rezilta sa negosyasyon ant ou ek bann *dealers* drog dan nou pei Sesel.

Mr Speaker, kritik pour touzour egziste, me nou bezwen kritik dan en fason konstruktiv, fer li dan en fason kot nou pou ed pei fer plis progres.

Mwan personnelman mon krwar dan en Sesel ki ini. O kour mon manda, mon pou eseye pou inifye tou mon zabitan, fer zot vwar ki malgre nou lopinyon i diferan e nou koman en kominote, koman imen, koman bann frer e ser nou kapab kontinyen viv byen.

Nou kapab koman en kominote kontinyen ed kanmarad e a tou moman e anmenn plis linite, progres, prosperite pou tou dimoun, tou Seselwa an antye.

Si Gouvernman i vreman senser, silvouple aret fer krwar ki *US* pe sey diviz sa pep. Politik bon marse in fini, Seselwa i byen entelizan e konnen ki keksoz pa fasil. Fodre sa Gouvernman i aprann ekoute. Zot prop siporter la deor, i santi zot en pe mekontan avek serten desizyon ki'n ganny pran e ki ankor pe ganny pran.

Silvouple annou aret met politik dan tou keksoz. Si sa kote latab Parti US i fer en propozisyon, pa zis get sa koman politik. O kontrè analize e i ava ed Gouvernman pran bann bon desizyon ki pou dan lentere nou pep.

Nou pa kapab pe pres linite e larmoni e an menm tan denigre en group akoz son lopinyon. Mr Speaker, sa i anmenn mwan lo en lot pwen e sa se lekonomi Sesel. Vreman nou pei in ariv lo en pwen kot napa gran reveni ki pe rantre.

Nou tou nou rekonnet sa, mon pran lokazyon pou mwan dir mersi tou sa bann diferan lorganizasyon, lazans ki pe kontribye anver sa *COVID-19 Relief Fund*.

Tourism i enn nou pilye lekonomi, e i en gro pilye ki'n ganny afekte. E Gouvernman i bezwen rod solisyon o pli vit posib. Avek lanons ki Prezidan in fer apropo program *FA4GR* ki pe ale ziska lafen dimwan Mars.

Mon oule zis rapel Prezidan ki bokou plis fanmir pou soufer apartir Avril 2021. Kan sa program i sipoze ariv son lafen. Petet i pou vin ek en solisyon pli *cost effective*, me i reste pou nou vwar.

Mon pa tro konpran sa term kales kase akoz Prezidan

pa'n donn gran detay. Me i o kontrè, in profit lokazyon pou felisit bann travayer *State House* ki ti form parti ansyen Gouvernman e ladministrasyon Mr Faure. Nou tou ti vwar ki mannyer lemonn in felisit Sesel, *for the smooth handling over process*.

Me i malere pou vwar apre selman apre 89 zour, Prezidan i vin dir nou ki napa okenn *file State House*. Keksoz mon demann mon lekor be eski vreman ou ti bezwen sa bann *file pou operate*? Tou ou program i sipoze dan ou manifesto, *or* ou pe zis fer en *statement* pou denigre parti ki ti o pouvwar.

Sa i danzere, e fodre pep Seselwa i ouver zot lizye byen gran e konpran ki politik i en zwe vreman danzere. I kapab anmenn bokou divizyon, parmi nou popilasyon. E deza nou'n vwar kantite divizyon politik in diviz nou. Nou annan lo rikord kantite problem ki'n egziste zis akoz politik vwazen, vwazin.

Mon ti ava voudre, pran lokazyon de la par mon bann zabitan Pointe Larue pou remersi lekip Minister Lasante, dan sa lalit oubyen nou kapab dir sa batay tre difisil ki zot pe fer fas avek.

Sa se pou konbat sa pandemik *COVID-19*. Pa zis

Sesel me lemonn antye pe sibir sa lenpak. I pa pe al deswit, nou pa konnen kan i pou fini, me solman nou konnen poudir dan Sesel sa ka pe ogmante de zour an zour.

Nou pa'n nobou ganny piblikasyon pou yer, i pou vin ansanm ek ozordi. Mon zis swete ki i pa grav.

Nou aksepte mezir ki pe ganny pran, e nou felisit Gouvernman pou fer sa pa, apre ki i annan serten parti ki'n fer en *Press Conference*. Se la ki nou bezwen solider ek kanmarad e respekte bann *guidelines* enpoze par Minister Lasante. Dan tou kalamite i annan loportinite.

E mon asir zot ki lo sa kote latab ki la, nou pou kontinyen aport nou soutyen sipor e aport nou kontribisyon e donn nou *full* sipor.

Byensir i annan bokou size ki Prezidan pa'n touse dan son Leta Lanasyon. Sa i konpri lazenes, ki lakle devlopman sikse pou nou pei. Lazenes, i form parti en bout kle. E *sport* i vin avek e ledikasyon i premye fwa dan nou lavi ki nou war en larantre sofistike, ki ti ganny fer lo medya.

I premye fwa dan listwar Sesel, ki bann zanfan i reste sa kantite letan lakour e nou pa konnen ki kantite letan ankor

sa pou ale. Dan li menm i pe anmenn bokou problem. Paran pa pe konnen ki pou fer ek zanfan e mon swete sityasyon i ava amelyore, pou ki sa bann manrmay i ava tourn dan ledikasyon normal enn fwa pour tou.

An dizan sa mon ti ava tous en pti pe lakaz petet. Byento nou annan en seri 24/24/24 ki sipoze donner dan mon distrik. Nou swete zwenn avek zot, avek Gouvernman fer byen desizyon. Zot ti dir *US* ti fer politik ek bann zafer lakaz mon swete zot montre latransparans.

Montre transparans, *fairness*, *accountability* e tou keksoz i ava dan nou lavantaz koman en pei. Travay dir i pa vedir fer tapaz. Mwan mon en dimoun aksyon e nou pou vwar ki kantite nou kapab fer pou mwan zoli distrik Pointe Larue.

Mon pa pou koz bokou. I annan bon pe nou la anndan, mon ava les zot aport zot soutyen. E avek sa mon ava demann Bondye pou beni nou pti pei Sesel.

Fer ki dan sa Lasanble, nou ava aret sa kalite koze. I annan serten Onorab ki pa pe konsantre lo *agenda du jour* zis pe *boycott* ansyen Gouvernman. Sa i danzere.

I danzere, e fodre zot vey byen ki nou dir dan Lasanble. Lepep deor pe soufer, pa sa ki zot anvi tande avek nou koman Manm Lasanble.

Avek sa Mr Speaker, mon ava dir zot mersi. Koman en nouvo Manm mon ava poz mon *case* la. E mersi bokou pou zot lekout.

(APPLAUSE)

MR SPEAKER

Mersi Onorab. Nou ava ekout Onorab Doyace Porice. Tenny ou *mike* Onorab. Mersi.

HON DOYACE PORICE

Mersi Mr Speaker. Bonn apre midi a tous, espesyalman Baie Ste Anne Praslin ki'n ede pou met mwan la ozordi pou koz pou zot. Mr Speaker koman en Manm proporsyonnel Parti LDS e premye fwa mon fer en tel prezantasyon dan sa setyenm Lasanble.

Mon vreman fyer, pou travay ek sa Gouvernman LDS, pou ede met lord dan nou pti pei Sesel. Mon vwar ki i annan serten Manm US ki ankor pe reve, aksepte larealite !

(APPLAUSE)

HON JOHN HOAREAU

I annan en nouvo fason fer keksoz dan sa pei. *L'ordre du jour* se ki Prezidan Ramkalawan ki lo labar. Oli problem? Alor mon profite Mr Speaker, pou mwan lans en lapel pou sa bann dimoun pou aret bar, aret met bar dan larou Sesel e pa konfiz sa pep.

Larealite, nou Gouvernman LDS pou la pou plis ki 5an. Mon konvenki nou pti zil pou vin en bizou, ki nou'n toultan pe reve Mr Speaker. Nou pou fer nou mye pou refer bann vye lenfrastriktir ki'n la depi lepok *Herod*. Sirtou dan Baie Ste Anne Praslin e Zil Pros. Kot sa pa ti dan lentere sa Gouvernman SPPF, Lepep e US ki ti la dan sa lepok.

Mr Speaker, pour mwan mon vreman aksepte diskour Prezidan Ramkalawan. Kot mon santi ki pou sa premye 2 mwan edmi parey i ti dir 89 zour dan Lofis, koman en Prezidan e..lek..te, e pe fer tou le mye posib pou Seselwa. Sirtou kot i konsern Zil Pros e pei an zeneral.

Menm si in antre avek en kof vid, i pe montre nou ki i konnen mannyer pou debourye. E nou konnen i en zonm debouryer e determinen, e i pou debourye pou sa pep.

Prezidan in vin fran e drwat e i pa'n kasyet nanryen

avek Lepep Seselwa. Mon kapab dir ki premye Prezidan Sesel ki'n fer en tel aksyon parey. Kot i koz laverite ek son pep. Mon vremen fyer pou mon Prezidan. E mwan ek mon fanmir pa'n regret nou vot pandan sa dernyen eleksyon.

Mr Speaker, nou Zil Pros nou santi ki nou'n ganny neglize en kantite. Zis ganny promet parti promet dan lepase par sa Gouvernman ki ti o pouvwar pou 43an *SPUP/SPPF/Lepep* e la *US*, zis pou zot reste o pouvwar. Zot pa'n mal donn bal dan *tax payers money*. Seselwa in santi ki promes kase in ler pou fini.

Mr Speaker, mon vremen kontan ki mannyer Seselwa in fer zot desizyon an Oktob, pou elekte Prezidan Ramkalawan e son Gouvernman. Deza i montre gran lentere pou Zil Pros.

In nobou trouv en vaksen pou resisit bann proze ki sa Parti *SPPF/Lepep/US* ti'n met dormi dan *file* proze an disparisyon e bann finansman ki'n al dan pos bann *Alibaba* pou plis ki 30an.

Ki nou'n war zis bann gro, gro plan ki kout 2milyon pou bous lizye nou bann Seselwa, pou fer krwar zot pe travay. Tousala zot in fer ek sa pep.

Devlopman pa'n fer dan lentere zabitan nou pti zil. La ler nou Prezidan ek son Gouvernman, pe sey met en bon striktir an plas, *US* pe mord zot lalev, akoz zot konnen ki bann nouvo devlopman e nouvo lide pou vremen benefisye nou pep.

Wi Mr Speaker, nou Gouvernman i annan bon plan pou sa pei. Pa parey sa Gouvernman ki ti napa okenn plan, e okenn stratezi pou Sesel, zis kontan detri.

Par egzanzp nou labatwar Praslin ki'n ganny vann de fwa. Wi Mr Speaker, de fwa ek tou son lekipman, kot la nou bezwen repar li afen ki nou ava kapab relans fasilite pou fermye lo Praslin. Pa i vremen mal tousala?

La mon mazin osi nou vye kordgard ki nesesit en reparasyon serye, ouswa enn nouvo. Pa ozordi nou pe espere Mr Speaker, granmersi nou Gouvernman aktyel pe lager pou nou ganny enn nef.

Pa zis kordgard Mr Speaker, me vye *Carnegie* ki mon'n lekol ladan, ki bann *judoka* ankor pe esper en reparasyon pou zot kapab ganny landrwa pou *train*, vi ki zot napa sa landrwa apropiye pou zot *train* a se moman.

E sa, i enn parmi bann spor ki anmenn pa mal meday pou Sesel, sirtou enternasyonan.

Akoz sa Gouvernman pa ti pe get zot tou sa letan Mr Speaker? Pa zis *judo*, get nou bann lezot lenfrastruktir pou bann *sportsmen*.

Nou ti ganny promet en *sports complex*, ki plan ti'n fini fer, me nanryen pa ankor materialize ziska la. Sa bann promes ki Gouvernman *SPPF/Lepep/US* ti fer a sa letan pou zis bat latet dimoun Praslin.

Oli nou lekipman *fitness trail* ki zot pe kit dormi anba *NSC Hall*, depi sepa konbyen letan? Tousala bann *sportsmen* Praslin pe note.

Mr Speaker, mon en zabitan Praslin, mon'n ne e grandi Baie Ste Anne, mon santi ki tousala ti'n merit ganny fer, e non pa les nou bann zenn, e osi bann lezot zabitan tonm dan depi tou sa letan.

Annou pa mazin pou zis la ozordi, me nou bezwen mazin le fitir osi, pou nou bann zanfanki pe monte, pou ki zot osi zot ava benefisye atraver bann striktir an plas.

Mr Speaker, mon osi okouran ki nou napa en bazar, ki pou benefisye bann peser e ferme lo nou zil.

Nou pou fer sir ki zot pa ganny kit deryer. Akoz zot osi zot fer bann kontribisyon byen enportan dan nou pei. Mon demann mon lekor sa bann *MNA, SPPF/Lepep/US* ki ti la oparavan, ki zot ti pe fer pou amelyor sa fasilite dan Baie Ste Anne. Pa zis Baie Ste Anne Mr Speaker, lo Zil Pros tou.

En lot sityasyon kot ti mank *proper planning*, nou ti vwar ki Lopital Baie Ste Anne pe desarz direktman dan larivyer, in al fini dan labe Baie Ste Anne, kot *PUC* i ponp delo sale pou desalinasyon. En problem ki'n persiste depi lontan. Pa ti enportan sa tou sa letan?

Mr Speaker sa i zis enn de legzanp ki Parti *SPPF/Lepep/US* in mank planifikasyon dan sa pei. Gran mersi Prezidan Ramkalawan ek son Minis pandan son vizit, in ede pou redres sa sityasyon dan en lespas 2 a 3 zour. Se koumsa ki nou devret rezourd problem, non pa les dormi dan tirwar.

Nou koman en nouvo Lasanble, nou pou a tou moman fer sir ki Gouvernman i partaz larises pei dan en fason ekitab.

Fini ek sa zafer ek nou, pa ek nou, koumsa ler gato i partaze, nou tou nou ava ganny en bout.

Par egzanp bann alokasyon later *Landbank*, later lo Zil Eve pou bann pti biznes, later pou ferme, kot zis en bann ki ti annan bon koneksyon ki ti benefisyé, swa nou paran ti *MNA*, ouswa ti Minis a sa lepok.

Nou annan en ta lenfrastruktir diformen, tel ki bann landrwa sportif. Proze semen ki'n zis pyeste pa fini ladan menm. *Bus stop* ki par plas, aköz i annan landrwa lo Praslin kot napa ditou *bus stop*, e nou ankor pe war dimoun pe sot dan rigol pou zot pran bis.

Sa ti sa lepok. Me nou dedikasyon koman Manm setyenm Lasanble, se pou asire ki nou Gouvernman i fer sir ki sa i amelyore.

Alor Mr Speaker, mon enplor avek nou Gouvernman *du jour* pou fer tou bann zefor posibil, pou tir sa bann *anomaly* ki nou'n erite, sirtou lo bann Zil Pros. E mon konvenki ki ansanm nou pou fer li.

Mon lans en lapel avek bann biznesmenn, mazin en kou ki zot kapab fer pou sa pei Sesel, e non pa ki pei i kapab fer pou nou.

Akoz dan sa letan ki nou pei i ladan, nou tou nou bezwen met lanmen ansanm pou sorti dan sa kriz e mon asire ki zot osi zot pou benefisyé.

Si ou ti abitye *markup* 20 poursan ou prodwi, ou servis, sey gete si ou pa kapab fer li lo 15 e menm 10poursan.

E mon enplor bann biznesmenn ki dwa *tax*, fer li zot devwar pou pey sa ki zot dwa. Silvouple, fer li pou Sesel.

Mon pe mazin osi en proze pilot pou bann biznesmenn pou adopte bann lenfrastruktir Gouvernman, par egzanp lekòl, klinik ou lopital, *bus stop* eksetera. E osi kot i konsern *maintenance* pou ede tir presyon lo Gouvernman sirtou la dan sa letan *COVID*, e ki zot ava benefisyé a lafen *du jour* avek zot *tax return*.

Mr Speaker, nou get lo size sekirite kot lekòl e osi partou dan landrwa Gouvernman. Dan plas annan en gardyen ki napa kontrol ek son lekor, vin travay sou, les dimoun an deor antre dan letablisman mannyer zot oule.

Akoz nou pa servi nou *assets* ki deza lo *payroll* Gouvernman e ki i en *taxpayers money*, pou sekirite nou bann letablisman san zarm. Vi ki nou annan en gro problemm disiplin dan lamazorite nou lekòl Sesel, e osi an deor lekòl, dan landrwa piblik.

Wi Mr Speaker, nou bezwen sanz fason viv, sanz fason get keksoz. Nou tou nou

konnen ki i annan nou ki krwar Gouvernman pou fer tou keksoz pou nou.

Mr Speaker, napa pli bon keksoz ki nou Prezidan Ramkalawan in koz lo la, ki mon'n apresye plis son lalit kont drog. Ki menm nou Zil Pros pa'n ganny eparnye, kot bokou nou zenn in ganny afekte e ankor pe ganny afekte, e i en fe Mr Speaker.

Nou'n war pandan kanpanya dernyen eleksyon kot i annan serten politisyen ki angaz zot aktivis, pou propaz drog ek nou bann zenn, pou zot ganny vot.

I enn bann rezon akoz drog pa'n zanmen ganny met anba kontrol Sesel. Larzan in lenfliyans desizyon partou dan Gouvernman ki ti o pouvwar.

E sirtou dan ANB kot bokou laprev in ganny devwale, menm parfwa dan Gouvernman ti kasyet pou serten, zot konnen ki lafimen pa sorti san dife, proverb in toultan dir montanny pa zwenn me dimoun i zwenn.

Mr Speaker, e mon konnen ki en zour nou pou reisir sa konba. Mon ti ava kontan ki Gouvernman i get en kou bann anplwayer Sekter Prive, ki malonnet, e ki fer nou travayer Seselwa soufer, sirtou dan domenn lotelri kot i

konsern larzan *tip*, promosyon, *service charge*, eksetera.

I aplik pou nou travayer touristik lo Zil Pros kot zot osi pe soufer.

Mr Speaker, in plis ki ler revwar fason *tender*, ki ganny fer pou bann proze Gouvernman ki pran en ta letan, e osi en ta labi e ki'n annan bokou koripsyon ladan siporte par sa Gouvernman ki ti la o pouvwar.

Pour kwa pa met sa bann proze dan Ladministrasyon Distrik, ouswa dan Minister konsernen pou evalye sa proze e selekte *the best bidder*, pandan en pti dele letan, i a fer ki proze i ava kapab konmans pli boner e ki ava ganny zer dan en fason pli efikas.

Annan plis bann *quantity surveyors* dan Gouvernman. Pou balans bann proze pou pa vin *over budget*. I sagrinan ki sa i en travay ki pa'n ganny fer ditou, par sa Gouvernman presedans dan sa lepok.

Mr Speaker, la lo kote *part rental* ki nou Prezidan in koz lo la. Mon rekonnet ki ti annan bokou labi, me mon santi osi ki bokou nou dimoun mwen fortinen pou ganny afekte.

Pou sit en legzanp, en manman tousel ki pe siport son trwa zanfan, i annan son bil kouran, delo pou peye. Trwa

zanfan pou anvoy lekol, e sa paran i ganny li R9,000 a R10,000 par mwan.

E li i pe pey deza, i deza pe pey lakaz R7000 par mwan. Pa bliye i annan ki pe pey lakaz e pe pey *HFC* an menm tan, tou le mwan pou li nobou ganny son prop lakaz.

Kote i pou gannyen pou fer de bout zwenn? Alors, mon enplor avek Gouvernman pou revwar en lot solisyon, pou ed nou zabitan ki pa kapab *afford* pou pey sirtou lo nou Zil Pros.

Mr Speaker, Prezidan Ramkalawan in mansyonn *FA4JR*. La osi ti annan bokou labi akoz ti annan bann gro biznes ki ti pe benefisye anba sa *Scheme*.

Ti napa triyaz dan lekel ki pou benefisye. Pa konnen ki kriter zot ti servi, sirtou avan eleksyon par sa Gouvernman ki ti la. E la i ti annan bann pti biznes ki ti pe soufer akoz malgre zot ti merite zot pa ti kalifye.

Avek sa nouvo lanons, mon oule enform Gouvernman ki pou arive avek bann pti biznes dan pei? Sirtou lo Zil Pros, tel koman *hairdressing saloon, barber shop, servis childminding* avek *daycare*, latelye koud, bann *skipper*, bann pti boulanzri ki anploy

serten nonm travayer, pou nonm enn de.

Mr Speaker, annou koz en kou lo sa size *childminding* ek *daycare*. Pandan *COVID* sa group dimoun ti pe kontinyen travay zot. E zot fer fas avek bokou difikilte, kot i annan paran ki ti pe travay dan lakour e pa pe anmenn zot zanfann, e zot deside pa peye.

Ki laport sa bann dimoun pou al tape? Lekel ki pou ed zot? Alors, nou enplor ek Gouvernman pou get dan *welfare* sa bann dimoun, lo ki fason pou pli byen asiste zot, e fer ki i vin en lobligasyon ki paran ki siny kontra avek sa bann operater, i pey zot ler i ariv lafen dimwan.

Akoz sa bann dimoun zot annan zot det zot osi, zot annan zot pti *loan* pou peye, fanmir pou sonnyen, elektrik, delo, e lakaz, ensidswit.

Mr Speaker, tousala nou bezwen get ladan. Sa i partou dan pei, e ankor Zil Pros pa ganny eparyen.

Mr Speaker lo kote bann *Board* ki donn lasistans, oubyen ki donn *loan* bann pti biznes. Met zot anba en sel antite, kot tou larzan i ganny met anba en *account*.

Sa pou ede pou napa labi, e osi koup birokrasi. Zis parey sa Gouvernman ki ti o pouvwar

ti lesefer kot ti annan detrwa *Board*, ki ti pe fer menm keksoz e ki ti pe anmenn bokou koripsyon.

Avek sa nouvo lide i ava fasilite bann dimoun lo Zil Pros, kot zot ava annan en plas, ki zot ava kapab anrezistre e pou konnen ki kategori *loan* zot pou gannyen.

Zabitan La Digue ti ava kontan konnen konbyen in kout, *Land Transport* pou proze rigol ki'n fouye e ki pa'n fini. E osi konnen ki'n devenir avek lakonpanyen *Technofab*, ki ti'n ganny kontra *sewage* lo La Digue.

Tousala Mr Speaker ti bann proze dalon ek sa Gouvernman ki ti o pouwar. Nou konn tre byen lekel zot.

Mr Speaker, aprezan annou get en kou Fond Ferdinand lo Praslin. Sa fon ler ti anba *PDF (Praslin Development Fund)*, ti ede tir bokou presyon lo Gouvernman, par egzanp, bann pti proze semen se *PDF* ki ti pey bann pti kontrakter, e osi pou amelyor fasilite dan lanvironnman Fond Ferdinand li menm.

Ti en fon devlopman pou tou zabitan Praslin. Tou son profi, tou son benefis ti ganny servi pou bann zabitan Praslin. Plis dimoun ti ganny lanplwa.

Tou le lannen, ler sa fon ti agrandi, o mwen en dizenn dimoun ti ganny travay. Dapre en sours lenformasyon, depi Septanm tou sa bann sistenm ti sanze pou al anba *SIF*.

De moman ki ti pou annan eleksyon lannen pase, ti fer kit tou kokodmer dan bwa, e anpes anmase zis pou kasyet ki kantite profi ti pe ganny anmase.

La konman mon pe adres Lasanble Nasyonal, sa bann koko i ankor dan bwa Fond Ferdinand. Mon ti al vizite de semenn pase

Zis gete Mr Speaker kot nou perdi larzan, kan nou ti kapab ramas sa bann koko, servi sa bann *kernel*, vann avek etranze kot ti annan deviz pou Fond Ferdinand.

E son koko ki envalid, ti ganny vann avek artizan, e la Gouvernman ti ava ganny en reveni dan sa letan difisil ki nou pe pas ladan.

(Off-Mic)

MR SPEAKER

Silvouple, aret en pti moman. Bann Manm dan Lasal, silvouple gard en pe zot komantr pou zot menm. Par evite enteronpe. Mersi.

HON DOYACE PORICE

Mersi Mr Speaker. Mr Speaker i enportan note ki serten sef dan *SIF*, i ganny peye an *forex* avek nou larzan atraver *SIF*.

Selman zot pa oule anploy nouvo dimoun Seselwa angiz ki sa fon napa larzan. Mon demande ki Gouvernman i fer lanket zeneral dan tou lede departman, *SIF* e Fond Ferdinand.

Konsernan *kernel* koko ki pa ankor ganny peye. Pa zis sa Mr speaker zot pe pey en lakonpanyen sekirite ant 250 a R275,000 par mwan. Be pa'n ler pou get ladan kot zot ti kapab anploy zot prop sekirite?

Sa ti sa Gouvernman ki ti la oparavan pou siport, zot bann dalon pou ganny larzan, sa ti sa lepok. Ler ti transfer sa fardo in al lo ledo *SIF*.

Mr Speaker, fodre bann parastatal, e osi serten brans dan Gouvernman, zot revwar zot priyorite kot i konsern larzan Leta. Legzanp, si nou napa fodre pa nou fer donasyon apre nou deklar faid.

Sa i vin zis parey *Air Seychelles*, a en moman kot i ti napa me i ti donn tiket *sponsor* sirtou dan letan Festival Kreol.

Sa i se akoz Gouvernman *SPPF/Lepep/US* ti toultan pe kasyet keksoz, e bat latet nou Seselwa, me sa pa ti mal sa Mr Speaker.

Mon lopinyon, se pou fer en bon lodit dan *Air Seychelles*, depi son legzistans ziska la. Avan ki nou mazin lezot desizyon ki ava ganny fer. E osi konnen ki nou fer avek bann travayer sa lakonpanyen pou ki zot pa reste san lanplwa. En Mosyon mon pou anmennen ler tou keksoz in amelyore dan pei, se pou demann Gouvernman dan le bi pou ankouraz dimoun lo Zil Pros pou reste dan zot lanplwa.

E sizesyon pou ki sa bann travayer ava ganny en *live-in allowance*. An konparezon, en ansenyan ki anploye lo Zil Pros pe aktyelman ganny menm saler avek en ansenyan lo Mahé.

Kan nou konnen ki an se moman kou lavi i pli o, nou bann zil konpare avek Mahé. Oubyen, mon pou demann Gouvernman pou revwar kou lavi dan Sesel sirtou lo Zil Pros.

Pou fini mon remersye Bondye pou sa sanzman, ki'n benefisye nou zabitan Baie Ste Anne e Zil Pros. E nou pei an zeneral, e ki Bondye i ava touzour protez nou Prezidan, Gouvernman e nou bann Manm Lasanble pou ki nou ava kontinyen fer sa bon travay ki nou'n konmanse pou relev nou Sesel.

Mon osi demann Bondye pou pitye nou bann dimoun, pou konpran nou, e annan pasyans avek travay ki Gouvernman pe fer pandan sa letan difisil ki nou pe viv ladan. Mersi Mr Speaker.

(APPLAUSE)

MR SPEAKER

Mersi Onorab. Nou'n ariv pre 3er en kar. Mon krwar plito ki al lo en lot diskour a se pwen nou ava pran poz la, e nou ava komans 3.45.

(BREAK)

MR SPEAKER

Avan nou kontinyen avek nou repons. Mon le pran sa moman pou pas lo sa size enteripsyon dan Lasanble, dan letan ki Prezidan ti pe fer son diskour Vandredi pase.

Parey mon'n dir bomaten. Mon ti'n ekrir *Leader* Lopoziyon, e mon ti'n met devan li ki serten son bann Manm ti responsab pou sa lenteripsyon, avek en move konportman.

Mon ti propoz ek li pou ki i dil avek sa dan son *Caucus*. Avek bi pou sov Lasanble sa lenteripsyon dan nou biznes ozordi.

Mon ti osi espere ki nou kapab fer en konklizyon lo sa sapit ase vitman.

Dirizan Lopoziyon in reponn mwan, i dir mwan i pa kapab fer okenn nanryen. Akoz mon pa'n donn li ase detay lo lekel ki responsab. Lekel ki'n fer kwa. E lekel ki mon pe koz lo la.

Alor mon pou donn detay la. E mon pe adres direkteman sa 2 Manm ki mon rekonnet koman responsab. Dan sa lensidan, Onorab Chantal Ghislain ek Onorab Johan Loze, ti fer plizyer komanter dan zot plas letan Prezidan ti pe fer son diskour.

Mwan isi mon'n tann zot. Serten bann Manm Lasanble in raport ek mwan ki zot in tandé, e ki in enteronp zot. E evidaman, Prezidan osi ti tandé e ti reazir.

Alor mon rekonnet ki sa bann konportman i ariv en pe toulezour dan nou Lasanble. Me sa i antre nou, e nou pas lo la. Leta Lanasyon i en lokazyon diferan.

I en lokazyon solannel, tre enportan dan nou biznes Lasanble. E byensir avek Envite Distenge. Prezidan li menm ki nou dwa respe. E avek lezot envite dan lasal, i fer li en lensidan tre serye.

E alor mon pa kapab pas lo la, parey nou pas lo sa bann lensidan ki arive toulezour. E ki'n arive ozordi plizyer fwa.

Donk mon krwar sa konportman ti grav. Alor mon pou demann sa 2 Manm konsernen pou zot fer en *apology*, la an se moman avek nou Lasanble, pou sa mank respe pou bann dimoun ki ti avek nou sa zour. E pou mank respe osi, mon krwar pou Lasanble, e pou mon lotorite osi koman Speaker.

Alor mon ava apel Onorab Loze. Ale Onorab Loze. Nou ekout Dirizan Lopoziyon.

HON SEBASTIEN PILLAY

Mersi Mr Speaker. Mr Speaker bomaten ler mon'n vini, mon'n resevwar ou let ki ti enform mwan ki, e mon pou pas lo ou let zis pou ki nou gard li lo rikord.

Kot ou'n *reiterate* ou dezapwentman lo serten entrizyon e komanter ki serten Manm lo mon kote latab in fer. An relasyon avek, dan pandan letan ki Prezidan ti pe fer son *State of the Nation Address*.

Mon'n konsekaman, vi ki ou ti'n dir mwan nou le dil avek sa *matter* avan lafen lazournen. Mon'n ekrir ou, mon'n *reply* ou e dir ek ou koumsa. Mon'n regard *in the matter*, e mon'n dir

ou ki ou let pa *accurately reflect* bann *facts*.

Ou'n fer en referans *as to some Members*. Ler ou fer referans *as to some Members*, i pa kler pou mwan si i annan 2, si i annan 3 Manm.

Mon'n demann ou pou diriz mwan *as to which Member you are referring to*. E ki sa pou ede. A okenn ka mon pa'n dir ou ki mon pa kapab fer nanryen lo sa size. Mon *text* i la lo mon telefonn ki mon'n anvoy ou. Zisteman akoz ou'n dir mwan ou le dil ek sa *matter* avan lafen lazournen.

Dezyenmman Mr Speaker, si ou'n swiv byen mon ladres bomaten. Pandan mon ladres mon'n osi koz lo sa size. E mon'n osi pran responsabilite pou demann leskiz pandan mon ladres, *as to* sa sityasyon ki'n arive.

Me mon'n osi *remind* ou Mr Speaker, ki lefe ki avan ki sa lensidan i arive, Prezidan Larepublik pandan moman ki bann Manm lo mon kote latab pa'n bat lanmen ler in felisit Minis pou Lasante, me plito bat lanmen ler in felisit bann travayer Lasante, i ti fer serten komanter.

E la i ti dir ki nou fer onte. E in menm dapre serten Manm servi en komanter ki apre ki in dir "malelve".

Mr Speaker, pou mwan sa osi i montre en mank respe *for The House*. *Because* ziska sa moman tou Manm ti ankor pe reste lo bann prensip ki ou *Speakership* i demande. E sa se ki nou donn tou latansyon Prezidan Larepublik.

Mon'n osi koz avek serten Manm ki'n enform mwan ki dan zot *reply* zot annan lentansyon adres sa sityasyon. E pou swa prezant zot leskiz, e prezant zot largiman vizavi sa sityasyon.

Mon ti a kontan alors Mr Speaker, ki nou reflekte lefe bann keksoz ki'n deroule. E lefe ki mon'n amenn sa devan mon *Caucus*. E lefe ki mon menm mwan an 2 repriz, 1. dan en *interview* ki mon'n donneren avek *SBC*. E dezyenmman, dan mon lentervansyon bomaten kot mon'n adres sa size.

E nou ava montre poudir nou annan en lentre pou nou dil avek sa sityasyon dan en fason *fair*, e dan en fason transparan.

Si ou le ensiste ki mon Manm i prezant en *apology* Mr Speaker, mon pou demann Lasanble atraver ou Mr Speaker, pou osi konsider lefe ki pou premye fwa dan en Lasanble pandan en diskour lo en ladres Leta Lanasyon, en Prezidan, en Prezidan Larepublik in servi sa term "fer

onte e malelve" avek en kote Lasanble.

Mersi Mr Speaker.

MR SPEAKER

Mersi Onorab. Premyerman nou pa isi pou nou ziz konportman Prezidan. Lo son ladres e son parol zot kapab reponn lo la pandan zot repons dan sa sesyon ki nou pe fer.

Dezyenmman, lo lefe ki ou'n adres sa size avek mwan, in les mwan san en konklizyon. E mon kapab dir mon pa satisfè avek sa ki ou ti dir dan ou diskour bomaten, koman en repons sifizan.

Alors se pou sa ki mon'n deside pou fini avek sa sityasyon ozordi. E pou fer en konklizyon, mon pou adres sa 2 Manm direkteman. E mon pe demann zot fer en *apology*.

Mwan mon krwar i apropiye. Mersi.

(Off-Mic)

MR SPEAKER

Non, zot bezwen fer sa avan zot *reply*. Akoz mwan mon le adres sa size spesifikman la. Alor mon a demann ankor Onorab Loze.

HON JOHAN LOZE

Bonzour Mr Speaker. Mr Speaker mersi pou adres sa size avek mwan.

MR SPEAKER

Onorab Loze remarke ki mon pe demann ou fer en *apology*. Mon pa pe demann ou fer en gran *speech*.

HON JOHAN LOZE

Mr Speaker mon krwar ou'n donn mwan laparol.

MR SPEAKER

Mon bezwen en *apology*. Mersi.

HON JOHAN LOZE

Mr Speaker, mersi ankò pou adres sa size avek mwan. Lo sa size ki ou'n leve, napa 2 Manm. Sa mon pou dir ou kler e mon pou dir ou fran, i annan zis mwan Johan Loze. Napa Onorab Ghislain, napa personn ankò, i annan mwan. Sa mon'n dir ou e mon a repete.

Mr Speaker, i pa fer premye fwa dan sa Lasanble ki Manm Lopoziyon i enteronp Prezidan diran diskour Leta Lanasyon.

Premye ki'n fer sete Onorab Wavel Ramkalawan li menm. Lannen pase ler Prezidan Faure ti pe fer son prezantasyon *speech* Leta Lanasyon.

Alors letan in vire in dir mon malelve, larepons ki mon granmanman ki en Digwaz in toultan donn mwan lo sa size

se ki ler en dimoun ki pli vye ki ou i dir ou, ou malelve. Larepons se ki ou dir li mon'n aprann avek ou.

MR SPEAKER

Onorab Loze mon'n dir ou mon pa pe rod en gran *speech*. Mon pe rode si ou pou fer en *apology* oubyen non?

HON JOHAN LOZE

Apology i ganny fer, me en *contexte la situation*.

MR SPEAKER

Silvouple fer ou *apology*.

HON JOHAN LOZE

Vandredi ti en sesyon Lasanble Nasyonal. Parey tou sesyon Lasanble Nasyonal i ganny fer anba lezid Speaker Lasanble Nasyonal.

And as such, tou dimoun ki prezan dan Lasanble Nasyonal sa zour i anba ou kontrol konman Speaker Lasanble Nasyonal.

Letan ki Onorab Ramkalawan ti vire ti dir avek nou lo sa kote konmkwa ki nou fer li onte. I onte koman Sef D'Eta, Mr Speaker, *right there and then* i ti anba ou *purview*. Pou ou demann li en *apology*.

MR SPEAKER

Onorab Loze ...

HON JOHAN LOZE

... lefe ki li in ensilte ...

(Off-Mic)

MR SPEAKER

E ou pa pou enstri mwan lo ki manner pou fer letan Prezidan pe donn son diskour.

(APPLAUSE)

MR SPEAKER

Silvouple evite.

Onorab Loze mon pe demann ou zis si ou pare pou fer en *apology* oubyen non? Mersi.

HON JOHAN LOZE

Yes, Mr Speaker, *apology* wi. Me *la situation en contexte. En contexte* Mr Speaker, ki klerman in ariv lezot keksoz Vandredi *leading up to* sa ki'n arive.

E ou pe demann mwan pou *apologize* ou pa ni konnen ki mon'n dir. Personn pa konnen ki mon'n dir.

MR SPEAKER

Mwan mon konnen ki ou'n dir.

HON JOHAN LOZE

Repete.

MR SPEAKER

Mwan mon konnen ki ou'n dir.

HON JOHAN LOZE

Repete ki mon'n dir?

(Interruption)

MR SPEAKER

Onorab Loze ...

HON JOHAN LOZE

Ou le dir mwan ni pou repete ki mon'n dir, mon napa drwa repete? Mon pou *apologize* pou kwa?

MR SPEAKER

Onorab Loze. Onorab Loze mon pe dir ou si ou pa pou *apologize* kit lasal silvouple. *Ok?*

HON JOHAN LOZE

Mr Speaker, be kan mon'n dir mon pa pou *apologize*?

MR SPEAKER

Ou a kit lasal pou larestan *Sitting* ozordi parey *Standing Orders* i enstri mwan.

HON JOHAN LOZE

Standing Orders i enstri ou fer mwan kit lasal pou en keksoz ki'n pas dan dernyen sesyon? Napa problem Mr Speaker.

MR SPEAKER

Mersi.

(Hon Johan Loze left the Chamber followed by All Members of United Seychelles)

MR SPEAKER

Silvouple evit komanter.

(APPLAUSE)

MR SPEAKER

Bon nou annan en *quorum*. Alor nou a kontinyen avek nou biznes. E pou sa mon ava apel Onorab Georges Romain. Onorab Romain.

HON GEORGES ROMAIN

Mersi Mr Speaker. Bonn apre midi Mr Speaker avek tou bann koleg Onorab. I vreman sagrinan pou war Lopozisyon pe kit Lasanble ozordi. *Anyway*, bonn apre midi tou bann dimoun ki a lekout. Bonn apre midi, en bonn apre midi spesyal pou tou zabitan Anse Etoile.

Mr Speaker, pou mon komans mon repons lo diskour lo Leta Lanasyon mon ti a kontan remersye Prezidan pou lafason ki in adres Lepep Seselwa dan en fason fran e direk san ki i bezwen fer krwar ki tou keksoz i byen. Se sa kalite Dirizan ki nou bezwen, koman enn ki pe vin koz laverite lo vre Leta nou Nasyon.

Sa portre ki Prezidan in penn pou nou Mr Speaker, i enn ki montre nou ki nou lekonomi i dan en kriz, e ki si nou pa aranz keksoz koman en Nasyon e travay ansanm, nou pou war nou tonm dan en pli gran presipis.

E pou mon sa i pe fer Seselwa konpran ki nou lekonomi i trouv li dan en problemn sever e ki i devwar tou dimoun pou pran son responsabilite pli serye ki zanmen pou nou kapab rezourd nou sityasyon.

Mr Speaker, Parey nou'n vwar sityasyon *COVID* Sesel in vin pli alarman. E nou pe kontinyelman vwar son lenpak lo nou lekonomi. Prezidan in refer sorti ki sityasyon i kritik, e i devwar nou tou pou pran nou responsabilite, kot nou kapab e met lespri ansanm pou nou kapab met sa sityasyon anba kontrol.

Nou'n vwar ki mannyer lenpak *COVID* in afekte larzan ki Gouvernman i kolekte anver son Bidze. La kantite larzan ki pe antre dan son kont i definitivman pa ase pou soutenir nou depans. Nou'n menm vwar Gouvernman pe bezwen pran davans ek Labank Santral pou kapab tenir depans pei.

Larzan ki pe antre dan kont Gouvernman in tonbe dan mwan Zanvye par plis ki 50 poursan. E sa ti ganny deklare par Minis Finans dan son Konferans Lapres. I osi in anonse ki i pou annan en defisit R4.5bilyon ki'n ganny prozekte pou son Bidze 2021 ki vreman o e ki montre ki Gouvernman pa pou anmas lakantite larzan ki i bezwen pou son depans 2021.

Alors Mr Speaker, i kler ki Leta nou Nasyon i bezwen aranze. I neselit en zefor kolektiv dan nou pei pou konbat sa sityasyon, e parey Prezidan in dir, nou tou pou bezwen fer sakrifis e atrap lanmen kanmarad pou nou konmans vwar en lalimyer.

Koman en pei nou bezwen mazine ki depi Avril 2020, depans an plis in ganny fer pou soutenir saler sekter prive atraver *FA4JR*. Sa in ogmant depans pei e parey ti'n ganny dir, ki an 2020 nou'n depanse, an krwayan ki *COVID-19* ti pou en problem tanporer. Nou pa ti pe mazin pli lwen, ki petet *COVID* ti pou la ek nou pandan en pe letan.

E alor nou depans i pa'n dan en fason soutenab dan 2020. Sa letan, menm si Gouverner Labank Santral ti pe kontinyelman alert nou lo problem ki nou kapab fer fas

avek si nou depans dan en fason iresponsab. Mr Speaker, i paret ki nou prop Gouvernman dirize par ansyen Prezidan Danny Faure pa ti pe ekoute akoz ti pe zis tonm dan en zorey sourd.

Nou'n menm vwar ki Ladministrasyon *US* ti menm ofer bann *loan* avek pti biznes. Donn rediksyon lo *loan* lakaz san vreman fer analiz a profon, si vreman sa ti pou soutenab dan sa bann letan ki nou pei ti pe pas ladan.

E nou tou nou konnen sa letan ti dan en lannen eleksyon, e petet ti bann zouti politik pou sa ladministrasyon sa letan pou kapab reganny eleksyon. Me malerezman, Mr Speaker, pep Seselwa ti'n fini ganny ase ek sa Gouvernman *US*. Menm si zot ti pe devid larzan san kontrol dan en letan pandemik. E mazine sete zot menm, dan sa menm Lasanble, ki ti pe ankouraz Gouvernman pou donn en Trezyenm Mwan Saler.

Alor Mr Speaker, tou sa la in kontribye ki prezan lekonomi in vin pli frazil e bann desizyon ki tre difisil pou bezwen ganny pran par sa nouvo Ladministrasyon pou nou kapab redres nou sityasyon. Parey nou Prezidan in dir nou'n erit en kales kase e prezan nou bezwen aranze.

Mr Speaker, annou regard size *welfare*. Ozordi bokou dimoun pe abiz sa servis. E mwan Mr Speaker, mon pou aport mon sipor total anver nou Prezidan, dan bann reform ki i pe propoze. Mon ti a kontan sipliy avek bann ki pe depan lo *welfare* me ki kapab kontribye dan nou lekonomi, pou leve e al travay. E donn lanmen pou redres nou lekonomi olye zis asize e anpar lanmen.

I enportan pou nou reget kriter bann ki sipoze benefisy e fer sir ki selman bann ki vreman merite ki benefisy. E la mon kontan ler mon tann Prezidan dir ki ou bezwen tap laport Biro Lanplwa avan ou vin rod *welfare*.

Nou konnen ki i annan bokou kritik akoz sa bann reform dan *welfare* ki pe ganny propoze. Me annou mazine ki ozordi i annan apepre 7,000 dimoun ki pe benefisy avek sistenm *welfare*, enkli *home carers*.

Eski nou krwar i normal ki en dimoun ki an bonn sante, ki kapab travay me ki in deside pou asize e benefisy zis lo larzan Leta?

Mr Speaker, enn bann keksoz ki pli enportan dan sa kriz ki nou pei pe pas atraver, se pou nou annan linite koman en pep. E sa in ganny soulinyen

par nou Prezidan dan son ladres SONA.

Ozordi, nou pe pas atraver en kriz ki pe afekte lasante nou pep. E fason pou nou met li anba kontrol se pou nou met an plas bann mezir prevansyon pou popilasyon, e sa i enkli bann regilasyon ki nou tou nou'n tann koz bokou lo la e osi programm vaksinyon.

Me pli enportan dan tou sa la Mr Speaker, se ledikasyon nou pep, pou konpran e ankouraz zot pou adopte sa bann bon pratik e al pran zot vaksen. I malere pou vwar Mr Speaker, ki Lopozisyon ozordi pe met bar dan larou sa plandaksyon ki Minister Lasante in vin avek. Menm si zot pe fer krwar ki zot pe siport Minister Lasante.

Menm nou'n vwar ou Mr Speaker, vin lo televizyon pou eksplik lafason ki mannyer bann MNAs ti ganny enformen pou vin pran vaksen. Akoz i paret mwan ki serten Manm dan Lopozisyon ti pe fer krwar ki zot pa ti'n ganny envite. Sa i fo, akoz nou tou nou ti ganny enformen atraver nou group *WhatsApp*.

Lefe ki zot bann MNA pa ti prezan pou lansman ofisyel pou sa vaksen, i anvoy en mesaz kler ki zot ti pe senpleman *boycott* sa program. E pe ede

senm konfizyon dan popilasyon a en moman ki nou bezwen bokou sipor e kordinasyon Nasyonal, pou nou edik nou popilasyon kan nou konnen ki vaksen i sov lavi.

Annou pran nou responsabilite koman bann *Leaders* dan sa pei. E ed nou Nasyon pou sorti dan sa kriz ki nou ladan, dan plas met retar dan zefor ki pe ganny fer. Sa ki nou bezwen Mr Speaker, se linite dan sa moman ki nou ladan e sa i komans avek nou koman bann *Leaders*.

Annou donn legzanp silvouple. I vremen iresponsab pou *US* vin abes kredibilite nou bann profesyonnel lasante, kan zot pe lans en program serye pou sov lavi nou pep. Nou'n vwar zot byen kler atraver zot Konferans Lapres ki ti pase lo televizyon.

Mr Speaker, permet mwan pou remersye Minis Vidot, Dr Gedeon, Dr Louange ek tou lezot dokter, *nurse* e san bliy tou lezot travayer Minister Lasante ki pe kontinyen met zot lavi en risk tou le zour pou ede protez nou pep. Pep Seselwa i apresye zot enormeman pou zot devosyon.

Mr Speaker, mon ti a kontan osi remersye bann biznes ek bann endividi ki'n vin devan pou kontribye dan sa fon

COVID-19. Sa i montre sa vre solidarite ki nou annan dan nou pei.

Mr Speaker, en lot sekter ki mon krwar i enportan dan sekirite nou pei dan sa moman difisil ki nou pe pas ladan, se nou Lapolis. I enportan note pou nou kapab annan lord e disiplin dan nou pei, nou osi bezwen annan en Lafors Lapolis ki alert, ki reponn vit a bezwen nou kominote.

Ozordi nou pei i dan en kriz, e bann regilasyon ki Minister Lasante in met an plas, i bezwen ganny met an pratik par nou popilasyon. Me nou ankor pe vwar bokou dimoun pe groupe kantmenm in dir reste dan lakour. E menm si i annan dimoun ki pe obzerv sa bann konsey byen, i annan ki ankor pe kas Lalwa.

Oli Lapolis Mr Speaker? Pou zot zwe zot rol pou ede enplimant sa bann regilasyon e protez nou popilasyon. Mon pe profite pou pas en mesaz avek nou bann zofisye Lapolis ki ler nou zabitan i *call* zot pou rod zot led, pou dispers dimoun ki'n groupe. Par egzant Mr Speaker, kot bann lakanbiz, anba laboutik, silvouple asiste zot e rann lapel manm piblik.

Pou bann ki pe fer zot louvraz byen, mon felisit zot. Me parkont i annan plen ki pe zis

donn leskiz pou pa deplase. Pa bliye ki zot manda i la pou deservi nou kominote. Pran zot responsabilite pli serye.

En lot fleo ki nou pei pe fer fas avek se drog Mr Speaker. E ozordi nou konnen ki apepre 10 pousan, ki en pti pe mwens ki 10,000 dimoun dan nou popilasyon ki'n vin adikt ek *heroin*. E sa pa pe afekte zis zenn me zot fanmir, zot koleg ek zot kominote ki zot viv ladan. E sa i tre enkyetan pou nou pei aköz zot bann zenn ki ti kapab pe kontribye dan lekonomi nou pei ozordi.

Sa problem pe fer nou depans bokou larzan lo bann tretman drog, en sityasyon kot ti kapab evite si Ladministrasyon *SPUP/SPPF/Parti Lepep* e la *US* ti pe fer byen zot travay.

Prezidan in fer resorti ki son Gouvernman pa pe vin toler okenn biznes drog dan sa pei. Mr Speaker, mon pe demann bann lazans konsernen pou travay ansanm pou en fwa pou tou pou elimin sa fleo drog dan nou pti pei Sesel.

Mr Speaker nou pei pe pas atraver en kriz serye e set en sityasyon kot nou bezwen fer sir ki nou vey byen sak sou ki pe ganny depanse, pou asire ki larzan i ganny byen zere. I nepli

ler pou nou toler bann ka koripsyon dan nou pei.

Mr Speaker, mon pou donn mon sipor total sa ki Prezidan in dir lo sa bann mezir ki pe pran pou entansifye zefor pou elimin koripsyon dan nou pei. Mr Speaker, mon krwar in plis ki ler pou sa bann dimoun ki responsab dan bann ka koripsyon ganny dil avek. Lalwa i merit ganny aplike e si zot koupab, prizon i la pou tou dimoun.

Zis mazine Mr Speaker, konmela nou ti napa sa disparisyon \$50 milyon ki tou dimoun pe demande kot in ale. E lezot gro sonm larzan ki'n disparet anba Gouvernman *US*. E Ler mon regard sa rapor Oditer Zeneral ki'n ganny pibliye pou lannen 2019, i montre ki kantite labi in pase dan sa Gouvernman. Dan sa pti pei ki apel Sesel anba parti *US*! E si nou pa ti'n fer gaspiyaz oubyen soutir voler, ozordi nou ti ava annan nou plis larzan dan en moman kot nou pli byen bezwen.

Mr Speaker, lo size *Air Seychelles*, sa sityasyon i vremen sagrinan. Mon enn sa bann dimoun ki'n ganny sans travay ek sa lakonpanyen pou 10an. E menm dan mon karyer lazans vwayaz mon'n toultan

enterakte ek zot preski toulezour.

Mon konsider bann travayer *Air Seychelles* koman bann koleg e bann zanmi, e mon konnen ki bokou zot i annan bokou pasyon pou sa ki zot pe fer e zot travay dir.

Me Selman mon krwar ki zot osi pou dakor ek mon, ki Gouvernman pa kapab kontinyen siport en biznes ki pe kontinyelman perdi sa kantite larzan toulezan, espesyalman dan sa moman kot nou lekonomi pe pas dan en kriz Mr Speaker.

Ozordi *Air Seychelles* i dwa en total \$142milyon, ki ekivalan en pe plis ki R3bilyon, oubyen en kar Bidze nou pei. E sa lannen i bezwen pey R800 milyon anver son det. E la i osi pe vin rod R109milyon pou saler son *staff* an 2021. Sa en kantite larzan Mr Speaker! Mazinen ki Gouvernman in osi *subsidies* sa lakonpanyen pou omwen \$200milyon pandan sa dernyen 12an a 13an.

Alors kestyon ki mon pe demande Mr. Speaker, se kote nou pou tire pou nou tenir sa det? Eski sa bann det i zis aköz lefe *COVID* ki bokou pe koz lo la? Oubyen *mismanagement* ki'n arrive dan sa lakonpanyen pandan sa dernyen 10an a 15an?

Mon krwar ki serten son bann sekter parey *ground handling* e domestik i bann ki profitab e devret kontinyen. Me par kont, mon krwar ki Gouvernman i pou bezwen al a profon, pou regard lafason ki *Air Seychelles* in fonksyonnen pandan sa bann lannen. E rode aköz i dan sa sityasyon ozordi. E petet rode ki pli bon fason pou al devan.

En bon analiz Mr Speaker, i merit ganny fer, avan ki okenn desizyon i ganny pran. I annan ki pe dir ki aköz nou'n les *Emirates, Qatar, Etihad* e lezot rantre dan nou pei e se sa ki'n kontribye pou fer *Air Seychelles* perdi larzan.

Annou mazin, eski *Air Seychelles* ti pou kapab deservi tou sa destinasyon e ranpli tou sa lotel lo nou pei lo li tousel? Eski i pou kapab donn pri konpetitiv pou atir tou sa touris pou servi son avyon pou vin Sesel? Mon krwar i demann bokou refleksyon lo *Air Seychelles* pou ki pli bon desizyon a kapab ganny fer Mr Speaker.

Mr Speaker, avan mon terminen, mon ti a kontan swet sa nouvo Ladministrasyon dirize par Prezidan *Father Wavel Ramkalawan*, bonn sans dan sa moman tre difisil. Mwan mon pou kontinyen donn tou

mon sipor pou nou kapab amelyor nou sityasyon nou pei.

Mon priye ki Bondye i a kontinyen gid nou Prezidan ek son lekip pou fer bann bon desizyon dan lentere pei ek tou son zabitan. Mon demann pep Seselwa pou annan pasyans e les nou Gouvernman fer son travay. I annan Selman 92 zour depi ki zot in antre dan sa ladministrasyon.

Dan sa moman tre difisil nou bezwen tou sipor pep Seselwa pou nou kapab sorti viktwar dan sa lalit kont sa fleo ki apel *COVID-19*.

Mon ti a kontan remerisi mon fanmir ki'n la toultan akote mwan e tou zabitan Anse Etoile ki'n donn mwan zot sipor. Mon priye ansanm ki nou a kapab anmenn bokou bann bon devlopman pou nou distrik.

Mr Speaker, mersi pou tou ou bann bon konsey ki ou'n donn nou. Mon osi le remerisye *LGB, Deputy Speaker, Chief Whip* ek son Depite san bliy tou mon bann koleg Onorab, mersi pou tou zot sipor. Mon priye ki Bondye i a touzour protez nou pti pei Sesel ek tou son zabitan. Mersi Mr Speaker.

(APPLAUSE)

MR SPEAKER

Mersi Onorab. Onorab Audrey Vidot pa la pou son diskour. Alor mon a pas lo Onorab Michel Roucou. Onorab.

HON MICHEL ROUCOU

Mersi Mr Speaker. Bonzour tou koleg Onorab. Bonzour tou Lepep Seselwa ki a lekout. Mersi Mr Speaker, Prezidan in fer en lanons fran. In demann Lepep Seselwa pou nou ini. Pou nou zwenn ek li pou nou re batir lekonomi nou pei.

Mr Speaker, parey nou tou nou konn nou Prezidan, i en zonn ki vremen fran. Ki pa pou kasyet naryen, kot i mal i pou dir ou. E ozordi si nou war poudir nou lekonomi i dan sa problem, i gras a lekel? Pa lot ki sa Gouvernman ki'n sorti. Si nou war poudir *Air Seychelles* i dan sa problem Mr Speaker, i lakoz lekel? Mon kit sa lanmenm Mr Speaker.

Mr Speaker, Prezidan in fer bokou lanons. En lanons ki in fer in koz en pe *DPA*. Ki mannyer i pou reform li. Mon siport tou sa ki Prezidan i dir. E *DPA* mon osi mon krwar poudir nou bezwen revwar li Mr Speaker.

Akoz? Mr Speaker, mwan mon'n konn bokou dimoun ki ler zot in ganny sans apre ki zot in travay dir, pou zot kapab ganny en promosyon par zot

Siperyer. Ler i ariv kot *DPA* sa i ganny tap kalot ladan. Ki mwan mon panse poudir tou Seselwa ki'n travay dir zot devret ganny zot sans pou zot kapab monte.

Ler mon pe koz lo travay dir Mr Speaker, mon osi anvi koz, anvoy en lanons avek bann Siperyer ki dan bann lorganizasyon. Ler zot war en Seselwa in travay dir e in ariv son letan pou donn li son rekonpans pou li monte, donn li. Annou ankouraz nou Seselwa pou kontinyen travay. Pou zot kontribye pou zot pei.

Mr Speaker, akoz mon dir sa? Mon konn en zennonm ki sorti dan mon distrik Mr Speaker, ki en perd fanmir. Ki leve tou le bomaten Mr Speaker, ki travay dir. Sa zennonm i travay kot *Fire Service* Mr Speaker.

Ki'n arive detrwa mwan pase nou'n war poudir ti annan bann promosyon laba. E li akoz petet son Siperyer i annan serten problemm avek li Mr Speaker, mon pa konnen, ouswa si i annan problemm politik. E li i ti ganny kit akote. Get son bann lezot koleg kot zot pe poste zot bann portre zot in ganny zot promosyon lo *Facebook*.

Mr Speaker, zis mazine en keksoz koumsa ki mannyer i dekouraz en zennonm, en perd

fanmir ki leve tou le bomaten, kontribye pou nou pei, e pou li desann pou al travay Mr Speaker. Ek sa i en zennonm ki travay dan en louvraz vreman danzere, *Fire Service* Mr Speaker.

En lot lorganizasyon ankor Mr Speaker, ki mon pou koz lo la se *SPTC*. *SPTC* i annan pres 2an, 2an nou group travayer Seselwa ki travay dan seksyon *mechanic* anba langar Mr Speaker, pe demann en *rest room* Mr Speaker. Ki nou war, i annan en group travayer etranze ki travay laba, zot, zot in fini gannyen. Be sa group travayer li i ankor pe espere. Sa group travayer Seselwa Mr Speaker. E la nou pe demann avek *SPTC* pou zot get nou Seselwa. Donn zot sa valer ki zot merite.

Mr Speaker, ler mon pe koz lo travay dir, tir politik dan travay Mr Speaker. Mon pa kapab pa tir mon sapo avek Ms Evelina Anta. I en madanm ki annan en prensip travay di. Pa met politik dan son travay Mr Speaker. Akoz si i ti'n met politik, mwan lontan mon ti'n ganny met deor dan mon travay kot mon ti pe travay. E li i ti fer sir poudir i pa met politik dan son travay. E parey toultan i dir "Fer ou louvraz pa fer politik dan mon travay".

Mr Speaker, mwan osi anvi koz lo kote drog dan mon distrik Mr Speaker. Mr Speaker, i malere pou vwar poudir dan bomaten ou war bann zennonm, bann madanm for ki kapab kontribye pou nou lekonomi Mr Speaker. I sorti dan nenport ki distrik pou zot vin asize, dan enn mon sou distrik Corgate Estate, pou zot vin pas zot letan la zis pou zot kapab ganny en pti laliny.

Mr Speaker, mon anvoy en lanons avek sa menm tel dimoun, ki kit zot lakour dan nenport ki distrik pou zot vin la. Zabitan Corgate Estate in fatigue avek sa bann kalite manni. Espesyalman la dan sa letan kot i annan *COVID-19* Mr Speaker. Zot pe met nou bann zabitan a risk. E nou, nou pe demann avek Lapolis, ouswa nenport ki lotorite pou zot pran aksyon.

Mr Speaker, ler mon'n asize mon'n ekout diskour Prezidan, i donn nou plis lespwar ankor. Ki demen ler i fini son manda kot nou a kapab tik ankor pli o, e lev ankor nou paviyon pli o ankor Mr Speaker. I en zonm ki'n vin avek lanons ki donn lespwar nou pep Seselwa.

Mr Speaker, mon distrik i annan bann dimoun ki vreman devoue. Bann dimoun ki doue

dan tou sa ki zot fer. Mr Speaker, mon distrik i enn parmi bann distrik kot i annan gro problem lozman. E nou, nou pe demann avek Gouvernman ki la ozordi, pou zwenn ansanm ek distrik, kot nou kapab revwar bann bout later, kot nou kapab fer plis devlopman pou lozman pou nou bann zabitan.

An lot mo ankor Mr Speaker, nou'n war e apresye, nou'n war poudir i annan bann devlopman kot pe re devlop bann lakaz ki'n la pou bokou letan. Tel ki lo Kangard, Corgate Estate. E nou pe demann Gouvernman pou zot revwar ankor. Get ankor plis bokou bann bout later Mr Speaker. Kot nou kapab met plis bann *housing estate* pou asiste nou bann zabitan.

Mr Speaker, dan mon distrik osi tou i annan en problem kot i annan bokou mon bann zabitan pe esper en bout later. I annan ki'n fini ganny let Mr Speaker, be zot ankor pe espere. E nou, nou pe demann ek Gouvernman pou revwar sa bann bout later anler dan rezerv Kan Tobrouk kot nou kapab asiste ankor bokou plis fanmir Mr Speaker.

Mr Speaker, ler mon pe koz lo kote mon distrik mon anvi tous en pti pe osi tou Mr

Speaker, lo kote bis. Mr Speaker, i annan en *housing estate* ki apel Kan Tobrouk. Avan nou ti ganny asiste avek bis. Plizyer fwa nou'n demann *SPTC* pou zwenn avek sa bann zabitan pou nou kapab revwar ki mannyer nou kapab ganny lasistans avek bis Mr Speaker.

Mr Speaker, mon distrik li osi in ganny touse avek sa lepidemi *COVID-19*. Kot la nou war poudir i annan bokou bann travayer lasante ki sorti dan mon distrik osi pe devoue pou donn lanmen pou konbat avek sa fleo Mr Speaker. Mon donn zot mon lankourazman. Mon donn zot mon sipor Mr Speaker. Mon dir zot avek Bondye dan zot kote ki zot pou sorti premye.

E osi mon le koz avek bann *teachers* ki sorti dan nou 2 lekol Mr Speaker. Mon'n dir zot kontinyen travay dir. Kontinyen lev nou lekol pli o. Kontinyen get nou bann zanfan.

E mwan osi mon dernyen bout Mr Speaker, mon anvi koz lo spor. Mon dezapwente apre ki Minis pou Spor ti vin dan sa Lasanble, mon ti dir li koumsa dir *CEO NSC* pran kontak ek nou. Ki i pa'n zanmen fer ziskan ozordi.

Pou nou rezwenn apre plizyer *meeting* ek vizit ki nou'n fer *regarding* nou Laplenn Kolez Mr Speaker. *Regarding* bann

striktir ki i annan laba, me ziskan ozordi nou pa ankor ganny ni en *call*. Ni mwan, ni *DA*.

Mr Speaker, pou mwan konklir mon pa le mank sa lapel pou mwan remersi mon ansyen *MNA* ki'n donn bokou, Minis Jean-Francois Ferrari. Ki'n donn bokou pou devlopman nou distrik. Nou le remersi li Mr Speaker.

Mon le remersi tou zabitan ki'n met zot konfyans dan mwan. Ki'n donn mwan sa sipor Mr Speaker, pou mwan la ozordi. Mersi.

(APPLAUSE)

MR SPEAKER

Mersi Onorab. E avek sa nou a termin nou *Sitting* pou ozordi. E nou a rebran demen bomaten 9er. Wi Onorab Arissol.

HON SANDY ARISSOL

Mersi Mr Speaker. Mon ti a kontan zis demann en pti klarifikasyon *in terms* of lalis koze. An vi ki ant nou ti sipoze koz en *SPPF*, eski son privez koze i tonbe? Oubyen prezan i rantre dan lalis koze demen e deranz tou keksoz parey lalis i programmen? Eski i perdi son posibilite pou li koze oubyen i koze li?

MR SPEAKER

Les mon a donn ou en repons lo
la demen bomaten. Mersi.

HON SANDY ARISSOL

Napa problemm Mr Speaker.
Mersi bokou. *Thank you.*

MR SPEAKER

Les mon a ... me selman mon
bezwen fer en lanons. Demen
bomaten mon bezwen al pran
pikir vaksen. Alor Deputy
Speaker pou dan *Chair*. Me nou
a konsilte e nou a ganny en
repons. Mersi.

(ADJOURNMENT)

